

Inatsisissatut siunnersuummut oqaaseqaatit

Oqaaseqaatit naliginnaasut

Inatsisissatut siunnersuutip imarisai pingaarnertit

Inatsisissatut siunnersuutip siunertarivaa, siunissami akileraarutit pillugit pisortat sullissinerisa aaqqissuunneranut, akileraarutit pillugit suliassanik, maalaarutinillu suliarinninnermut ilaalu ilanngullugit maleruagassiornissamut tunngavissiornissaq.

Inatsisissatut siunnersuut, akileraartarnermut akitsuusersuinernullu tunngassutilinnik imaqarpoq, akileraartarnermut akitsuusersuinernullu inatsisini pioreersuni aalajangersakkat arlallit tunngavigalugit suliarineqarsimasunik. Siunnersuulli aamma aalajangersakkanik nutaanik arlalinnik imaqarpoq, taamatumalu saniatigut aalajangersakkat atuuttut ilaat nutarterneqarsimallutik.

Inatsisissatut siunnersuut, aningaasarsianillu akileraarutit pillugit Inatsisartut inatsisissaattut siunnersuut, Inatsisartullu inatsissasa ilaanik allanguinissamut siunnersuutit ilanngullugit saqqummiunneqartut inatsisinillu allanngortitserinerup nassatarisaannik inatsinnik allannguinerit tamarmik imminnut ataqatigiissaartuupput.

Inatsisissatut siunnersuummut tunngavigineqartut

Naalackersuisuusimasut inassuteqarnerat naapertorlugu Inatsartut tamarmiullutik ulloq 2. maj 2005 aalajangerput, akileraarutinik akitsuutsinillu siuliarinnittarnerup aaqqissuussanerit allanngortinneqassat qitiusumillu ingerlanneqalissallutik. Taamaammat Naalackersuisut allaffissornikkut sulisutik peqquaat akileraarutinik akitsuutsinillu siuliarinnittarnerup aaq-qissuussaanerisa allanngortinneqarnissaat qitiusumillu ingerlanneqalernissaat suliarissagaat, taamatullu Inatsisartut inatsisissaatut siunnersuutissat Inatsisartunut saqqummiussassat il.il. piareersaqqullugu.

Aaqqissuusseqqinnerup qitiusumillu aqutsilernerup nassatarissavai, pisariillisaanerit ulluinnarnilu aqutasinerup pitsanngortinneqarnerata nassatarisaanik aningaasaqarniarnerup pitsaasumik sunnerneqarnissaa tamatumalu saniatigut pisortat suliassaatininnik ingerlatsinerisa taakuningalu agguataarinninnerminnik allanguinerat, tamatumallu kommunit Naalackersuisullu allaffissornikkut ingerlatsinerat sulisoqarnerallu sunniuteqarfigissavaat.

Taamaammat suliassamik suliarinnermi naammassinninnissamut sulianut ilisimarinninerit aallavigalugit sulimillu pitsaasumik iluarsiinissaq siunertaralugu KANUKOKA kommunillu allaffissornikkut ingerlatsiviini sinniisit peqataatinneqarsimapput.

Inatsisissatut siunnersuutip siunertarai

Aaqqissuusseqqinnissamut qitiusumillu aqutsilernissamut siunnersuut arlalitsigut anguniagaqarfivoq:

Pitsanngorsaaneq – allanngortitsineq angusaqarfusoq.

Pisariillisaaneq – allanngortitsineq angusaqarfinnut pitsaanerusunut.

Pisinnaanngorsaaneq – allanngortitsineq annertunerusunik angusaqarfusoq.

Inatsisitigut eqqortumik pineqarneq – malittarisassat erseqqissut paasinartullu, assigiissaarineq maalaariaaserlu pisariinneq.

Inatsisissatut siunnersuutip immikkoortui pingaarnerit

Qitiusumut nuussineq

Aningaasarsianit akileraarutit pillugit inatsisit, akitsuutit pillugit inatsisit inatsisillu taakku assigisaat allat pillugit sullissinerit, ingerlatsivimmut ataatsimut namminersornerullutik oqartussaataanni inissisimasumut katersuutsinnissaat siunnersuutigineqarpoq.

Ataatsimoortumik ingerlatsivimmik pilersitsinerup kommunini akileraaruseriffiit atorunnaarsinnissaannik kinguneqassaaq. Kommunini akileraaruseriffeqarneq pillugu malittarisassat atuuttut aningaasarsiarnit akileraarutit pillugit Inatsisartut inatsisaanni § 55-imi takuneqarsinnaavoq.

Ingerlatsivimmik taamaattumik Namminersornerullutik Oqartussat ataanni aaqqissuussineq tunngaviusumik naalakkersuisut akissussaaffigivaat immikkut inatsisiliuuttariaqanngitsoq. Taamaammat nutaamik ingerlatsilernissaq pillugu tunngaviusumik taamaallaat pisortat akileraarutit pillugit sullissinerat pillugu siunnersuummi § 1-imi eqqartorneqarpoq.

Ingerlatsivik nutaaq maanna kommunit akieraaruseriffiissa kiisalu Akileraartarnermut Pisortaqaarfiup kattutsinnerisigut pilersinneqassaaq, taamaalilluni ingerlatsivik kommunit sulisuinik Akileraartarnermullu Pisortaqaarfimmilu sulisunik inuttalerneqassaaq.

Ataatsimoorussamik ingerlatsiviup nutaap nunami sumiiffinni makkunani sisamani immikkoortortarnissaa eqqarsaatigineqarpoq (nunap immikkoortuini allaffiit)tassa,

Qaqortumi, Nuummi, Sisimiuni Ilulissanilu. Eqqarsaatigisassat assigiinngitsut eqqarsaatigalugit ataatsimut naliliinikkut nunap immikkoortuini allaffissat inissinneqarfissaat pillugu aalajangiineqarpoq, soorlu naammassinnissinnaassuseqarneq, suliassatigut piginnaasaqarfiit nunallu immikkoortuini inissisimaneq. Taama inissinikkut innuttaasut affaat kiisalu namminersorlutik inuussutissarsiorqarnermik ingerlataqartut 75 procentii illoqarfimmini nunap immikkoortuini allaffeqarfiniit sullinneqarlissapput.

Skatterådi siunissami akileraaruseriffinni aalajangikkat pillugit maalaarutinik taamaallaat sammisaqartartussat, inatsisitigut illersorneqarnissaq peqcutigalugu akilaartarnermut ingerlatsivimmit immikkoortinneqassapput. Taamaaliornikkut akileraartarnermut tunngasuni allaffissornerup maalaarutinillu suliarinnitarneq pillugu immikkoortitsinissamat qularutaasinnaasut sillimaffigineqassallutik.

Illoqarfinni nunap immikkoortuini allaffeqarfeqanngitsuni kommunip allaffiani ataatsimik arlalinnilluunniit inoqassaaq immersugassanik allanillu innuttaasunut tunniussisartussanik kiisalu akileraaruseriffimmi attaveqarfissanik innersuussisartussanik.

Illoqarfinni nunap immikkoortuini allaffeqarfiusuni suliassat tamakku nunap immikkoortuani allaffimmit isumatineqartassapput, illoqarfimmi pineqartumi innuttaasut pisortanut tunngasut pillugit saaffiginniffiusinnaasumik kiffartuussivimmik pilersitsisoqanngippat. Pisuni tamakkunani iluaqutaasinnaavoq nunap immikkoortuanit sulisumik ataatsimik kiffartuussiviup sulisuinut ilaatinneqarpat.

Anguniarneqarpoq nunap immikkoortuini allaffiit tamarmik akitsuusiinermut akileraartarnermullu suliassat tamaasa pillugit innuttaasunik suliffeqarfinnillu tamanik kiffartuussisinnaassasut. Suliassat qaqutigootut paasiuminaatsullu immikkut ilisimasaqarfiusumi apeqcutit ajornakusoortut assigiissaarinermik, pisariitsumik eqqortumillu suliarinissaannik qulakkeerinnittussanik suliarineqartassapput. Suliassat ajornakusoortut tassaasinnaapput nunat tamat akornanni pissutsit imaluunniit aningaasanik nuussinermi akiliutit.

Innuttaasut nunap immikkoortuini allaffiit sisamaasut arlaannut atasassapput; sumi najugaqarneq apeqcutaalluni. Aallaavittulli innuttaasoq nunap immikkoortuini allaffiit arlaannulluunniit saaffiginnissinnaapput, soorlu innuttaasup suliffianut qaninnerusumut. Taamaalilluni innuttaasoq akileraartarnikkut ingerlatsivimmut attaveqarniarluni "angerlaqqaartariaqassanngilaq".

Pinngitsoorneqarsinnaanngilarli akileraartarnikkut ingerlatsivimmi pisariinnerusumik suliaqarfitsigullu ilisimasaqarfiusumik pilersitsiniarnerup nassatarisinnaammagu innuttaasut ilaat akileraarnermik allaffimmut qaninnermut ungasinnerulernissaat. Innuttaasunik kiffartuussinerup ilai siunissami ullumikkut periarfissanik ilisimasatsinnit allaanerusunik ingerlanneqartalissapput, soorlu nuna tamakkerlugu oqarasuaatit kiffartuussiffiusut, telefaxit qarasaasiillu.

Ullumikkut innuttaasut amerlasuut internet-imik atuisinnaapput, ukiunilu takkuttussani amerlinissaat naatsorsuutigineqarpoq. Tamatumani eqqarsaatigineqassaaq akileraaruseriffiup ukiuni tulliuttuni qarasaasiakkut imminut kiffartuunneqarnerup periarfissaanik pitsanngorsaanaissaq siunniummagu, ilutigigitillugulu nammineerluni nalunaarsuisarneq innuttaasut ilaannut atorunnaarsinneqassasoq, taamaalilluni akileraaruseriffimmut nammineq takkulluni saaffiginnittarnerit ikilingaatsiarnissaat naatsorsuutigineqarluni.

Akileraaruseriffiup tungaanit isigalugu nuna tamakkerlugu ataatsimoorussamik ingerlatsinermik pilersitsinikkut suliffiup iluani aporfissat ikinnerulissapput, taamaalilluni akileraaruseriffiup isumalluutai pisariinnerusumik atornissaat periarfissaqalissaaq, sulisut atortorissaarutillo elektroniskiusut atorneqaneri eqqarsaatigalugit. Akileraartarnikkut ingerlatsiviup ilaatigut sammisassanut allaffissornikkut immikkut ittunut immikkoortut pilersinnissaat ajornaatsinnerulissavai kiisalu pisariaqartitsiffiusunut isumalluutit atornissaat ajornaannerulersissallugit.

Taama aaqqissuineq pissaaq isumalluutinik atuinerup tullerriaarnissaannut periarfissat nukittorsarneqarlutik kiisalu nuna tamakkerlugu suliaassanik iluarsisarnerni assigiissaarisinnaaneq, allaffissornikkut aaqqissuussinermi tamarmi saaffigisinnaasat assigiissunngorlugit periarfissiisoqarluni.

Tullerriaarineq suliaqarfiit akimorlugit qulakkeerinissaq siunertaralugu aqutsisoqarfinnik arlalinnik pilersitsisoqassaaq, ilaatigut ilinniartitaaneq sulisunillu ineriartortitsineq eqqarsaatigalugit.

Aningaasarsianit akileraaruserinerup akitsuutinillu suliarinninnerup nuna tamakkerlugu ataatsimut oqartussaaffeqalersinneratigut pisortani suleqateqarfiit ikilisinneqassapput, taamaalilluni pisortanut saaffiginnissutissat saaffigisassamat ataatsimut saaffiginninnikkut iluarsineqarsinnaalissallutik. Akileraaruseriffik eqqarsaatigalugu suliaqarfiit akimorlugit suliarinissaannut periarfissat nukittorsarneqassapput.

Akileraaruseriffik nutaaq innuttaasut tungaannut ammasuussaaq. Taamaalilluni innuttaasut namminneq pillutik paasissutissanut ingerlaavartumik pissarsiarinnissinnaanerat qitiutinneqassalluni, pineqaatissiinissanut tunngasunik paasiniaanernut pingaaruteqartutut isigineqanngippata.

Pisortat ingerlatsiviini sulianik samminnittarneq pillugu inatsisartut inatsisaata imaluunniit pisortat ingerlatsiviini ammasuunissaq pillugu inatsisartut inatsisaanni pisinnaatitaaffiit pisussaaffiillu allanngortinneqarnissaat inatsisissatut siunnersuutip siunertarinngilaa.

Naliliineqarpoq akileraartarnikkut ingerlatsiviup nuna tamakkerlugu ataatsimoortumik oqartussaaffigilernissaata kingunerissagaa ataatsimoortumik ingerlatsiviup taassuma immikkoortut akornanni attaveqatigiinneq suliffiup iluani uppersaatitut isigineqassasut, pisortallu ingerlatsiviini ammasuunissaq pillugu

inatsisartut inatsisaanni § 7 naapertorlugu sulianik takunnissinnaanermut taamaalilluni ilaatinneqartussaananani.

Pisortat ingerlatsiviinni sulianik samminnittarneq pillugu inatsisip kapitel 4-aat malillugu suliamut tunngasunik takunnissinnaaneq pillugu inatsisissatut siunnersuut allannguutissanik nassataqartussaannngilaq.

Inuttut inatsisilerinikkullu inuit pillugit paasisutissatigut manna tikillugu aningaasarsianit akileraarutit pillugit inatsimmi illersuinissaq maannakkutut ingerlatiinnassaaq, takuuk siunnersuutip § 9-ia, taamaalilluni akitsuusersuineq pillugu inatsimmik ilaneqartussanngorluni.

Nipangiussisimasussaataaneq

Malittarisassat atuuttut malillugit akileraartarnikkut ingerlatsineq akitsuutit pillugit inatsisinut arlalinnut atatillugu taamaallaat pinerluttulerinermut inatsimmi kiisalu sulianik suliarinnittarnermi inatsisip § 27-iani nipangiussisimasussaataaneq pillugu aalajangersakkanut nalinginnaasunut ilaavoq, inuttut inatsisilerinikkullu inuit aningaasaqarnerannut, inuussutissarsiutitigut imaluunniit inuinnartut pissutsit pillugit paasisutissat akileraaruseriffiup sulinermini aningaasarsianit akileraarutissat eqquusuinermillu tunngasut pillugit paasisaannut atatillugu, aningaasarsianit akileraarutissat pillugit § 120-iani nipangiussisimasussaataalluinnarnissaq pillugu inatsimmut ilaapput imaluunniit § 43-mi nioqutissanik eqquusuineq avammullut tuniaaneq pillugu Inatsisartut inatsisaannut ilaapput.

Eqqarsaatigineqarpoq nipangiussisimasussaataaneq immikkut sakkortusisap aningaasarsianit akileraarutit pillugit inatsimmut ilanngunneqassasoq, taamaattorli inatsisit akileraartarneq tamatigoortumik isigalugu inatsisiliaanngitsut pinnagit. Taamaalilluni ilaatigut akiliisitsiniartarnermut tunngasut avataaniissapput, manna tikillugu nipangiussisimasussaataaneq suliassanik samminnittarneq pillugu inatsimmi aamma pinerluttulerinermi inatsimmi aalajangersakkat nalinginnaasut malillugit suli naleqqussagaalluni.

Aningaasarsianit akileraarutissanut eqquusuinernullu tunngasuni nipangiussisimasussaataanerup sakkortusisap atuutsilernissaanut tunngavissat eqqarsaatigeqqaarneranut peqqutaavoq akileraartussaataaneq inuunermi pissutsinut tamanut atuuttuummat, aappaatigullu akileraartarnermut oqartussat immikkut misissuisinnaatitaanerannut atuuttut. Tamanna eqqarsaatigisassat akileraaruseriffimmi immikkoortunut allanut tamanut atuupput.

Akileraartarnermi sullissinerup qitiusumut nunnerani maannamut naleqqiullugu akileraaruseriffimmi sulusut ataasiakkaat suliassat aningaasarsianit akileraarutissanut eqquusuinernullu tunngasut sularisalisavaat kiisalu ingerlatsinermi suliassat allat. Taamaammatt sulinermi akileraaruseriffiup pingaartumik ingerlatseqatigiiffiit inuillu allat inatsisinut ilaasut inatsisitigut illersorneqartarnissaat pisariaqarpoq, tamannalu pissaaq sulusut pineqartut nipangiussisimasussaataaneq pillugu maleruagassanut attuumassuteqarnissaat taakkunanngalu ilisimasaqarnerisigut.

Suliassanik saqqummiussisarneq

Sulianik samminnitarneq pillugu inatsit ingerlatsivik suliamik samminninnermini aalajangiisoqartussaattillugu, suliamut attuumassuteqartoq tusarniaaffiginissaa pillugu nalinginnaasunik piumasaqaateqarpoq. Aalajangersagaq aamma atuuppoq aningaasarsianit akileraarutit pillugit inatsit malillugu aalajangiisoqassatillugu.

Siunnersuutigineqarpoq innuttaasut suliffeqarfiillu inatsisitigut illersorneqarnissaat eqqarsaatigalugu akileraaruseriffiup suliassaanut atatillugu suliassanik saqqummiussisarnermi immikkut piumasaqaatit aalajangersarneqassasut.

Akileraaruseriffik aallaavittut suliassamik saqqummiussinissamik suliaqassaaq, Skatterådimit saqqummiussassani, suliani aalajangersimasanik allannguisimanerni kiisalu akileraartarneq pillugu inatsit malillugu suliani pineqaatissiisoqartussaattillugu tusarniaassalluni.

Suliassatut saqqummiussap imarisai annertussusiilu suliap suunera malillugu naleqqussarneqassapput. Suliassanik saqqummiussinerup minnerpaamik imarissavai suliamik suuneranik suliamullu peqataasut pillugit allanillu paasissutissat, suliamut tunngasorpiaat pillugit paasissutissat, suliami peqataasut paasinninnerat tassungalu tunngavilersuutaat pillugit paasissutissat, kiisalu suliani ingerlatsiviup paasissutissat naapertorlugit naliliisimanera malillugu aalajangiisimanera tunngavilersuutaalu pillugit paasissutissat.

Siunnersuutigineqarpoq suliani innuttaasup piumasaqarnera, piumasaqarnerlu akileraaruseriffiup tamakkiisumik akuerinnissimanera naapertorlugu aalajangiisimasoqartillugu suliamik saqqummiussinermik suliaqartoqarnissaa piumasaqaataassanngitsoq.

Suliamik saqqummiussineq pillugu suliamut peqataasunik tusarniaaneq aallaavittut sivikinnerpaamik sapaatit akunnerinik 4-nik periarfissiilluni pisassaaq, tusarniaalluni allakkat ullulernerannit naatsorsorlugu. Taamaattorli aalajangiinissamut attuumassuteqartoq malunnartumik tunngavissaqartumillu akileraarnermi akileqqusanik akileerusussanngitsoq aarlerinaateqarpat taava akileraaruseriffik sivikinnerusumik piffissaliisinnaavoq, pineqartup allannguutiginiakkatut eqqarsaatinik paasinnissasoq aarlerinaateqarpat. Piffissaliussarli ulluni 3-nit sivikinnerusinnaanngilaq, suliami pineqartut suliassamik saqqummiussineq tigoreerneranit.

Suliami pineqartut oqaaseqarfigisassatut suliamik saqqummiussassaaq piumanngissinnaavaa. Taama periarfissiinermi eqqarsaatigineqarput suliami pineqartut pilertortumik aalajangiinissaaq kissaatigippassuk.

Pereersunik ilisimatitsineq

Sulianik samminnitarneq pillugu inatsit malillugu oqartussaaq aalajangiinnginnermini aallaavittut tusarniaassaaq, tassa suliami peqataasoq suliamut tunngasut piviusut pillugit paasissutissanik oqartussaaq pissarsisimasooq

ilisimangissagaa isumaqarfigineqarpat, kiisalu paasissutissat suliaq pillugu aalajangernissamut pingaaruteqarpata pineqartumullu akornutaasinnaappata.

Aningaasarsianit akileraarutissat iluini nalinginnaasumik tusarniaasussaataaneq pinngitsoorani ilisimatitsisussaataaneermik ilaneqarsimavoq, tassa akileraartarnermut oqartussat nammineq nalunaarsuinermit naleqqiullugu aningasarsianik akileraaruteqaataasussanik nammineq malunaarutit allangortinniarpatigit imaluunniit nammineq nalunaarutit amigaataanera pillugu aningaasarsianik akileraaruteqaataasussanik missangersuilluni angissusiliisoqassatillugu.

Siumulli kalerriineq pinngitsoorsinnaavoq, akileraarutissanik aalajangiinissaq akileraartartup piumasaqaatigisimappagu, aalajangernerlu piumasaqaammut tulluulluinnarpat.

Inatsisitigut aalajangersakkani tamakkunani taamaallaat piumasaqaataavoq nammineq nalunaarsukkanik allannguiniarneq pillugu akileraartartoq ilisimatinneqassasoq. Taama ilisimatitsinerup imarisassai pillugit erseqqinnerusumik piumasaqaateqanngilaq.

Taama immikkut ilisimatitsisussaataaneermut ilaavoq nammineq nalunaarsukkanik allannguiniarnermut eqqarsaat akerlilerlugu akileraartartoq allakkatigit oqaasiinnakkulluunniit oqaaseqaateqarsimangippat, nammineq nalunaarsukkanik allannguiniarneq kalerriunneqarsimasutut iluarsineqassaaq.

Siunnersuutigineqarpoq pinngitsoorani ilisimatitsisussaataaneq aamma akitsuusersuinermit tunngasunut ilanngunneqassasoq.

Ilisimatitsinissamut piffissaliussaq maannakkutut allakkap ullulerneranit sivikinnerpaamik sapaatit akunnerinik sisamanik sivilissuseqassaaq, allamik piffissaliussinissaq pillugu i natsisitigut aalajangerneqarsimangippat. Sullitap pineqartup piffissaliussaq sivikinnerusoq akuerisinnaavaa.

Pereersunik ilisimatitsineq kingorna aallaavittut suliani aalajangerneq Skatterådimit maalaarutigineqarsinnaasuni atorneqassaaq.

Pereersunik ilisimatitsineq pillugu akerliliisoqarsimangippat maannakkutut aalajangiussaq pillugu ilisimatitsisoqassanngilaq.

Isertitat akileraarutissat pillugit sulianik sammininneq

Siumutoortumik nalunaarsuineq, nammineq nalunaarsuineq, akileraarusiineq, inaarummik naatsorsuineq kiisalu aningaasarsianit akileraarutit agguarneri akilernissaallu pillugit malittarisassat eqqarsaatigalugit siunnersuutigineqarpoq aningaasarsianit akileraarutit pillugit inatsisartut inatsisaat atuuttoq pingaarutilitsigut allangortinnagu ingerlatiinnarneqassasoq, qitiusumut katersuutsitsinissaq eqqarsaatigalugu aalajangersakkat pisariaqarfiisigut allanngortinneqarmata.

Akileraarutaavallaartut siusinaarlugit aningaasanngorlugit utertinneqartarnerinut tunngatillugu assigiissumik sulianut ingerlatsisarnermi tunngavissaqartitsiumaneq anguniarlugu, ulluinnarni § 50 tunngavigalugu utertoortaaartunik taagorneqartut pillugit, siunnersuutigineqarpoq siusinaarluni utertitsinerni taamaattuni utertoortissat 5.000 koruuninut minnerpaaffilerneqassasut. Taamaaliornikkut ullummikkut suliaasaqarfiup iluani nikerartumik pissuseqarfiusup ilaatigut tulluarsarneqarsinnaanera aammalu suliaassani taamaattuni ikililiinermik angusaqarfiussammat.

Akileraartartut ilaat nammineq nalunaarsuutiniq nassiussisarunnaarnissaat pillugu periarfissanik naalackersuisut misissuissamaarput, taarsiullugulu akileraaruseriffik pineqartunut aningaasarsianik akileraartissanik angissusiliinermik nassiinnartarlugit. Tamanna siunertaralugu siunnersuutigineqarpoq Naalackersuisut pisinnaatitaassasut kommunimi ataatsimi arlaqarnerusuniluunniit misiligutitut aaqqiissuusinissamik aallartitsissasut. Misiligutitut aaqqiissuusinissap siunertaraa suliaqarfisigut teknikkikkullu tunngavissat pigineqarnerisut misilinniarlugu, taamaalilluni akileraartartut ilaannut nammineq nalunaarsuutiniq nassitsissamik piumasagaat taamaatinneqarsinnaalluni.

Taamakku saniatigut aalajangersakkat atuuttut arlallit siunnersuutigineqarput, tassani sulisitsisut, aningaaseriviit allallu pisussaaffilerneqarlutik akileraartussaataasut aningaasarsiaannik aningaasartuutaannillu paasissutissat akileraarutit pillugit pisortat sullissinerat pillugu inatsisartut inatsisissaattut siunnersuummi aalajangersakkat pillugit akileraaruseriffimmut nalunaaruteqartassasut.

Erniaat

Aningaasarsianik akileraaruteqaataasussat akitsuutillu kingusinaartumik akilernerini erniaartinneqartut assigiinngitsut atuupput. Pisut ilaanni qaammammut erniaat 1 procentiupput allani qaammammut erniaat 2 procentiullutik.

Siunnersuutigineqarpoq erniaartittakkat akiliinissamut killigititaq aallarnerfigalugu qaammammut 1 procentimut tulluussarneqassasut, ikinnerpaamilli 500 kr. Siunnersuutigineqarpoq erniaat ilaartorneri nammineerluni nalunaarsuineri ilanngaatigineqarsinnaassanngitsut, erniat pillaatitut akiliutigineqartarnerisut taasariaqarmata.

Akileraarutiniq amerlavallaanik akiliisimaneq tunngavigalugu utertitsilluni akiliinissamut naligninnaasumik piffissaliussinissaq siunnersuutigineqarpoq, tamannalu atorineqassaaq akileraarutiniq utertitsinissaq pillugu akileraartarnermut inatsimmi immikkut piffissaliussanik aalajangiisoqarsimatinnagu. Siunnersuutikkut innuttaasut suliffeqarfiillu akileraarutitigut pissarsiassatik erniaalersortisinnaanerannik qulakkeerinniffigineqarnissaat, soorlu akileraaruseriffik taamaaliorsinnaasoq. Erniaat akileraarutissaasut 1 procentimut aalajangiunneqarnissaat siunnersuutigineqarpoq.

Piffissaliussat

Aningaasarsianik akileraaruteqaataasussat akitsuutillu pillugit anigissusiliineq imaluunniit allangortitsinissaq pillugu ullumikkut malittarisassanik aalajangersaasoqarsimangilaq. Taamaammatt taakku akiliinissamut piffissaliussat pillugit malittarisassanik nalimmassarneqartarput, kiisalu akileraarutinik akiliinissaq qaqugu pisoqalisimassarneq pillugu malittarisassanut atatinneqarluni.

Piffissaliussanik taamaattunik atuutsitsilernissaq inatsimmi matumani siunnersuutigineqarpoq. Akileraartussaataasut akitsuutinillu akiliisussaataasut inatsisitigut illersorneqarnerisa inatsisitigut iluarsinikkut pitsanngortinneqarnissaa siunnersuutip siunertaraa.

Siunnersuut malillugu akileraaruseriffik ukiup aningaasarsiorfiusup naaneernerani ukiut tallimassaanni oktoberip 31-iata kingorna aningaasarsianik akileraaruteqaataasussanik angissusiliineq pillugu imaluunniit qaaffaanissaq pillugu kalerriissumik nalinginnaasumik nassitsisinnaangilaq. Akileraartussaataasup aningaasarsiaminik akileraaruteqaataasussanik angissusiliisimaneq allangortikkusukkuniuk ukiup aningaasarsiorfiusup naanerata ukiuisa tallimaanni oktoberip 31-ia nallertinnagu allanguutissanut tunngavilersuutaasinnaasunik apaasissutissanik nutaanik saqqummiussissaaq. Ukiup aningaasarsiorfiusup naanerata kingorna ukiut arfinilissaanni akileraaruseriffiup nammineerluni aningaasarsianik akileraaruteqaataasussanik angissusiliisinnaassanngilaq.

Taamattaq siunnersuutigineqarpoq akileraaruseriffiup akitsuutitigut akiligassat imaluunniit akitsuutitigut utertoortissat pillugit nalinginnaasumik allangortinnissaat pillugit kalerriinissamut ukiunik 4-nik qaammatinillu 3-nik piffissalernerneqassasoq kiisalu akitsuutinik akiliisussaataasooq akitsuutitigut akiligassinneqarnini imaluunniit akitsuutitigut utertoornissaminik allangortitsinissaminik taama piffissalernerneqarluni.

Aningaasarsianik akileraarutit akitsuutillu piffissalernerinut malittarisassat assigiinnginnerannut peqquataavoq akileraariaatsit taakku assigiinngitsunik aaqqissuunneqarneri. Aningaasarsiat akileraaruteqaataasussat ukiumut aningaasarsiorfiusumut naatsorsorneqartarput, akitsuutit akitsuutinik akiliisussaataanerit aalajangersimasut pisut pineranni akilerneqartussaallutik.

Piffissaliussat nalinginnaasut avataasigut aningaasarsiat akileraaruteqaataasussat angissusilernerit imaluunniit akitsuutit angissusilernerit taamaallaat pisinnaapput allangortillugilluunniit, akileraartussaataasup akitsuutinilluunniit akiliisussaataasup iliuuserisimasai pillugit akileraaruseriffiup naatsorsuutaanngitsumik ilisimasaqannginnini peqquutigalugu aalajangiisinnaasimangippat angissusiliisinnaasimangippalluunniit. Akileraartussaataasup iliuuserisimasai pillugit akileraaruseriffiup ilisimalerneranit imaluunniit ilisimalertussaagaluarneranit kingusinnerpaamik qaammatit arfinillit qaangiutinnginnerini angissusiliinerup allangortinneqarsimanera pillugu kalerriussummik nassiussissaaq. Taama kalerriinerup nassiunnerata kingorna kingusinnerpaamik qaammatit arfinillit qaangiuppata angissusiliineq isumagineqassaaq.

Akileraartussaataitaasoq imaluunniit akitsuutinik akiliisussaataitaasoq taama assinganik nalinginnaasumik angissusiliinissamut piffissarititaasup avataatigut paasissutissat piviusut imaluunniit inatsisinut tunngasut saqqummiussinnaavai, pineqartoq naatsorsuutiginnigisaminik ilisimasaqarsimannginnini peqqutigalugu paasissutissanik siusinnerusukkut saqqummiussinnaasimanngikkuni. Akileraartussaataitaasup imaluunniit akitsuutinik akiliisussaataitaasup pissutsit piviusut imaluunniit inatsilerinermut tunngasut angissusiliinermut allannguutaasinnaasutut tunngavissat pillugit paasinnereernermik imaluunniit paasinnittussaasimagaluarnermi kingorna kingusinnerpaamik qaammatit arfinillit qaangiutinnginnerini paasissutissanik saqqummiussissaaq.

Taamattaq nutaatut siunnersuutigineqarpoq akileraarnissamut allannguinnissamullu nangaassuteqartoqarsinnaaneq, tamatumani inatsilerinikkut inissisimaneq paasitsiillugu.

Utertitsilluni akiliisoqarnissaanik piumasaqarneq

Siunnersuutigineqarpoq akileraarutinik akiliugitineqarpallaartut utertitsilluni akileeqqusineq utertitsilluni akiliinissamut piffissarititaq sioqqullugu pisinnaanngilaq, tunniussinerillu taamaattut atortussaataaangillat.

Aalajangersakkap qulakkeerpaa akileraartussaataitaasup akileraarutinik utertitsilluni akiliisoqarnissaanik piumasaqaatai inuttut akiitsoqarfianut ingerlateqqinneqarsinnaannginneri, taamaalillunilu anguneqarluni Kalaallit Nunaanni Namminersornerullutik Oqartussat kommunillu pisortanut akiligassanit kinguaattoorutit pisassat ilanngarnerisigut imaluunniit piumasaqaatinut pisassalernikkut matussisersinnaanngikkaat.

Isumakkeerfiginninneq

Siunnersuutigineqarpoq aningaasarsianit akileraarutit pillugit inatsimmi § 115, imm. 9-mi inuit akileraarutit sinnerinut akiligassanik isumakkeerinninneq pillugu malittarisassat aalajangersakkamik imartunerusumik taarserneqassasut, Kalaallit Nunaanni akiliisinnaajunnaarneq pillugu inatsit § 197-imi aaqqiissut nr. 983 ulloq 16. december 1997-imi atuutilersoq aallaavigalugu. Akiliisinnaajunnaarnermut aaqqiissutip § 197-iata akiitsunik isumakkeerinninnerup tunngavianut atuuppoq.

Siunnersuummi pingaartinneqaproq, akiitsullip akiligassamigut kinguaattoorutai akileraarutinit akitsuutinillu aallaaveqarneruppata isumakkeerinnissutaasinnaasut, akiitsunik isumakkeerinninnissaq pillugu Nunatta Eqqartuussiviani suliarineqassasuuppat assinganik. Taamaaliornikkut Nunatta Eqqartuussiviani akileraaruseriffiullu akornanni suliasat agguataarneri iluaqutaanerusumik anguneqarsinnaapput, kiisalu suliasat taamaattut assigiissaarnerusumik suliarineqarsinnaallutik. Akiitsullili kinguaattoorutaat kinguaattoorutinik arlalinnik katitigaasut Nunatta Eqqartuussivia aqqutigalugu akiitsuminnik isumakkeerneqarnissartik pillugu suli sulissutigisartussaavaat.

Siunnersuummi isumakkeerinninnissamik suliassamut atatillugu missangersuinermi tunngavissat sukumiinerusumik naleqqussarneqassapput, akiliisinnaajunnaarnermi aaqqiissutip § 197-ianut naleqqiullugu annertunerusumik. Siunertaanngilarli suliassaq akileraarnikkut akitsuusersuinikkullu kinguaattoorutit isumakkeerneqarnissaannut tunngasut assigiinngissutaat apeqqutaassasoq, imaluunniit suliassat akiitsunik isumakkeerfiginninnermut tunngasuunersut.

Akileraarutininik akitsuutinillu isumakkeerinninnissamut suliassat akileraaruseriffiup missangersuineranut tunngavissat sukumiinerusumik naleqqussarnissaanni siunertaavoq suliassanik tamakkunanga samminnittarnerni inatsisitigut illersorneqarnerup nukittorsarneqarnissaa periutsinut sapinngisamik ilanngunneqarniarneqarmat, soorlu nunami maani Danmarkimilu akiitsunik isumakkeerinninnermut tunngasuni taama ineriartorsimasoq.

Qarasaasiakkut attaveqatigiinneq

Siunissaq ungasinnerusooq eqqarsaatigalugu akileraartarnikkut ingerlatsiviup innuttaasullu akornanni pilertornerusumik attaveqartarneq kiisalu immersugassanik il.il. sipaarniarnissaq anguniarlugu siunnersuutigineqarpoq, qarasaasiakkut attaveqaatinik atuineq pillugu Naalakkersuisut malittarisassanik alaajangersaasinnaassasut.

Aalajangersakkat atornissaanut eqqarsaatigineqassaaq innuttaasut ataasiakkaat qarasaasiakkut attaveqarsinnaanermik periarfissaq atorumasinnaassanngikkaat, taamaalilluni nalunaarutit akileraaruseriffiup tassanngaannit pissarsiat imaluunniit nassiussat qarasaasiakkut ilusilersorsimassanngitsut.

Nakkutilliineq

Nakkutilliinissamik aalajangersakkat atuuttut amingaasarsianit akileraarutit pillugit inatsisip §§ 86, 92-94 aamma 98-ianni takuneqarsinnaapput kiisalu allanngorarnerusumik akitsuusersuineq pillugu inatsisini ataasiakkaani.

Nakkutilliinermi tunngaviusumik aalajangersakkat akileraarutit pillugit pisortat sullissinerat pillugu inatsisartut inatsisaanni ataatsimut katersuutsinneqassasut siunnersuutaavoq. Inatsisiliornerit ilaanni immikkut nakkutilliinissamik aalajangersakkat atatiinnarneqarnissaat suli pisariaqassaaq, aalajangersakkat immikkut siunniussassat siunertarimmassuk, inatsisartut inatsisaannit pineqartunit naleqqussarneqassammata, assersuutigalugu takuuk nioqqutissanik eqquusuineq annissuinerlu pillugit inatsisartut inatsisaat ilaasunik nassiussanilluu nakkutilliineq pillugu aalajagersakkat.

Aalajangersakkat siunnersuutigineqartut imarisai pingaarnerit ataani naatsumik nalunaarsorneqarput. Makku siunnersuutigineqarput:

- Akileraaruseriffik uppernarsaatinik uppernarsaassutinillu piniarsinnaavoq kiisalu akileraarutit annertussusilerniarnerannut atatillugu illuatungerisat ataatsimiigiaqqusinnaallugit.

- Naatsorsuuserinermik akileraaruseriffiup nakkutigisaanut ilaapput namminersorluni inuussutissarsiornermik ingerlatsisut naatsorsuuserisuusut inuttut toqqarlugit nakkutilliihfigisinnaaneri kiisalu inuit inatsisilerinermik suliallit aamma inuit suliffeqarfiillu akitsuutinik akiliisussaataasut, naak inuussutissarsiornermik ingerlatsisuunngikkaluartut. Naatsorsuutitigut najoqqutassat misissorneqarnissaat siunertaralugu akileraaruseriffiup taakku pissarsiariniarsinnaavai, taamallu akileraaruseriffik tutsuiginartumik uppersaaserluni sumiiffimmi naatsorsuutinik misissuisinnaatitaalluni. Sumiiffimmi naatsorsuutinik misissuinermit ilanngunneqarsinnaapput init namminerisamik ineqarfiusut, naatsorsuutitigut najoqqutassanik uninngatitsiviusut, erseqqinnerusumik takukkit aalajangersakkanut tamakkununga oqaaseqaatit ataasiakkaat, § 46, imm. 4, aamma § 47, imm. 3.
- Kinaluunniit suliffeqarfimmini akileraaruseriffimmut nalunaaruteqartussaataasooq naatsorsuutimik naatsorsuuserineq pillugu inatsit malillugu paarsisussaataasooq malittarisasat naapertorlugit paarsissavoq. Tamanna atuuppoq pineqartoq naatsorsuusiortussaataagaluarpat taamaassanngippalluunniit.
- Akileraaruseriffiup aalajangersagai malillugit piginneqataassutinik piginnittuuneq piginneqataassutinik piginnittuunerup taassumaluunniit aapparisaanik selskabimilu aqutami akornanni isumaqatigiisutit pingaarutillit nalunaarutigisussaavai.
- Inuit inuttut inatsisilerinikkulluunniit aningaasaqarnikkut namminersorluni inuussutissarsiornikkulluunniit tunngasunik oqartussanit allanit paasissutissanik qarasaasiakkut pissarsiniarnissaannik Naalakkersuisut akileraartarnermi oqartussaasut piginnaatissinnaavaat, aningaasarsianik akileraaruteqaataasussanik naatsorsuinermit pingaaruteqartutut isumaqarfigineqarpata imaluunniit Namminersorerullutik Oqartussanut imaluunniit kommuninut akiitsunik akiliisitsiniarnermi, taamaalilluni inuit taakku pineqartut pillugit paasissutissanik akileraaruseriffimmi naleqqatigiisitsinissaq siunertaralugu.
- Inuit inuttut inatsisilerinikkulluunniit pisortat aningaarsianik akileraaruteqaataasussanik assingusunilluunniit pisortanut akiligassanik annaasaqartitsisimasut imaluunniit annaasaqartitsiniarsimasut pillugit akileraaruseriffik nalunaarsuisinnaavoq
- Akileraaruseriffik misissuisinnaatitaavoq, paasissutissat akileraaruseriffiup akileraartartumit/akitsuutinik akiliisussaataasumit tigusimasai paasissutissanut akileraaruseriffiup allanit pissarsiarisimasaannut tulluunnersut (paarlaassinikkut kukkunersuineq).
- Akileraaruseriffik pisinnaatitaassaaq paasissutissat suulluunniit akileraarutit amerlassusissaannik aalajangiinermi akitsuutillu amerlassusissaannik taggissinermi pingaaruteqartutut isumaqarfigisat pissarsiariniarsinnaallugit. Aalajangersagaq atorneqassaaq paasissutissanut tunngasut pisortat oqartussaaffii, piginneqatigiiffiit, umiarsuaatileqatigiit, peqatigiiffiit, aningaasaateqarfiit sammisaqarfiillu allat inatsisit allat naapertorlugit akileraaruseriffimmut nalunaaruteqartanngitsut pillugit paasissutissat.
- Aningaaseriviit, inatsisilerituut assigisaallu, ingerlatsinermut aningaasanik pissarsisartut imaluunniit akileraaruseriffiup peqqusineratigut

inuussutissarsiornikkut aningaasanik taarsigassarsisitsisartut, inuit inuttut inatsilerinikkullu akilersimasaat, taarsigassarsiarisimasaat il.il. pillugit aqqi taallugit paasissutissanik tunniussisussaapput.

- Skatterådi akileraaruseriffittulli paasissutissanik piunasaqaateqarnissaminnik taamatut pisinnaatitaassaaq. Piunasaqaataassaarli Skatterådip paasissutissanik piunasaqarnerani maalaarutinik suliarinninnissamut atatillugu qinnuteqaataassammat.
- Naalakkersuisut malittarisassanik aalajangersaanissamut pisinnaatitaapput, taamaalilluni nunami kommunalbestyrelsit qarasaasiakkut paasissutissanik akileraaruseriffimmit nalunaarsorsimasunik pissarsisinnaassallutik.

Maalaaruteqarneq eqqartuussivikkullu misiliinerit

Malittarisassat atuuttut naapertorlugit akileraartarnermi oqartussat aningaasarsianik akileraaruteqaataasussat angissusilerineri pillugit aalajangiinerit Skatterådimut maalaarutigineqarsinnaapput, akitsuutilli pillugit aalajangikkat Naalakkersuisunut maalaarutigineqarsinnaallutik. Raajanulli akitsuutit pillugit maalaaruteqartarfimmik immikkut ittumik pilersitsisoqarsimavoq.

Aningaasarsianit akileraaruteqaataasussaasut pillugit maalaarutinik suliarinnittarnerup saniatigut Skatterådi manna tikillugu aningaasarsianik akileraaruteqaataasussat amerlassusissaasa aalajangertarnerat pillugu atugassanik ilitsersuutinik nalinginnaasunik iluarsisarsimavoq, taamatullu aningaasarsianik akileraaruteqaataasussat pillugit malittarisassatut siunnersuutinik Skatterådi Naalakkersuisunut saqqummiussisinnaasarsimappoq. Tamakku saniatigut akileraarutit sinnersinut akiligassat pillugit isumakkeerreqarnissamik qinnuteqaatit Skatterådip sammisarsimavai.

Inatsisitigut illersorneqarnissaq eqqarsaatigalugu tunngaviusumik eqqarsarnartoqarpoq, apeqqutit tunngavissatut Skatterådip nammineq innersuussutigisimasai pillugit, ataatsimiititammi arlaannaanulluunniit attuumassuteqartuunngitsup Skatterådip aamma sammisarsimammagit, soorlu akiliuteqarnani nerisaqarneq pillugu suliasat, taamaaliornikkut oqartussaaffik malittarisassiuussisoq maalaarutinillu samminnittussaasoq kaputartuunneqalersimallutik. Periuseq ajornartorsiutinik pingaarutilinnik pilersitsisimangilaq, akileraartartumulli maalaaruteqarusuttumut ilisimassallugu nikallornassaaq aningaasarsianik akileraaruteqaataasussanik angissusiliineq pillugu Skatterådip maalaarummut tunngatillugu aalajangiisussap malittarisassat najoqqutaasussaasut tassangaannit ilusilersortarmagit.

Aningaasarsianik akileraaruteqaataasussat pillugit malittarisassanik Skatterådip siunnersuisinnaatitaanera atorreqanngingajassimavoq.

Manna tikillugu Skatterådi kisimiilluni akileraarutit sinnerinut akiligassat isumakkeerreqarnissat pillugu qinnuteqaatit suliarisarsimavai. Skatterådi ukiumut pingasoriaannarluni ataatsimiittarmat suliasat katersuussimapput, ilaatigut suliasat aalajangiiffiginissaannut kinguaattoornernik malitseqartumik.

Akitsuutit pillugi maalaarutit amerlassusiat maannamut killeqarpoq (ukiumut suliaasat 5-15-it). Sammisaqarfik ima ingerlanneqarpoq akileraartarnermut Naalakkersuisoq suliaasani aalajangiisinaanermik pisinnaatitaalluni.

Suleriaaseq ajornartorsiutitaqanngikkaluartoq akileraartarnermut Naalakkersuisoq politikikkikut akisussaasuulluni maalaarutini aalajangersimasuni aalajangiisarnera tunngaviusumik tulluurtuunera apeqquuserneqarsinaavoq, ilaatigut soorlu maalaarutini aalajangerneq sammisaqarfimmut tunnganani politikikkikut aalajangernerusut nalilerneqarsinnaammat.

Raajanut akitsuutit pillugit maalaaruteqartarfimmi ilaasortat aggersarneqarsimanngisaannarpoq.

Tamanna tunngavigalugu siunnersuutigineqarpoq Skatterådip oqartussaaffii aamma akitsuutit pillugit maalaarutininik ilaneqassasut.

Taamattaq siunnersuutigineqarpoq rådip manna tikillugu aningaasarsiat akileraaruteqaataasussat angissusilerneqarnerini atugassaannik najoqqutassiornissamut akisussaaffii akileraartarnermi naalakkersuisumut nuunneqassasut.

Siunnersuutigineqarpoq aningaasarsianik akileraaruteqaataasussat pillugit malittarisassanik Skatterådip siunnersuisinnaanera pillugu inatsisitigut aalajangiisimaneq atorunnaassasoq. Inatsisitigut aalajangersaasimaneq atorunnaarsitsisoqaraluarpuunniit Skatterådi soqutigisaqaqatigiit allat assigalugit akileraartarnerup iluani malittarisassat pillugit allannguutissanik siunnersuutininik saqqummiussisinnaassavoq. Siunnersuutit taamaattut Akileraartarnermi Pisortaqarfiup aqutsisuiunut Naalakkersuisunullu ingerlatinneqarsinnaapput.

Aamma siunnersuutigineqarpoq maalaaruteqarsinnaaneq pillugu suleriaaseq atuuttoq inatsisitigut aalajangiiffigineqassasoq.

Kiisalu siunnersuutigineqarpoq Skatterådimumt maalaarutininik nassiussisarneq pillugu kiisalu eqqartuussivimmi misiliisoqartarnissaa pillugit malittarisassat allanngornagit ingerlatiinnarneqassasut.

Kinguartitsineq

Aningaasarsianit akileraarutit pillugit inatsisartut inatsisaanni atuuttumi § 67 naapertorlugu aningaasarsianik akileraaruteqaataasussanik angissusiliineq pillugu maalaaruteqartoq akiliinissamut piffissaliiunneqartumik kinguartitsinnimik periarfissiinngilaq. Skatterådili kinguartitsinissamik nalunaaruteqarsinnaavoq.

Malittarisassat taakku ingerlatiinnarnissaat siunnersuutigineqarpoq, kinguartitsinissamillu nalunaaruteqartarneq pillugu apeqqummut atatillugu annertusarniarneqarluni.

Pineqaatissiinerit

Siunnersuut aalajangersakkanik imaqarpoq, taakkunani inatsimmik unioqquitsinermi pineqaatissiinerit aalajangersarneqarlutik. Aalajangersakkat aningaasarsianit akileraarutit pillugit inatsisartut inatsisaanni maannakkut atuuttumi §§ 102-miit 111-mut tunngaveqarput, kisiannili siunnersuummut naleqqussagaallutik.

Avitseqatigiinnissamut aalajangersakkat

Kommunini akileraarusilerinerit qarasaasiamik aallaavillit aningaasarsiat akileraaruteqaataasussat sulineqarnerisa ingerlanneqarnerannut tunngaviupput. Taamaamat akileraaruseriffiit 1. januar 2007-ip kingorna suleriaatsinik tamakkunanga atuisinnaanissaat pingaaruteqarpoq, tassalu ulluinnarni ingerlatsinermut atatillugu kiisalu ukiut aningaasarsiorfiusut siuliinit paasissutissanik pissarsiornermut atatillugu. Taamattaaq akileraaruseriffiit kommunit naatsorsuutaanni akiliisitsiniarnerinilu paasissutissanik pissarsiornissaq pisariaqartittassavaat.

Taamaattumik siunnersuutigineqarpoq 1. januar 2007 aallarnerfigalugu kommunit akileraaruseriffiit akileraarusilerinerimut, naatsorsuutimminut akiliisitsiniartarminnullu paasissutissanut qarasaasiakkut isertissinnaalissagaat.

Aningasarsiat akileraaruteqaataasussat angissusilerneqarnerisa suliarineqartarnerat kommuninit Namminersornerullutik Oqartussanut nuunnerinut atatillugu assigiissaarissumik aaqqiinissaq qulakkeerniarlugu siunnersuutigineqarpoq Naalackersuisut nalunaarusiornikkut kaajallaasitaliornikkulluunniit tamakku pillugit malittarisassiuussinissamik pisinnaatinneqassasut. Tamanna ilaatigut sulianit paasissutissanik toqqortanillu nuussinernut atatillugu piviusunngorsinnaavoq.

Kommunini aningaasatigut kinguaattoornerit akileraarutit sinnerinut akiligassanut A-skat-imullu tunnganerupput. Akilertarnermi suliaassat qitiusumit ingerlanneqartalernissaannut atatillugu pissusissamisuusaaq akiligassatigut kinguaattoorutit 1. januar 2007 sioqqullugu pinngorsimasut Namminersornerullutik Oqartussanut nuunneqassappata, naleqassusii piviusorpalaartumik angissusilerneqarnissaat isumaqatigiissutigineqarpat. Nuussinerup nassatarissavaa aningaasarsianik akileraaruteqaataasussat siusinnerusukku siunissamilu kinguaattoorutit Namminersornerullutik Oqartussanut katersuunneqassammata, taamaalilluni aningaasat pissarsiarineqartut agguarnerini isumaqatigiinngissutaasinnaasut killilerneqassallutik.

Sulisut

Qitiusumik ingerlatsilernissamut atatillugu kommunini akileraarusiisarnermik suliaqartut, piffissami suliffigisaminni affaa sinnerlugu akileraarnermut suliaasanik suliaqartut tamarmik, akileraaruseriffimmi atorfinitsinneqarnissaminut neqeroorfigineqarsimapput.

Immersugassatigut misissuinnermut atatillugu sulisut nunap sortaani inissinneqarnissartik nalunaarutigissallugu periarfissinneqarsimapput, akileraaruseriffimmilu atorfinissagunik suliaqarfitsigut suut suliarerusunnaat.

Apersuinnermilu sulisut kommunimi suliinnarnissaminnut nalunaassallutik aamma periarfissinneqarput, kisiannili atorfimmi allanik sammisaqarfiusumi.

Akileraaruserinermik maanna suliaqartut amerlanersaat akileraaruseriffimmi sulilernissaminnut akuersimapput, imaluunniit kommunimi sulisitsisut isumaqatigiissuteqarfigalugit kommunimi atorfimmi allami sulilerusullutik.

Sulisut ikinnerusut akileraaruseriffimmi sulilernissaminnik kissaateqanngillat, naak maanna kommunerisamik kommunip iluani atorfimmik allamik neqerooruteqarfigineqarsimanngikkaluarlutik. Taamaattoqartillugu malittarisassat atuuttut malillugit soraarsitsisoqartariaqarsinnaavoq, atorfiit maanna atuuttut 1. januar 2007 aallarnerfigalugu atorunnaartussaammata.

Tjenestemandinut akileraaruseriffimmi sulilernissaminnik kissaateqanngitsut imaluunniit maanna kommunerisaminni atorfimmut allamut nuukkusunnigitsut eqqarsaatigalugit, nalilertariaqarpoq atorfiit neqeroorutaasut tulluurtuunersut, takuuk § 15, imm. 1, Inatsisartut tjenestemandit pillugit inatsisaanni nr. 21, 18. december 2003-imeersoq (tjenestemandit pillugit inatsimmi).

Tjenestemandit atorfimmut tulluurtumut nuunneqartussat pillugit tjenestemandit atorfimmik akuersinissaminnut pisussaaffeqarput, tjenestemandilli tamanna kissaatiginngikkuniuk atorfimmunit nammineerluni soraarniuteqartariaqarpoq. Taamaattoqartillugu tjenestemandi ukiuni pingasuni suliaqarsinnaanermut akissarsiat pissarsiarisinnaassanngilai, takuuk tjenestemandip pillugit inatsimmi § 33, imm. 2.

Tjenestemandili manna tikillugu atorfeqarnermini suliaqarfimmi avataani atorfimmut nuussappat, suliaqarfitsigut kattuffia isumaqatigiissuteqarfigalugu pisinnaavoq, takuuk tjenestemandit pillugit inatsimmi § 15, imm. 2. Taamaattoqartillugu tjenestemandi atorfimmut ikkutissalluni aamma pisussaaffeqarpoq, suliaqarsinnaanermullu akissarsiat pissarsiarisussaangit. Kattuffik isumaqatigineqarsinnaanngippat, tjenestemandilu atorfimmik allamik tulluurtumik neqeroorfigineqarsinnaanngippat, atorfiup atorunnaarsinneqarnera pequtigalugu tjenestemandi soraarsinneqassaaq, ukiunilu pingasuni suliaqarsinnaanermut akissarsianik pissarsitinneqarsinnaatitaalluni (tamannali tjenestemandinut misilinneqartunut atuutinngilaq). Suliaqarsinnaanermut piffissaliussaq qaangiuppat tjenestemandi ukiut qulit sinnerlugit soraarnerussutisiaqarsinnaanermut katersisimappat, tjenestemandi soraarnerussutisiaqarsinnaatitaassaaq, tamatumalu kingunerissavaa soraarnerussutisiassanik immikkut akilernerqartariaqassalluni (tjenestemandi 60-inik ukioqalereersimanngippat).

Periarfissaasinnaavorli tjenestemandi atorfimmut allamut tulluutinngitsumut nuunnissaa pillugu isumaqatigiissusiorfigalugu. Taamaattoqartillugu soraarnerussutisiassanik tapiissuteqartitsisoqassaaq, taamaalilluni allanngineq

sioqqullugu tjestemandi amerlaqataanik akissarsiaqartinneqassaaq, atorfik ikinnerusunik akissaateqarfiuppat, takuuk tjestemandit pillugu inatsimmi § 56.

Ikaarsaarnermut aalajangersakkat

Ulloq 1. januar 2007 aallarnerfigalugu suliat aningaasarsianik akileraaruteqaataasussanut tunngasut tamarmik akisussaaffigineqarnerat Akileraartarnermi Pisorta qarfimmu nuunneqassapput. Sulianut maanna ingerlanneqartunut kommuninit akileraaruseriffiisa suli naammassisimannngisaanut aamma atuuppoq, 1. januar 2007 aallarnerfigalugu kommunit akileraartagernermut tunngasunik suliarinnittussanik sulisoqarunnaarsimasussaammata.

Taamattaq 1. januar 2007 aallarnerfigalugu maalaarutit Naalakkersuisunut ingerlanneqarsimasut Skatterådip ingerlatilissavai, tassalu suliassat suliarinissaannut Skatterådip akisussaaffinut tunngasuuppata. Taamaalilluni eqqarsaatigineqarpoq maalaarutit Skatterådimit tunniunneqarnerisigut maalaaruteqartut ajornerusumik inissinneqannginnissaat, taamaattumik akornutissaqassanngilaq Skatterådip oqartussaaffii akitsuutit pillugit maalaarutinik sammisaqartarnissaanut akisussaaffiit ukiut nikinnerinit atuutilersumik ilaneqassappata. Suliat Skatterådip akisussaaffinngisai Naalakkersut suliaruassavaat.

Siunnersuummi isumakkeerinninnissaq pillugu aalajangersakkat imarivait maanna aalajangersakkanut naleqqiullugit allannguutit arlallit. Allannguutit tassaapput qinnuteqartunut iluaqutitut akornutaasutullu sunniuteqarsinnaasut. Tamatuma nassatarisaanik siunnersuutigineqarpoq aalajangersakkat nutaat 1. januar 2007 kingusinnerusukkulluunniit qinnuteqartunut taamaallaat atuutissasut.

Akileraarutinut akiliivallaarsimanerit utertitsilluni akiliinissamut piffissarititaq sioqqullugu tunniunneqarsinnaannginerinik siunnersuummi siunnersuutigineqarpoq 31. december 2002-p siornatigut kommunalbestyrelsimut imaluunniit Akileraartarnermut Pisorta qarfimmu anngussimasunik nuussinernut atuunnissaa siunnersuutigineqarpoq. Siunnersuutip kinguneraa 1. januar 2003-p 31. december 2006-ip akornanni kommunalbestyrelsimut imaluunniit Akileraartarnermut Pisorta qarfimmu nalunaarutigineqartut inatsisip atuutilernerani atorusaanngitsutut isigineqassasut. Nuussiffigineqartulli aningaasat 1. januar 2007 sioqqullugu tigusani utertillugit akilissanngilai.

Tunniussinerit 1. januar 2003 sioqqullugu kommunalbestyrelsinut imaluunniit Akileraartarnermut Pisorta qarfimmu anngussimasut eqqarsaatigalugit, akileraaruseriffik 31. december 2007-ip kingorna tunniussisimaneq apeqqutaatinnagu tunniussisumut uterteqqiisinnaavoq imaluunniit akileraarutinik akilerneqarpallaarsimasunik tunniussisup pisasaanut pisussaaffeqalernini nalunaarutigisinnaavaa, akiliineq pisussaaffeqalernerluunniit utertitsilluni akiliinissamut piffissarititaq sioqqullugu pisimappat. Taamaalilluni 1. januar 2003 sioqqullugu nuussinerit akileraaruseriffiup imaluunniit Akileraartarnermut Pisorta qarfiup pisorta qarfiup tigusimasai ingerlatinnarneqassapput. Kisiannili akileraaruseriffik 1. januar 2008-miit akiliisinnaavoq imaluunniit pisussaaffeqalernmik nalunaaruteqarluni, nuussineq 1. januar 2003 sioqqullugu

nalunaarutigineqarsimagaluarpalluunniit. Piumasagaataavorli akiliineq pisussaaffeqalernerluunniit utertitsilluni akiliinissamut piffissarititaq sioqqullugu pisimassasoq.

Aningaasarsiornikkut allaffissornikkullu pisortanut sunniutissat

Akileraarnikkut akitsuusiinikkullu suliassat allanngortinneri qitiusumillu suliassanngorlugit nuunneri suliaavoq annertoq, aaqqissuussineq nutaaq inisseriarpat aatsaat tamakkiisumik sunniuteqartussa q kiisalu akileraarusersueriaaseq nutaaq atuutsinneqalерpat, taamallu sungiussiartornermi piffissap ingerlanissaa naatsorsuutigisariaqarluni.

Naatsorsuutigineqarpoq tamanna aatsaat pissasoq 2008 aallarnerfigalugu, ataanilu ingerlatsinermik qitiusumut nuussinermi kommunit Namminersornerullutillu Oqartussanut aningaasaqarnikkut kingunissaannik nalilersuinermi aallaavigineqassaaq 2008-mit aaqqissuussineq tamakkiisumik atuutsilerneqarnissaa.

Pisortat ataatsimut isigalugit ingerlatsinermik qitiusumut nuussinermi pissarsissuteqarnerunissaq pisariillisaanerlu eqqarsaatigalugit ukiumut iluanaarutit 15 mio. kr.-nik kinguneqassapput, agguataarnerini Namminersornerullutik Oqartussat 7 mio. kr. miisaat kommuninullu 8 mio. kr. Pissarsissutaasussat.

Aningaasarsiornikkut allaffissornikkullu pisortanut kingunissaat pingaarnernut arlalinnut agguarneqarsinnaapput.

1. Sulisut kommunini atorfillit Namminersornerullutik Oqartussanut nuunnissaanni kingunissat, ilanngunneqarlutik taakku malitsigisaannik sulisoqarnikkut aningaasartuutit, soorlu suliffimmu atillugu ineqarnermut aningaasartuutit, sulinngiffeqarnermi angalanernut akiliunneqarnerit, atorfinititaanermi aningaasartuutit, pikkorissarnernut aningaasartuutit, pequtit, suliffimmu atillugu angalanerit ilaallu ilanngullugit.

Akileraartarnermut akitsuusersuinernullu atillugu suli at ingerlanneqarnerisa qitiusumut nuunnerisa kingunerissavaat, Akileraartarnermi Pisorta qarfimmi maanna sulisut 37-niit 89-inut missaanniittunik ilaneqarnissaat, agguarneqarlutik qullersaqarfimmi Nuummilu nunap immikkoortortaani sulisut 65-it, kiisalu Qaqortumi, Sisimiuni aamma Ilulissani nunap immikkoortuini allaffinni ataasiakkaani inuit 7-nit 8-nut. Inuit amerlinerinut pequtaassaaq sulisut kommuninit Namminersornerullutik Oqartussanut nuunneqartut tamatumalu saniatigut nutaak atorfinititaasut. Nutaamik atorfinititsinerit tasaanerussapput kukkunersuinermut, inatsisilerinerimut aningaasarsiornermullu immikkut ilisamasalinnik atorfinititsinerit.

Namminersornerullutik Oqartussanut aningaasartuutaanerusut naatsorsuutigineqarput 26 mio. kr. missaaniissasut, agguarneqarlutik akissarsianut 18 kr. missaannik saniatigullu sulisunut aningaasartuutit 7 mio. kr. missaannut Aningaasartuutiginerusat kommuninut ataatsimoortumik aningaasaliissutit 25 mio. kr. missaannik ikilisinnerisigut pissarsiarineqassapput.

Assinganik kommunit ataatsimut isigalugit sulisutik inunnik 75-t missaannik ikilisissavaat kiisalu sulisunut aningaasartuutit tamakkununnga tunngasut taamatut ikilisinneqartussaallutik. Ataatsimut isigalugu kommunit ukiumut sipaarutissaat 25-30 mio. kr. missaaniissapput, tamannalu kommuninut aningaasaliissutit 25 mio. kr.-nik ikilinnerisigut pissarsiarineqassallutik.

Ingerlatsinermik qitiusumut nuussineq kommunit Namminersornerulutik Oqartussallu ataatsimut isigalugit 5 mio. Kr. missaat sipaarutigissavaat, Namminersornerullutik Oqartussat kommunillu akornanni agguarneqartussat.

2. Tapiliutit arlallit siunissami kommuninut nakkartarunnaarlutik landskarsimut nakkartalernissaasa malitsigisaanik aningaasarsiornikkut kingunerisassa.

Naatsorsuutigineqarpoq akileraartarnikkut akitsuusiinikkullu suliassat ingerlanneqarnerisa qitiusumut nuunnerinut atatillugu kommunit tapiliutinit, erniaanit, kiffartuussinnermi akiliutinit assigisaannillu isertitassat 20 mio. kr. missaat annaassagaat, 1. januar 2007-imit landskarsimut nakkartalertussaammata. Tamakku kommuninut taarsiutigineqassapput kommuninut aningaasaliissutit 20 mio. kr.-nik amerlisinnerisigut. Pineqartut tassaapput assersuutigalugu akileraarutit sinnerinut aamma akileraarutinut akilernerqarpallaartunut tunngatillugu tapiutit, selskabit akileraarutaannut tunngatillugu tapiutit kiisalu akiliutit allat arlallit.

3. Aningaasat kaaviiartinnerisa allanngortinnerisa malitsigisaannik aningaasanit tigorianaannit erniaat eqqarsaatigalugit, aningaasat siunissami kaaviiartinnerisa landskarsi aqqusaaqqaarlugu kommuninut apuuttalissapput, ullumikkutuunngitsoq nuna tamakkerlugu selskabillu akileraarutaat kommuni aqqusaaqqaarlugu landskarsimut ingerlasarlutik.

Aningaasat kaaviiartinnerisa allanngortinneqarneranni kommunit aningaasatigut annaasaqarnissaat naatsorsuutigineqanngilaq.

4. Akileraarutitigut kinguaattoorutit Namminersornerullutik Oqartussanit 1. januar 2007 isumagineqarnerat kommuniniit tiguneqarpat 15 mio. kr.-nik naleqarnissaa naatsorsuutigineqarpoq, ilimagisariaqarmat kinguaattoorutit ilaat pissarsiarineqarsinnaassanngitsut, soorlu akiliisinnaajunnaarnikkut assigisaatigullu.

Manna tikillugu annasaqaatit taakku kommunit Namminersornerullutik Oqartussallu angissusilerlugit naleqquttumik avittarpaat, soorlulu akileraarutitigut pissamaatit nalikillilerneqarsimasutigut isertitat tulluurtumik angissusilerlugit avittarsimagaat.

Annaasaqaatit tamakku siunissami landskarsip nammattalissavai, aammali isertitat pissarsiarisalerlugit. Tamakkununnga taarsiullugu kommuninut ataatsimut aningaasaliissutit 15 mio. kr.-nik ikilinneqassapput.

5. Qarasaasiatigut akileraarusereriaatsimut nutaamut taassumalu ineriartorteqqinnerinut aningaasartuutissat.

Akileraarutitigut akitsuusiisarnikkullu suliassat ingerlanneqarnerisa qitiusumut nuunnerini aningaasarsiornikkut tamakkiisumik sunniuteqarnissaat siunertaralugu akileraaruseeriaaseq nutaaq ineriartortinneqartussaavoq, 2006-imut aningaasanut inatsimmi 20 mio. kr.-nut angisusilerneqartut, ukiunut 2006 aamma 2007-imut avillugit.

Qarasaasiatigut akileraarusereriaatsimut ukiumut ingerlatsinermut, aserfallatsaaliinermut ineriartortitsinermullu ukiumut aningaasartuutit 500.000 kr.-ussasut naatsorsuutigineqarpoq.

Akileraartarnikkut suliassanik Namminersornerullutik Oqartussat ingerlatsileranni kommunit maanna qarasaasiatigut akileraarusereriaatsit ingerlakkunnaarlugillu ineriartortikkunnaassavaat.

6. Akileraartarnikkut akitsuusersuinikkullu suliassat ingerlanneqarnerisa qitiusumut nuunnerisigut pisortat akileraarutinit akitsuutinillu iluanaarutaat ukiumut 10 mio. kr. Missaaniinnissaat naatsorsuutigineqarpoq, tassalu ingerlatsinermik qitiusumut nuussineq tamakkiisumik iluarsineqarpat akileraarusersueriaatsillu nutaat atuullalereerpata.

Iluanaaruteqarnerussutit maannakkutut kommunit Namminersornerullutik Oqartussallu akornanni agguarneqartassapput, iluanaarutit 75 procentit missaat kommunit pissarsiarisassallugit, sinneri landskarsip.

Innuttaasut selskabillu sunniuteqarnerusumik assigiinnerusumillu aningaasarsiaannik akileraaruteqaataasussanik angissusilineq aqutigalugu iluanaaruteqarnerunissaq naatsorsuutigineqarpoq, akileraarutitigut qitiusumik suliarinninneq maannakkutut mikisunut agguataarneqarsimaneranut naleqqiullugu suliaqarfitsigut pitsaanerusumik pilersitsisinnaavoq atatitsiinnarsinnaallunilu, tamannalu aningaasarsiat akileraaruteqaataasussat iluameersumik angissusilerneqarnissaanut tunngaviusussaavoq.

7. Ingerlatsinermik qitiusumut nuussinermut atatillugu 2006-imi aamma 2007-mi aallartisarnermi ikaarsarnermillu arlalinnik aningaasartuuteqartussaavoq.

2006-imut aningaasanut inatsimmi ukiunut taakkununnga marlunnut aningaasartuutissat 5 mio. kr.-ussasut naatsorsuutigineqarpoq.

Namminersorluni inuussutissarsiuteqarnermik ingerlataqartunut aningaasarsiornikkut allaffissornikkullu kingunissaat

Akileraartarnikkut akitsuusiinikkullu suliassat allanngartisarnerat ingerlatsinerullu qitiusumut nuunneqarneri namminersorluni inuussutissarsiuteqarnermik ingerlataqartunut allaffissornikkut imaaliiallaannaq annertunerusumik kinguneqassanngilaq, akerlianilli siusinnerusoq isigalugu allaffissornikkut oqilisaanermik kinguneqartussaallutik, IT aqutigalugu akileraaruseeriaatsimi

siunertarineqarmat sukumiisumik nassuiaatit allallu tamarluinnangajammik qarasaasiakkut tunniunneqarsinnaalissasut.

Sulisitsisut A-skat pillugu nassuiaammik sukumiisumik tunniusisarnerisa siuartinneqarnissaat kiisalu piffissap akiliiffissap qaammatip naggataanit ulluisa 20-annut siuartinneqarnerata kingunerissavaa, sulisitsisut sulisumik akileraarutitigut akiliutaat maannamiit ullut 10-t missaannik sivikinnerusumik tiggummisalernissaat. Namminersorlutik suliffiutillit aningaasartuutissaat ukiumut 400.000 aamma 500.000 kr.-ussasut naatsorsuutigineqarpoq, aningaasat tigoriaannaat amigaatiginerini 5 procentinik erniaalersorneqarneri peqqutigalugit.

Allaffissornikkut innuttaasunut kingunissaat

Illoqarfinni nunap immikkoortortaani allaffilertussaangitsuni kommunip allaffiani ataatsimik amerlanernilluunniit sulisoqartussaavoq immersugassanik assigisaannillu innuttaasunut tunniussisartussanik kiisalu akileraaruseriffimmi attaveqarfisassanik innersuussisartussanik.

Siunertarineqarpoq nunap immikkoortuini allaffinni sisamaasuni tamani innuttaasut suliffeqarfiillu akitsuutinut akileraarnikkullu suliassanik nalinginnaasunik kiffartuussisoqarsinnaassasoq. Suliassat qaqutigoortut ajornakusoornersullu immikkut immikkoortortani suliarineqartassapput, tassani apeqqutit ajornakusoortut assigiisaartumik, sunniuteqartumik eqqortumillu suliarineqarnissaat qulakkeerneqassalluni.

Pisariillisaanissaq peqqutigalugu innuttaasut nunap immikkoortuini allaffiit sisamaasut arlaannut attuumassuteqassaaq, nalinginnaasumik innuttaasut najugaqarfiani. Aallaavittulli innuttaasut nunap immikkoortuini allaffiit arlaannut saaffiginnissinnaapput, soorlu allaffik innuttaasup suliffigisaanut qaninnermut. Taamaalilluni innuttaasoq akileraaruseriffimmut saaffiginninniarluni "angerlaqqaartariaqanngilaq".

Pinngitsoorneqarsinnaanngilarli akileraaruseriffimmik sunniuteqarnerusumik suliaqarfisigullu pitsaanagerusumik pilersitsinissap kissaatiginerani innuttaasut ilaat akileraaruseriffimmut qaninnermut ungasinnerulernissaannik kinguneqarsinnaammat. Innuttaasunik kiffartuussutsit ilaat siunissami ullukkornit ilisimasatsinnik allaanerusunut saaffiginniffeqalissapput, soorlu kommunini saaffiginnikkasuarfiit, nuna tamakkerlugu oqarasuaatikkut kiffartuussiviit, telefaxit kiisalu qarasaasiat.

Innuttaasut amerlasuut ullumikkut internetimut attavilersinnaapput, ukiunilu takkuttussani amerlinnissaat naatsorsuutigineqarpoq. Tamatumani eqqarsaatigineqassaaq Akileraartarnermi Pisortaqarfik ukiuni takkuttussani qarasaasiakkut imminut kiffartuussutaasinnaasunik pitsaangorsaarussamat, ilutigitiillugulu innuttaasut ilaat nammineerluni nalunaarsuisarnerat atorunnaarsinniarneqarmat, naatsorsuutigineqassaaq inuttut takkulluni akileraaruseriffimmut saaffiginnittut ikilingaatsiarnerinik kinguneqassalluni.

Akileraarutissanik annertussusiliinissaq eqqarsaatigulugu akileraaruseriffiup suliffeqarfimmik misissuina eqqartuussisut aalajangiinngikkaluartut ingerlanneqarsinnaavoq. Tamanna aamma inatsisit maannakkut atuuttut malillugit pisinnaavoq.

Taamatut misissuineq pisinnaavoq illuummi ininilu suliffeqarfimmik ingerlatsiviusumi. Suliffeqarfinni mikinerusuni amerlanertigut illuutit inuussutissarsiornermut tunngasortaa namminerisamullu tunngasortaa erseqqissumik avissaartinneqartanngillat. Pisuni taakkunani akileraaruseriffik illup ilaanut allaffissorfiusumut naatsorsuuserinermilu atortut toqqortarineqarfiannut isersinnaatigaavoq. Naatsorsuuserinermi atortut il.il. sulisup nammineq najugaaniippata, assersuutigalugu "ungasissumi sulinerup" kinguneranik, aamma akileraaruseriffik sulisup najugaata ilaani, naatsorsuuserinermi atortut assigisaasalu toqqortarineqarfianni misissuinissaminut periarfissaqarpoq.

Suliffeqarfimmut takuniaanissap pisariaqarnera naliliisuivinneq apequtaavoq. Suliffeqarfimmik takuniaanissaq pisariaqartutut nalilerneqarpat, anguniarneqassaaq nakuniaanermi inuussutissarsiummik ingerlataqartup ulluinnarni ingerlatsineranik ajoquserneqannginnissaa. Nalunaaqqarani suliffeqarfimmik takuniaaneq taamaallaat pissaaq misissuineri siunertarineqartoq suliffeqarfimmik siumoortumik ilimasaarereernerme maangaannartinneqarpat.

Naalagaaffeqatigiinnermut namminersornerunissamullu tunngasut

Siunnersuut naalagaaffeqatigiinnermut namminersornerunissamullu toqqaannartumik attuumassuteqanngilaq.

Siunnersuutilli siunertarivai pisariillisaanerit, sunniuteqarnerunerit kiisalu akileraarutit pisortat ingerlatsinerat pitsannorsarniarlugu, taamaaliornikkut namminersornerunissap ineriartortinneqarata tunngavissai pitsannorsarneqassammata.

Pisortanik kattuffinnillu tusarniaanerit

Siunnersuut ukununga tusarniaassutigineqarpoq, pisortaqaarfinnut tamanut, KANUKOKA, Kalaallit Nunaanni Sulisitsisut (GA), ILIK, Nunaqavissut Suliffiutillit Kattuffiat (NUSUKA), Sulinermik Inuussutissarsiuuteqartut Kaffuuffiat (SIK), KNAPK, Savaatillit Peqatigiit Suleqatigiissut (SPS), Atorfillit Kattuffiat (AK) aamma Illinniagartuut Kattuffiat /Akademikernes Sammenslutning I Grønland (ASG).

Tusarniaanermi oqaaseqaatit tiguneqarsimasut Akileraartarnermut Akitsuusiisarnermullu ataatsimiititaliamut ingerlateqqinneqarsimapput.

KANUKOKA-mit oqaaseqaatigineqartut immikkoortumi pisortat allaffeqarfiinut aningaasarsiornikkut allaffissornikkullu kingunissaanni immikkoortoq 5-imi oqaaseqatigiit kingulliit oqaasiliorneqarnerannik allannguuteqartitsivoq.

Aningaasaqarnermut Pisortaqarfimmit tusarniaanermut oqaaseqaatit immikkoortumi aningaasarsiornikkut allaffissornikkullu pisortanut sunniutissat allaaserineranni, aningaasatigut paasissutissiinernik aaqqiissuteqarnermik allannguuteqartitsivoq.

Tusarniaassutigineqartunit oqaaseqaatit allat siunnersuutigineqartumut allannguuteqartitsinissamik pisariaqartitsisimangillat.

Inatsisissatut siunnersuutip aalajangersagaanut ataasiakkaanut oqaaseqaatit

§ 1-mut

Aalajangersakkanut tunngasuupput pisortani akileraarutinik sunilluunniit ingerlatsinermi inatsit, takuuk inatsisit tunngaviusut § 43-anni oqariaatsip akileraarutip atorneqarnera. Taamaalilluni aalajangersakkami akissarsiat akileraarutaasussat kisimik eqqartorneqangillat, aammali akitsuutit, soorlu eqqussuinermi akitsuutit, eqquiniaanermi akitsuutit assigisaallu inatsisitigut pisortanut kiffartuussutit.

Ingerlatsinerup qanoq aaqqissuunneqarnissaa pillugu naleqqussaaneq, soorlu ingerlatsineq qitiusumit pissanersoq, imaluunniit nunap immikkoortuinit sinerissamit pissanersoq, aallaavittut naalakkersuisut susassaqarfigaat. Akileraaruseriffiup siunissami aaqqissuunnissaa pillugu naalakkersuisut pilersaarutaat nalinginnaasumik oqaaseqaatini, siunnersuutip immikkoortuini pingaarnerni eqqartorneqarput.

Oqariaatsimi akileraaruseriffimmi ingerlatsinerit tassaapput inatsisitigut immikkut naleqqussarsimangitsut. Oqariaatsimi ilaatinneqangilaq Skatterådi, naleqqussarnissaa kapitali 2-mi siunnersuutigineqarpoq (qangaanersoq akissarsiat akileraarutissat pillugit inatsisip § 115-iat).

§ 2-mut

Imm. 1-mut

Aalajangersakkami Skatterådip atunnera naleqqussassaaq. Isumannaatsuunissaq pequtigalugu siunnersuutigineqarpoq Skatterådip taamaallaat akileraaruseriffiup aalajangiigai pillugit maalaarutit aalajangernerini isumaginnissasoq, taamaalilluni Skatterådip suliaasat naleqqussagassatut ittut suliarisarunnaassallugit. Skatterådip akisussaaffiinit aamma ilanngunneqassapput akitsuutit pillugit maalaarutinik aalajangiinerit. Taamaalilluni akileraarnermi maalaarutinik suliarinnittarneq tulluarnerulissaa, innuttaasunut suliffeqarfinnullu paasiumarnerulerluni.

Skatterådip akisussaaffii maanna Skatterådiusumut naleqqiullugit killilerneqassasut siunnersuutigineqarpoq, Skatterådi nutaaq ingerlatseqatigiiffiit amigartoorutinik saqqummiussisarneri pillugit atuuttussamik siumut nalunaarfigineqartassanngimmat, takuuk akissarsiat akileraarutaasussat pillugit inatsisartut inatsisissaattut siunnersuut § 30, imm. 4. Atuuttussamik siumut nalunaarfiginnittarneq akileraaruseriffimmit isumagineqartalissapput, taassumi aalajangigai Skatterådimut maalaarutigineqarsinnaallutik.

Tamakku saniatigut Skatterådi akileraarutinik angissusiinermi atugassanik najoqqutassatut innersuussisarunnaassaaq. Taama najoqqutassatut innersuussineq Naalackersuisunut nuunneqassaaq, takuuk siunnersuutip § 21-at, imm. 3. Innersuussineq akileraartarnermi inatsini paasinninneq malillugu aalangiinerunngilaq, tamatumalu malitsigisaanik Skatterådimut maalaarutigineqarsinnaalluni.

Ingerlatsinikkut inatsisilerineq eqqarsaatigalugu akileraaruseriffiup aalajangigai Skatterådip akisussaaffiinit ilaapput. Assersuutigalugu tamakkununga ilaanngillat ilitsersuutit, innersuussutit apeqquteqaatinik akissuteqarnerit, ingerlatsinermi inatsisilerineq eqqarsaatigalugu aqutsinermi inatsisit tunngavigalugit aalajangigaanngippata.

Skatterådip ilaatigut maalaarutit makku suliarisinnaavai; akileraartussaataitanermut tunngatillugu aalajangernerit, akitsuuteqartussaananermut, siumoortumik nalunaarsuineq, akileraarutit amerlassusilerneri, akileraarnermi naatsorsuinerit, amigartoorutit annaasaqaatillu amerlassusilernerit, isumakkeerfigineqarnissamik itigartitaanerit kiisalu akileraartarnermut inatsisip § 30, imm. 4 malillugu atuuttussamik siumut nalunaarfigineqarnerni aalajangikkat.

Skatterådip akisussaaffiinit ilaassanngillat akileraaruseriffiup sulisui pillugit maalaarutit imaluunniit aqutsisut aalajangerneri sulisoqarnermut tunngasut pillugit sulisut maalaarutaat.

Skatterådip suliasai tassaapput akileraaruserinermi suliarinninnermi qitiusumik naammagittaaffiussaluni. Soorlu §1-imut oqaaseqaatini taaneqartoq oqaatsimut akileraaruseriffimmik ingerlatsinermut ilanngunneqannginneranut pissutaavoq, akileraaruseriffimmi ulluinnarni allaffissornikkut ingerlatsinissaq pillugu suliarinninnermi oqaatsip eqqortup atorneqarnissaanik pisariqartitsineq.

Imm. 2-mut

Akileraartarneq pillugu inatsisit malillugit pineqaatissiinernik arsaarinninnerlu suliat imm. 1-imi aalajangersagaq apeqqutaatinnagu Skatterådimut naammagittaalliutigineqarsinnaanngillat.

Tassunga taarsiullugu suliat taamaattut periutsit aalajangersimasut malillugit politiit aqqutigalugit eqqartuussivinnut suliasanngortinneqassapput.

Imm. 3-mut

Siunnersuutigineqarpoq erseqqissarneqassasoq sulianik ingerlatsinermi apeqqutinik

akileraaruseriffiup isummernerera aammalu tassunga atatillugu allagaatinik takunnissinnaanermut aalajangiinerit Skatterådmut naammagittaalliutigineqarsinnaassanngitsut.

Imm. 1-imi malittarisassaq pingaarneq aalajangersarneqarpoq, taassani akileraarutit pillugit inatsisinut atatillugu akileraaruseriffiup aalajangiinerinik naammagittaalliutit akileraaruseriffiup aalajangiiffigisassagai. Kisiannili sulianik ingerlatsinermit inatsisunik paasinnittarneq malillugu ilimagineqarpoq inatsisini aalajangersakkamik allaffissornermi ingerlatsiviup aalajangiineranik naammaagittaalliorsinnaatitaanermi akileraaruseriffiup sulianik ingerlatsineranik naammagittaalliutit taassuma ataani suliamik akileraaruseriffiup aalajangigaanik naammagittaalluiteqarnermut peqatigitillugit suliassanngortinneqanngikkaangata, imaluunniit suliamik aalajangiinerup imaanut pingaaruteqanngikkaangata, assersuutigalugu ataqqinnippalunnginneq imaluunniit suliap sularineqarnerata sivisussusia, Skatterådip aalajangiiffigisinnaassanngikkai.

Taamaalilluni akileraaruseriffiup pisinnaatitaaffii aamma Skatterådip pisinnaatitaaffii imaalillugit immikkoortinneqarput, aalajangiinivinnik naammagittaalliutit Skatterådip sularisinnaagai, tassungalu atatillugu sulianik sularinninnermut apeqqutinik assigisaannillu naammagittaalluiteqarnermi aalajangiiniviit inernerinik naammagittaalliutigineqartunut pingaaruteqartut. Skatterådi aammattaaq aalajangiinernut taamaattunut tunngatillugu allagaatinik takunnissinnaanermut akileraaruseriffiup aalajangiinerinik suliaqarsinnaavoq. Akerlianik sulianik sularinninnermi apeqqutinik assigisaannillu naammagittaalliutit aalajangiinivinnut naammagittaalliutinut atassuteqanngitsut assigisaallu inernerinut pingaaruteqanngitsut akileraaruseriffimmit sularineqassapput. Tamanna aamma atuuppoq apeqqutinut taamaattunut tunngatillugu allagaatinik takunnissinnaanermut aalajangiinerit.

Skatterådip aamma akileraaruseriffiup pisinnaatitaaffiinik immikkoortitsineq taanna pissusissamisoortutut isigineqartariaqarpoq, tassa aalajangiinerit pineqarmata ilaatigut missiliuvinerummata akileraaruseriffiup allaffissornikkut ingerlatsinerani suliassatut piukkunnarnerummata Skatterådip ingerlatsineranuunngitsaq. Aaqqissuusaanermi immikkoortumi allami sulianik kukkulluni sulariarfimmuunngitsumi sularineqarsinnissaat akileraaruseriffiup nammineq suleriaasiisa aaqqissuunneranni qulakkeerneqarsinnaavoq.

§ 3-mut

Skatterådi ullumikkut qulinik ilaasortaartoq, siunnersuutigineqarpoq arfineq marlunnik ilaasortaqaalissasoq Naalakkersuisunit toqqakkanik. Toqqartuisarnermi naatsorsuutigineqarpoq Naalakkersuisunut ilaasortaqaq akileraarutinik akitsuusinillu suliassaqaarfinnut akisussaasuusup toqqaasassasoq.

Skatterådip siulittaasua ukiunut sisamanut atuuttussaq Naalakkersuisut toqqartassavaat kiisalu SIK, AK, GA, KNAPK, ILIK aamma KANUKOKA'p innersuusuteqarnerisigut ilaasortat arfinillit taakkulu sinniisussaata taama

amerlatigisut toqqarneqartassallutik. Kattuffiit taakku arfinillit inuiaqatigiinni aningaasarsiornikkut inuussutissarsiornikkullu atugassarititaasut pillugit tamatigoortumik ilisimasaqarput, ilutigitillugulu kattuffiit maanna Skatterådimi peqataanermikkut akileraaruserinermi ajornartorsiutinik sammisaqartarneq ilisimasaqarfigillualersimavaat.

Inatsisip 1. januar 2007 atuutilernera ilutigalugu Skatterådip atuuffia siulleeq aallartissaaq. Taamaalilluni maanna Skatterådiusup atuuffia naammassissaaq 31. december 2006.

Skatterådimit siulittaasumik toqqaanermi siulittaasup akileraartarnermi ilisimasai pingaartineqassapput, taassumalu nalinginnaasumik tusaamaneqarnera, soorlu pineqartoq nalinginnaasumik ataqqineqarnera. Ilaasortat sinnerinik toqqaanermi kattuffiit inassuteqarsinnaatitaasut inassutigisaat malinnissaannut Naalakkersuisut pituttorsimassanngillat, pisulli eqqarsaatigalugit kattuffiit allanik inassuteqaqqullugit piunaffigisinnaavaat. Allanik inassuteqarnissamik piunasaqarfigineqarneq kattuffiit malikkusunngippassuk Naalakkersuisut ilaasortamik ataatsimik sinniisussamillu ataatsimik toqqaassapput.

§ 4-mut

Imm. 1-mut

Skatterådip nammineq aalajangersinnaavaa ilaasortanngortoq piffissaq eqqornagu nammineerluni nalunaarummik nassiussisimangippat suliasaminut tulluutinngitsutut nalilersinnaallugu, soorlu ingerlatsinermut naatsorsuutinik imaluunniit akitsuutit pillugit nalunaarutit, piffissaq eqqorlugu akileraarutinik akitsuutinillu akiliisimangippat, A-skat-inik ilanngaanissamut pisussaaffimminik eqquutitsisimangippat, piffissaq eqqorlugu A-skat-inik naatsorsuutinik nassiussisimangillat akiliisimangippalluunniit imaluunniit akileraartarneq pillugu malittarisassanik unioqqutitsisimaneq peqqutigalugu pineqaatissinneqarneq akuerisimappagu pineqaatissinneqarsimappalluunniit. Tamatumunnga atatillugu Skatterådip akisussaaffii aalajangersakkami sukumiisumik nassuiarneqarput.

Tassunga atatillugu Skatterådip akisussaaffiunut ilaapput akileraatarnermut inatsimmi malittarisassanik unioqqutitsisarnerit nalinginnaanerusut.

Imm. 2-mut

Naalakkersuisut toqqaasarnermi oqartussatut aalajangissavaat, taaneqartut saniatigut, ilaasortaq allanik peqquteqarluni suliarititamik isumaginninnissaminut tulluutinngitsoq isummerfigalugu, soorlu pilerluttulerinermik inatsisinik unioqqutitsineq peqqutigalugu inaasortaq pineqaatissinneqarluni eqqartuunneqarpat.

Imm. 3-mut

Skatterådimit ilaasortaq suliarititamik isumaginninnissaminut tulluutinngitsutut nalilerneqaruni pineqartoq Skatterådimit tunuassaaq.

Imm. 4-mut

Tamakku saniatigut Naalackersuiusut ilaasortap piumasaqarnera malillugu akuersisinnaapput pineqartoq Skatterådimit tunuarsinnaasoq, ilaasortaq peqqiilliornermik, pisortanit allamik suliaqartitaanermik, niuerneramik inngerlataqarnermik assigisaannillu pissuteqarpat. Taamaattoqarput ilaasortamik allamik toqqaasoqassaaq. Pissusissamisoortumik pissuteqarnertut isigineqarpoq assersuutigalugu ilaasortap Inatsisartunut qinigaanera, taassumalu kinguneranik inatsisiliortunut peqataalerluni.

Imm. 5-mut

Ilaasortaq Skatterådimit tunuarpat atuuffissap sinneranut § 3, imm. 2 aamma 3-mi aalajangersakkat naapertorlugit ilaasortamik nutaamik toqqaasoqassaaq.

§ 5-mut

Aalajangersakkap tunngavigaa inatsisartut akileraartarnermut inatsisaat § 115.

Imm. 1-mut

Siunnersuutigineqarpoq Skatterådi Skatterådimit ilaasortat akornanni siulittaasup tullinik marlunnik qinersissasoq. Qinersinissamut malittarisassat Naalackersuisut suleriaasissaasa ilaanni aalajangersagaavkoq, tak. imm. 6.

Imm. 2-mut

Skatterådi aalajangiisinnatitaanngilaq siulittaasoq minnerpaamillu siulittaasup tulliaa aappaa aalajangiinermi peqataatinnagu. Taamaatut pisoqassagalarpat aalajangiineq atortussaassanngilaq.

Imm. 3-mut

Skatterådi tamarmiusoq aalajangiisinnatitaassappat Skatterådimit ilaasortat ikinnerpaamik affaat taakkuluunniit sinnisaat aalajangiinermi peqataassapput. Aalajangiinerit amerlanerussuteqarnikkut aalajangerneqartarput. Taasisut amerlaqatigiittillugit siulittaasup, imaluunniit siulittaasoq peqataatinnagu siulittaasup tulliaa siulliup, aalajangiinera aalajangiisuusaaq. Siulittaasoq imaluunniit siulittaasup tullia siulleq peqataatinnagu siulittaasup tulliaa aappaata aalajangiinera aalajangiisuusaaq.

Imm. 4-mut

Eqaatumik pilertortumillu suliarinnittarnissaq siunertaralugu siunnersuutigineqarpoq Skatterådi aalajangiisartunut avinneqarsinnaasut ikinnerpaamik pingasunik ilaasortalinnik, taakkunannga ataaseq siulittaasuussalluni siulittaasulluunniit tullia. Agguarnertut taamaattunut ilaasortat tamarnik piumasaqarsinnaapput suliarineqartoq Skatterådimit tamarmiusumut aalajangiiffigisassanngorlugu saqqummiunneqassasoq.

Imm. 5-mut

Aalajangiisussatutut immikkoortut aalajangiisinnaassuseqassappata ikinnerpaamik Skatterådimit ilaasortat pingasut aalajangiinermut peqataassapput. Aalajangiineq

amerlanerussuteqarnikkut aalajangerneqassaaq. Taasinerit naligiitsillugit Skatterådi tamarmiuserneq aalajangiissaaq.

Imm. 6-mut

Siunnersuutigineqarpoq Skatterådip suleriaasissaa pillugu Naalakkersuisut nalunaarusiussasut. Suleriaasissami ilaatigut ataatsimiigiasuisarnerit, imaqarniliornerit, maalaarutit oqaasiinnakkut saqqummiunneqarsinnaaneri, siulittaasumik kiisalu siulittaasup tullianik siullermik aappaanillu qinerisisarnerit pillugit malittarisassat aalajangersarneqassapput.

Imm. 7-mut

Naalakkersuisut Skatterådi allattoqartoqarnikkut ikiussavaat. Nalinginnaasumik akileraaruseriffik Skatterådimumt ikiortaassaaq, sulinerup aningaasaqarnikkut pileraarusiornerani iluaqutaasussatut isigineqarmat. Pisortani akileraaruseriffik kisimi suliaqarfisigut piginnaasaqarfiuvoq, Skatterådip pitsaasumik kiffartuunnissaanut qulakkeerinnissinnaasumik. Oqaaseqaatit nalinginnaasut innersuussutigineqarput, inatsisissatut siunnersuummi immikkoortut pillugit immikkoortoq.

Allattoqarfik Skatterådimumt kiffartuussinermini Naalakkersuisunut attuumassuteqanngilaq, taamaaliornikkut pisortaqarfiup aqutsisui sulisulluunniit allat allattoqarfik Skatterådimumt ingerlateqqitassaannik aalajangersimasunik inassuteqarfigisinnaanagu. Aalajangersakkap siunertaraa pissutsit tunngavigalugu innuttaasut sapinngisamik pitsaanerpaamik inatsisinit illersorneqarnissaat qulakkeerneqarnissaa.

§ 6-mut

Akileraaruseriffiup Skatterådillu akornanni akisussaaffiit § 6-ip naleqqussassavai. Siunnersuut malillugu akileraaruseriffiup suliat Skatterådip sammisami tassani aalajangiutereersimasai pillugit aalajangiiffigisinnaanngilai. Suliaq Skatterådip aalajangiiffigereersimasaa taamaalilluni maalaaruteqartup akileraaruseriffiulluunniit aallaqqaataanit allartissinnaanngilaq. Akerlianik maalaaruteqartup akileraaruseriffiullu suliap aalajangerneqarnissaa misilikkusukkunik Skatterådip aalajangereersimasaa eqqartuussivimmuut ingerlatissinnaavaat.

§ 7-mut

Sulianik samminnittarneq pillugu inatsisip kapitalia 2 malillugu akileraartarnermi akitsuusersuinermilu oqartussaasut arlaannut attuumassuteqannginnissaat pillugu immikkut malittarisassat nalinginnaasut aalajangersakkap tapertalerpai.

Akileraaruseriffimmi atorfeqaraanni Skatterådimumt aamma ilaasortaasoqarsinnaanngitsoq aalajangersakkami naqissusigaavoq.

§ 8-mut

Pisinnaatitsinikkut qularnaarneqarsinnaavoq innuttaasut suliffeqarfilla immersugassanik kommunip allaffianut saaffiginninnikkut pissarsisinnaajuarnarat, soorlu siumut nalunaarsuinerit eqquiniaanermilu akitsuutit pillugit immersuiffissanik aallersinnaanikkut, tassanilu akileraaruseriffimmut saaffiginnissuteqarsinnaanermut ikiorserneqarnikkut. Aalajangersakkap kingunerissanngilaa kommunit akileraartarnermut sulianik sunilluunniit aalajangiisinaanissaat. Assersuutigalugu siumut nalunaarsuinerup allanngortinnissaa akileraaruseriffimmut isummerfigeqqullugu saaffiginnissutaasinnaavoq. Taamaalilluni Naalakkersuisut suliassat kiffartuussinerunerusut kommuninut imissutigisinnaavaat.

§ 9-mut

Aalajangersagaq ilaatigut inatsisartut aningaasarsianit akileraarutit pillugit inatsisaanni § 120-p aamma nioqqutissanik eqqussuineq avammullu tunisineq pillugu inatsisaanni § 43-p nanginneraa. Taassuma saniatigut raajanut akitsuutit pillugit ataatsimiititaliami ilaasortat raajanut akitsuutit pillugit inatsimmi § 17-imi nipangiussisimasussaataaneq pillugu immikkut aalajangersagaqarpoq.

Siunnersuutigineqartumi § 9-mi akileraaruseriffimmi immikkut sakkortunermillu nipangiussisimasussaataaneq nanginneqarpoq. Aalajangersagassatulli siunnersuutit aamma nassatarissavaat nipangiussisimasussaataanerup atorsinnaanerata annertusinerat, taamaalilluni akileraartarnermut inatsimmut tamarmut atuutilissalluni, taamaallaat akileraartarneq ataatsimut isigalugu inatsisiloorfiusimanngitsut pinnagit. Taamaalilluni ilaatigut akiliisitsiniartarnermut suliaqarfiit iluaniinngilaq, tassani manna tikillugu nipangiussisimasussaataaneq sulianik suliarinnittarneq pillugu kiisalu pinerluttulerinermut inatsimmi aalajangersakkat nalinginnaasut suli naleqqussarneqartassallutik.

Nipangiussisimasussaataanerup atunernerani allannguutissatut siunnersuutip kingunerissavaa, inuit inuttut inatsisilerinikkulluunniit akisussaasut aningaasarsiornikkut, inuussutissarsiornikkut imaluunniit inuttut inuunera pillugu pissutsit akileraaruseriffiup akitsuutit pillugit inatsimmi ingerlatsinikkut nakkutilliinikkullu kisimi pissarsiarisimasai aalajangersakkamitassami nipangiussisimasussaataanerup malittarisassanut ilaassalluni. Ilaatigut kingunerissavaa paasissutissat sunilluunniit imaqaraluarpata paasissutissanut taamaattunut suliaq pillugu nalinginnaasumik paasiniaasoqarsinnaanani, takuuk pisortat ingerlatsinerat pillugu inatsisartut inatsisaat § 14.

Aammattaaq aalajangersagaq aamma Skatterådip ilaasortaanut taakkualu sinniisuiut atuuttussanngorlugu annertusineqassaaq. Tassani erseqqissarneqarpoq ilaasortat taakkualu sinniisui aamma Skatterådimi ilaasortat imaluunniit taakkua sinniisui sulianik ingerlatsinerminni paasissutissat pissarsiatik pillugit annertusisamik nipangiussimasussaataasut.

Nipangiussimatitsisussaataanerup annertusisap kinguneraa, paasissutissat allanut ingerlateqqitassaangitsut inunnut ingerlateqqinneqassangitsut, suliani aalajangiiffigineqartuni illuatungerisat eqqaassanngikkaanni. Tunngavigineqassaaq akileraaruseriffiup paasissutissanik pisortani oqartussanut allanut ingerlatitseqqittarnerat, soorlu akileraaruseriffiup iluani paasissutissanik ingerlatitseqqittarneq, sulianik samminnitarneq pillugu inatsimmi aamma siunnersuutip § 69-iani tamakku malittarisassanut nalinginnaasunut ilaatinneqassammata. Taamaalilluni akileraaruseriffik qarasaasiakkut toqqaannartumik sulisunut attaviliisinnaavoq, innuttaasunillu kiffartuussinermi qarasaasiakkut kiffartuussineq annertusarsinnaavaat.

Annertusisamik nipangiussimatitsisussaataanermik aalajangersagassatut siunnersuummik unioqqutitsineq Kalaallit Nunaanni pinerluttulerineq pillugu inatsimmi § 29 malillugu malersorneqassaaq. Taassuma kinguneraa piaaraluni unioqqutitsinerit kisimik pineqaatissiinermik kinguneqassasut.

§ 10-mut

Siunnersuutigineqarpoq katissimallutik aappariit imaluunniit avissimasut akileraaruseriffimmut saaffiginnereernerminni aapparisami nammineq nalunaarsuutai ukiumilu akissarsiffiusumi akissarsiat tagginneri, aappariissimanermi nalaani, pillugit paasissutissanik tunniussisinnaammat. Paasissutissanik pissarsisinnaanermi pineqarput paasissutissat suulluunniit nammineq nalunaarsuutitut akileraarutissanillu taggissinernut attuumassuteqartut, aappariit immikkut pigisaqarsimagunik assigisaalluunniit apeqqutaatinnagu. Aalajangersakkami erseqqissaatigineqarpoq pisuni taamaattuni akileraaruseriffik paasissutissanik ingerlatitseqqippat nipangiussimasussaataanermik unioqqutitsinerunngitsaq.

Piffissaq averuserfik avinnerluunniit akileraaruserineq eqqarsaatigalugu inooqatigiikkunnaarnertut isigineqarpoq. Akuerineqarluni averuserneq avinnerluunniit ulloq akuerineqarfik atuuppoq, eqqartuussivimmi aalajangiinikkut averuserneq avinnerluunniit ulloq eqqartuussivimmi aalajangiiffik atuuppoq.

Averusernani avinnaniluunniit inooqatigiikkunnaarnermut aallaaviusumik piunasaqataavoq aappariit isumaqatigiikkunnaarnerisigut inooqatigiikkunnaartoqarnera. Piunasaqaat eqqortinneqassanngilaq aappariit taamaallaat inuussutissarsionertik pissutigalugu inooqatigiinngippata. Aammattaaq tassani atuuppoq aappariit aappaa pineqaatissinneqarluni sivisunerusumik parnaarussaappat. Akerlianik aapparisaq plejehjemmimut nuuppat akileraaruserineq eqqarsaatigalugu aappariikkunnaarnernut isigineqassaaq.

Averusernerup kingorna inooqatigeeqqilerneq aamma akileraaruserineq eqqarsaatigalugu piffissami tassani inooqatigeeqqilernertut isigineqassaaq. Avereernerup kingorna inooqatigeeqqilerneq aappariissimasut kisermaatut akileraartassapput.

§ 11-mut

Aalajangersagaq pisortat sulianik ingerlatsinerat pillugu inatsisartut inatsisaanni illuatungeriinnik tusarniaaneq pillugu malittarisassanut ilassutaavoq.

Imm. 1-mut

Imm. 1 malillugu akileraaruseriffik aalajangiinissaq sioqqullugu suliamik allaaserinnittussaavoq. Taamaalilluni aalajangiinernik sulianut Skatterådimit saqqummiussassanut, kiisalu siusinnerusukkut aalajangiinerit allanngortinneranni, taassuma ataani akitsuutit annertusiliinerni, aammalu akileraartarneq pillugu inatsit malillugu pineqaatissinerni suliani suliamik allaaserinnittoqassaaq. Imm. 1-imi suut pineqarnerinik allaaserinninneq sukumiisuunngilaq.

Aalajangiisoqartinnagu suliami illuatungerisanut oqaaseqaateqarfigisinnaanngorlugu nassiussamik suliamik allaaserinnittoqanngippat suliamik suliarinninnermi annertuumik kukkusoqassaaq, taassumalu aalajangiinerup atortussaannginnera kingunerissavaa, kisiannili takuuk imm. 2 pillugu ataani allaaserisaq.

Ingerlatsinermi aalajangertakkat ingerlatseriaasivimmilu killiliinerit, aalajangiinerit, qularnaquteqalersinnaapput. Ingerlatsinikkut aalajangikkat inatsisilerinermi suliatut nassuiarneqakkajupput, tassa imaappoq oqaaseqaatip siunertaralugu, pisumi pineqartumi suna eqqortuunersoq eqqortuussanersorluunniit, takuuk pisortat ingerlatsinerat pillugu sulianik samminnittarnermi inatsisartut inatsisaat § 2 aamma aalajangersakkanut oqaaseqaatit. Taamaalilluni assersuutigalugu "kingumut taggissinerit", akileraaruseriffiup akitsuuteqartussanngortunut nassiussaat, ingerlatsinermi aalajangikkatut nalilerneqassanngillat.

Imm. 2-mut

Akileraaruseriffik suliamik saqqummiussinngitsoorsinnaavoq, aalajangerneq sammisami illuatungeriit piunasaqarnerisigut aalajangigaasimappat, aalajangernerlu piunasaqaammut tamakkiisumik naapertuuppat imaluunniit suliami illuatungerisat akileraaruseriffiup aalajangiinerat isumaqataappata. Tamannali atuussinnaanngilaq aalajangerneq arlalinnut attuumassuteqarpat, tassani aalajangiineq tamanit isumaqatigineqarani.

Imm. 3-mut

Suliamik saqqummiussinermi imm. 3 naapertorlugu paasissutissat tassaassapput paasissutissat suliamik saqqummiussinermi minnerpaamik imarisassai. Suliamik saqqummiussinermi ilaatigut paasissutissiissutigineqassapput aalajangikkat akileraaruseriffiup paasissutissanik pigineqartunik kinguneqartussatut paasissutissiissutai. Suliamillu saqqummiussinerni naliliinermut tunngavilersuutit inaqassapput.

Suliamik allaaserinninneq minnerpaamik ukuninnga imaqassaaq:

- Aallaqqaasiut aamma suup pineqarneranik paasissutissat.
- Akileraaruseriffiup allannguutissatut siunnersuutaa/kisitsisinik naatsorsuineq.

- Suliami pissuvinnik allaaserinninneq.
- Allanguummut akileraaruseriffiup tunngavilersuutaa.
- Illuatungerisat paasinninnerat tassungalu tunngavilersuutit.
- Akileraaruseriffiup inaarutaasumik inerniliinera/aalajangiinera.

Tunngaviusumik piumasaqaatit saniatigut pingaartuuvoq suliap allanut attuumassuteqarani allaaserineqarnissaa, suliallu ataqatigiisumik atuarneqarsinnaanissaa, taamaalilluni illuatungerisat immaqalu Skatterådip annertunerusumik paasissutissinneqanngikkarlualutik suliap imaanik pasinnittussanngorlugit.

Suliamik allaaserinninneq uppernarsaataavoq aqqissuutaq. Assersuutigalugu illuatungerisat isummanik tunngavilersuutinillu nutaanik saqqummiippata taakku ilanngunneqassapput. Aammattaaq illuatungerisat oqaaseqaataat aqqissuullugit ilanngunneqassapput, aammattaaq assersuutigalugu pissusiviit pillugit kukkunerit takutinneqarsinnaasut.

Suliamik allaaserinninneq suliap pissusaanut naleqqussarneqassaaq, taamaalilluni suliamik allaaserinninneq suliani annertunngitsunik ajornartorsiorfiusuni imaaluunniit akerliuffigineqarsinnaanngitsuni tamakkiisumik tunngavilersuinertut killilerneqarniassamat. Suliamik allaaserinninneq, tunngavilersuinissamik piumasaqaat malinneqarpat, naatsusinnaavoq.

Akileraaruseriffiup tunngavilersuutaani inatsiseqarnikkut malittarisassat aalajangiinermi tunngaviusut innersuussutigineqassapput, assersuutigalugu oqaaseqatigiit aalajangersimasut issuarnerisigut. Malittarisassat atorneqartut qanoq paasineqarnissaanik illuatungerisat paasinninnissat qulakkeerniarlugu pisariaqarsinnaavoq oqaatsit nalinginnaasut atorlugit malittarisassap qanoq paasineqarnissaata nassuiarnissaa. Inatsisitigut qanoq paasinninnissaq imaluunniit akileraaruseriffiup suliami tunngavilersuutissatut isumaa nalornissutigineqarpat, qanoq paasinninnissaq akileraaruseriffiup annertunerusumik nassuiassavaa. Tamanna ilaatigut pisinnaavoq inatsisit suliarinerinut, kaajallaasitanut peruserineqartartunillu innersuussinikkut. Inatsisit tunngavigalugit periutsip kinguneraa illuatungerisanut iluaqutaasinnaasunik innersuussinissamat akileraaruseriffiup aamma pisussaaffeqarnera.

Nalilersuinermit atatillugu akileraaruseriffiup qulakkiissavaa nalilersugassanik aalajangiinermi suut pingaartillugu aalajangiisuusinerisa erseqqarilluatumik allassimanissaat. Tassa imaappoq oqaatsit nalinginnaasut atorlugit allaaserineqassaaq nalilersuinermit suut pingaartinneqarsimanersut.

Aammattaaq tunngavilersuut pissusivinnik aalajangiinermi pingaartinneqarsimasunik pisariaqartillugu nassuiaammik naatsumik imaqassaaq.

Imm. 4-mut

Suliamik saqqummiussinermi illuatungeriit oqaaseqartinneqartussaapput, suliaq unitsiinnarsimanngikkunikku.

Suliami kikkut illuatungeriinersut akileraaruseriffiup tamatigut ilisimasanngilai, assersuutigalugu nammineerluni nalunaarsuut pissuseq ataaseq paasinarsinnaavoq akileraartussaataasup saniatigut aamma allamut tunngasuusoq, tassungalu suliaq saqqummiunneqarluni. Taamaammat suliami illuatungeriit paasissutissaataat akileraaruseriffiup pissarsiarisimasaat tunngavigalugit illuatungeriinnik tusarniaasariaqartarpoq. Apparisamut immikkut nassiussineq pisariaqartanngilaq, taakkua tamarmik najugarisami ataatsimi inuit allattorsimaffiat malillugu nalunaarsorsimagaangata.

Imm. 5-mut

Suliamik saqqummiussineq pillugu tusarniaanermi akileraaruseriffik imm. 5 naapertorlugu nalunaaruteqarsinnaavoq suliaq suliamik saqqummiussineq tunngavigalugu suliarineqartoq aalajangiiffigineqartorlu, tusarniaanissamut piffissaliussaq sioqqullugu pineqartoq allakkatigut oqaasiinnakkulluunniit aalajangiussaq pillugu tunngavilersuutitalimmik akerliliisimangippat.

Imm. 6-mut

Akileraaruseriffik tunngavissaqartumik aarlerissutissaqaruni, aalajangiiffigisaq akileraarutissaminik akileerusussanngitsoq, allannguutissatut eqqarsaatigisat taassuma ilisimalersimagunigit, imm. 4 aamma 5-imi piffissaliussatut aalajangigaq sivikinnerusoq aalajangersinnaavaa. Suliami illuatungiliuttut suliamik saqqummiussinerup tigoreerneranit piffissaliussaq ullunik 3-nik sivikinnerusinnaanngilaq.

Aalajangersagaq akiligassanik kinguaattoornissamik pitsaaliuisuuvooq, assersuutigalugu atorneqarsinnaavoq, akiitsulik ilisimaneqartoq nuna qimalersaarlugu nalunaarpat, nunamilu maani pigisaminik tuniniaassalluni ilimagineqarpat. Aalajangersagaq immikkut pingaaruteqalersinnaavoq akileraaruseriffik illoqarfinni aalajangersimasumik sinniisoqarfiginngisamini tikeraaraangat.

Siunnersuut § 29-mut siunnersuummut atatinneqassaaq, taamaalereerpat akileraarutitut tapissat assigisaallu akilernissaannut piffissaliussat naallisinneqarsinnaallutik.

§ 12-mut

Aalajangersagaq ilaatigut akileraartarnermut inatsisip § 55, imm. 5 aamma 6-ip nanginneraa. Aalajangersakkamut akitsuusiinerup ilanngunneqarnissaa siunnersuutigineqarpoq.

Imm. 1-mut

Aalajangersagaq malillugu akileraaruseriffik pisortat ingerlatsineranni sulianik samminnittarnek pillugu inatsisartut inatsisaanni malittarisassanik naliginnaasunit annertunerusumik innuttaasumik suliffeqarfimmilluunniit aalajangiinnermut attuumassuteqartumik aalajangiinnnginnermini tusarniaasinnaavoq. Tusarniaaneq pereersut pillugit allagaqaatiginerisigut pisassaaq.

Pisortat sulianik suliarinnittarnerat pillugu inatsit malillugu pisorta qarfik aalajangiinnginnermini aallaaviusumik tusarniaassaaq, ilimagineqarpat illuatungerisap ilisimagaa pisorta qarfik suliami pissusiviit pillugit paasissutissanik pigisaqartoq, paasissutissallu suliami aalajangiinermi pingaaruteqarluinnartut illuatungerisamullu pineqartumut ajoqutaasinnaasut. Tusarniaasussaataaneq nalinginnaasoq taanna akileraartitsisarnermi atuutissasoq siunnersuutigineqarpoq aalajangiinnginnermi pinngitsoorani tusarniaanissamik ilallugu.

Inatsimmi aalajangersakkami taamaallaat piumasaqaataavoq illuatungerisat annertussusiliiniarnermik ilisimatinneqassasut. Ilisimatitsissutip taassuma qanoq imarnissaanik annertunerusumik piumasaqaateqanngilaq. Kikkulluunniit pingaarutilimmik, toqqaannartumik immikkullu aalajangiinermut inatsisitigut soqutigisallit tusarniaaffigineqassapput. Aapparissamut immikkut nassiussinngitsoortoqarsinnaavoq aappariit inuit allattorsimaffianni assigiimmik najugaqarfeqarpara. Suliami kikkut peqataanersut akileraaruseriffiup tamatigut ilisimasanngilaa, assersuutigalugu nammineerluni nalunaarsuut pissuseq ataaseq paasinarsinnaavoq akileraartussaataasup saniatigut aamma allamut tunngasuusoq, tassungalulu suliaq saqqummiunneqarluni. Taamaammat suliami peqataasut pillugit ilisimasat tunngavigalugit akileraaruseriffik tusarniaasariaqarpoq.

Imm. 2-mut

Tusarniaanermi akileraaruseriffiup nalunaarutigissavaa aalajangiineq ilimasaarutitut pissasoq, tusarniaanermi piffissaliussap naannginnerani pineqartoq allakkatigut oqaasiinnakkulluunniit tunngavilersuuteqarluni aalajangiinermut akerlilinnngippat.

Aalajangiiniarnermik allaaserisaq illuatungerisat oqaaseqaateqarfigippassuk, aalajangiineq pillugu allakkatigut ilisimatinneqassapput. Taamatuttaaq atuuppoq, imm. 3 malillugu, allannguummik isumaqatigiinneq aalajangiiniarnermik allaaserisaq nassiunneqarsimannngippat.

Akileraartussaataasooq aalajangiiniarnermik allaaserisaq oqaaseqaateqarfigisimannngippagu akileraartussaataasooq taamaallaat nutaamik annertussusiliiffigineqassaaq.

Imm. 3-mut

Akieraaruseriffik tusarniaannngitsoorsinnaavoq suliami illuatungeriit piumasaqarnerisigut aalajangiisoqarpat, piumasaqarnerlu akileraaruseriffiup akuerisinnaappagu imaluunniit akileraaruseriffik suliamilu illuatungeriit aalajangiinermut isumaqataappata.

Aalajangersakkap siunertaraa suliami illuatungerisat akileraaruseriffiup tamakkiisumik akuerisinnaanngissaanik qinnuteqaateqarnissamik isumaqatigiinneranni piumasarneq tunngavigiinnarlugu akileraaruseriffiup suliami suliamik saqqummiussassamik suliaqarnissaanik piumasaqarfigineqarnissaata pinngitsoortinnissaa.

Aalajangersakkap akileraartarnermut inatsimmi §§ 47 aamma 48 tunngavigaa.

Imm. 1-mut

Akileraaruseriaatsip akissarsiat akileraarutinillu akiliineq ataatsimoortippai. Akileraarutip ukiup akileraarfiup (akileraarutaagallartut) ingerlanerani akileqquneqartut, akileraarutinillu akiligassaasut assigiinnissaat qularnaarniarlugu, taarsiutissaatut siunnersuutigineqarpoq akileraarutissat siumut nalunaarsorneri akileraaruseriffimmut inissinneqassasut.

Imm. 2-mut

Akileraartussaaitat isertitaat akileraarutissat taggissinerit siumullu nalunaarsuineq pillugit paasissutissat kingulliit tunngavigalugit aalaavittut siumut nalunaarsuineq pisassaaq. Taamaalilluni siumut nalunaarsuinerup ukiut siuliini nammineq nalunaarsorsimasat taggissinerillu aallaavigissavai.

Akileraaruseriffiup siumut nalunaarsuineq paasissutissat kingullermik tagginneqartut imaluunniit siumut nalunaarsuinerit kisiisa pituttorsimaffigissanngilai, taamaattorli siumut nalunaarsuinerit atatillugu akit, akissarsiat, il.il. nalinginnaasumik qanoq allanngoriartornerat eqqarsaatigisinnaallugu, tamannalu akileraartussanut namminneq suliffeqarfimminnik ingerlatsisunut pingaartumik attuumasinnaalluni. Taamaalilluni akileraaruseriffik akileraartussaaitanut tamanut imaluunniit akileraartussaaitat immikkoortuinut aningaasarsianik procentinngorlugu qaffaasinnaavoq appaasinnaallunuunniit. Siumut nalunaarsuineri naleqqussaannerit atatillugu akileraartartut akileraarutinik tapiisussat utertoortussalluunniit amerlassusiinik ikilisaacaqataasinnaallutik.

Imm. 3-mut

Tamakku saniatigut siunnersuutigineqarpoq akileraaruseriffiup akileraartussat ataasiakkaat siumut nalunaarsuussinnaavai isertitassatut naatsorsuutigisat aallaavigalugit, paasissutissat tunngaviusinnaappata akileraartussap ukiumut akileraarfiusumi isertitai kingullermik taggissinerit siumulluunniit nalunaarsuinerit allaanerungaassasut isumaqarfigineqarpata.

Pingaarnersiunermik tunngaveqarnermi akiligassanik kinguaattoornissap pinngitsoortinneqarnissaa siunertaavoq. Aningaasarsiat qaqugukkut allanngornerit akileraartussaaitaasunut ataasiakkaanut tunngatillugu nalilersuineq apeqqutaavoq. Assersuutigalugu qaammammut 200 kr-inik ilanngaateqarnerup allanngortinnera akileraartussaaitamut ataatsimut pingaaruteqarsinnaavoq, assersuutigalugu ilinniagaqartumut, illuatungaani akileraartartussaaitanut allarluinnarnik annertussuseqartunik isertitaqartunut taamatut allannguneq pingaaruteqassanani, assersuutigalugu suliffeqarfimmi sanaartornermik ingerlataqartumi pisortamut.

Imm. 4-mut

Akileraaruseriffiup akileraartussap siumut isertitassatut naatsorsuutigisatut paasissutissat tunngavigalugit akileraartussap ukiumut akileraarfiusumi isertitai kingullermik taggissinerit siumulluunniit nalunaarsuinerit allaanerungaassasut pasitsaakkunigit, isertitassatut naatsorsuutigisat tunngavigalugit akileraaruseriffiup siumut nalunaarsuineq allanngortissinnaavai. Aalajangersagaq assersuutigalugu

atorneqarsinnaavoq akileraaruseriffiup paasiguniuk akileraartusseq amerlasuunik taarsigassarsimasoq, tamatumalu malitsigisaanik erniaanun aningaasartuutai ikilissasut.

Imm. 5-mut

Akileraaruseriffiup aalajangernissamini akileraartusseq nassuiaateqarnissamik piunasaqarfigisinnaavaa aalajangersakkat imm. 3 aamma 4 malillugit siumut nalunaarsukkat allannortinneqassanersut. Nassuiaanermi ilanngunneqassapput akileraartussap maanna isertitai ilanngaataalu pillugit paasissutissat.

Imm. 6-mut

Akileraartartoq siusinnerusukkat taggissisimangippat imaluunniit siumut nalunaarsuisimangikkuni akileraartartoq isertitassatut naatsorsuutigisani nassuiaateqarfigisussaavai. Tamatuma kingorna akileraaruseriffik naliliisinnaavoq akileraartartup paasissutissaatai siumut nalunaarsuinissamut qanoq tunngavissaqarnersut. Akileraaruseriffik tamanna tunngavigalugu naliliisinnaavoq, nassuiaat akileraartartup isertitai piviusumik tamakkiisumillu paasissutissaataasinnaanersut.

Imm. 7-mut

Siunnersuutigineqarpoq Naalakkersuisut malittarisassanik aalajangiisinnaassasut imm. 5 aamma 6-imi nassuiaatit taaneqartut qanoq tunniunneqartassanersut, soorlul immersuiffissanit tunniunneqassanersut. Taamattaaq imm. 6 malillugu nalunaarusiornissaq pillugu Naalakkersuisut piffissaliussisinnaapput.

Aalajangersagaq § 14-imi siunnersuummut attuumassuteqartutut isigineqassaaq.

§ 14-mut

Aalajangersakkap akileraartarnermut inatsisip § 48-at tunngavigaa, aalajangersagarli killilerneqarluni akileraartartup siumoortumik nalunaarsuisarnermut atatillugu pisinnaatitaaffiitut, takuuk qulaani § 13-imut tunngasoq.

Imm. 1-mut

Siunnersuutigineqarpoq akileraartartoq piunasaqarsinnaasoq siumut nalunaarsuineq akileraartartup isertitassatut naatsorsuutigisai tunngavigalugit nalunaaruteqarsinnaasoq, akileraartartoq isumaqaruni isertitat ukiumi akissarsiffiusumi kingullermik taggissinermi imaluunniit siumut nalunaarsuinermit malunnaatilimmik allaassuteqassappata.

Akileraartartup paasissutissaatai tutsuiginartutut akileraaruseriffiup isumaqarfigippagit, siumoortumik nalunaarsuinermit piunasaqaatinut akileraaruseriffiup tunngavigissavai.

Pingaaruteqarnermi piunasaqaatip siunertaraa akileraaruseriffiup isertitatigut allannguutit annikitsut kisiisa tunngavigalugit siumut nalunaarsuinissamut tunngavigissanngikkai. Isertitatigut allannguutit pingaaruteqarnerannut

tunngaviussaaq akileraartartumut tunngasut nalilersorneri. Assersuutigalugu ilanngaait qaammammut 200 kr.-nik allanngortinneri akileraartartumut pingaaruteqarsinnaapput, soorlu ilinniartumut, akerlianilli taama allannguneq akileraartartumut allamut allannguneq pingaaruteqartutut isigineqarsinnaanani, soorlu sanaartornermik suliffeqarfimmi angisuumi pisortamut.

Siunnersuutigineqarpoq qinnuteqaatip ilusissaa taassumalu tunniunnissaa pillugu Naalakkersuisut malittarisassiuussissasut.

Imm. 2-mut

Akileraartartoq ukiup akissarsiffiusup ingeranerani qulaani taaneqartutut piumsaqaatit assinginik siumut nalunaarsukkat allanngorteqqusinnaavai, siunissami akileraarfiusussamit atuutilersussatut.

§ 15-mut

Aalajangersakkap akileraartarnermut inatsisip § 50-iat tunngavigaa.

Imm. 1-mut

Siunnersuutip nassatarissavaa akileraartartoq akileraaruseriffiup naliliinera malillugu akileraarutit akilersimavallaakkat akileraaruseriffiup piumaffigineqarnini naapertorlugu piaartumik utertissinnaavai, isumaqarfigineqarpat akileraarutaagallarsimasut akileraarutissavinnit 5.000 koruuninit taakkunanngaluunniit amerlanerusut. Utertinneqartut saniatigut pissarsissutissalerlugit erniaalernagilluunniit akilerneqassapput.

Aningaasat 5.000 koruuninut killilerneqarneranut siunnersuutip siunertarivaa, taamatut utertooteqarumalluni qinnuteqaateqarnikkut suliassat assigiinnerulersikkumaneqarneranut tunngaviusumik aalajangersaasoqassammat. Aningaasat taama killilerneqarneranutaaq tunngaviuvoq, isiginiarneqartariaqarmat ukiup ingerlanerani siumoortumik nalunaarutip allanngortinneqartussaagaluarneranik iliuuseqartoqarsimannginneranut tunngaviusumik aalajangersaanerussammat. Taamatut siumoortumik nalunaarummik allannguuteqartitsinerit taama annertutigisunik utertoortissimassanngikkaluarnerannik kinguneqartitsissaaq.

Aalajangersagaq atorineqartassaaq akileraartartup nammineq nalunaaruteqarnermigut, naatsorsuuserinermigut, akissarsiat allagartaanik assigisaatigulluunniit uppersarsarsinnaaguniuk akileraarutaagallartunit 5.000 koruuninik imaluunniit taakkunannga amerlanernik akiliivallaarsimalluni, taamaattumillu aalajangersakkamik § 25, imm. 1 naapertorlugu akileraarutitigut utertoortissanik akilerneqartussaalluni.

Oqaaseq "piaartumik" inatsisini oqariartaataavoq, suleriaatsinilu immersorneqartarluni, tassani piffissami naleqquttumi suliarinninnissaaq akileraartussaataasullu soqutigisai pissusissamisoortumik isiginiarneqassallutik.

Maannamut suleriaatsit kommunimiit kommunimut allanngorarnikuupput, tassani kommunit ilaat aalajangersimasumik piffissami sivilisungaaitsiartumi suliarinnittarlutik, allallu sukkanerusumik allaffissornikkut ingerlatsisarlutik, soorluttaa qakileraarutaagallartut akileraarutissavinnut naleqqiullugit annertussusaat nikerartinneqarsimalluni, taakkua utertinneqarnissaanut aalajangiinerni.

Imm. 2-mut

Siunnersuutigineqarpoq akileraartartup utertitsiffigineqarnissani pillugu akileraaruseriffimmut nammineq nalunaarsuutimi nassiutereerneranit kingusinnerpaamik qaammatip ataatsip qaangiunnerani akileraaruseriffimmut saqqummiunneqassasoq. Qinnuteqaatip ilusissaa pillugu Naalakkersuisut malittarisassiuussisinnaapput, soorlu immersugassamik atuinikkut.

Imm. 3-mut

Aalajangersagaq atorneqartassaaq akileraartartup inuttut atukkatigut annertuumik naatsorsuutiginnngisamik eqqugaanermigut aningaasartuuteqarnerulerfiini tassanngaannartumillu pisariaqartitsilerfiini. Assersuutigalugu tunngaviusumik inuttut atukkatigut annertuumik naatsorsuutiginnngisamik eqqugaaneq tassaasinnaavoq, ilaqttani qanitani toqukkut qimaguttoqarsimaneranut aningaasartuuteqarnerulerneq, naatsorsuutiginnngisamik innaallagissamut imermullu akiliuteqaqqeqqusinerni, akileeqqusinerneq akiliuteqartoqanngippat atugassarititat taakku matuneqarsinnaanerineq kinguneqartitsissappat aammalu inuttut inuuniarnerneq atugassarititat assingusunut tunngatillugu iluaqusiiffiusinnaasut allannguuteqangaatsiarfiini. Taamatulli aningaasanik utertitsilernerneq piimasaqaataavoq, akileraartartup nammineq nalunaaruteqarnermigut, naatsorsuuserinermigut, akissarsiat allagartaasigut assigisaatigulluunniit uppersarsinnaaguniuk akileraarutaagallartunit amerlanernek akiliivallaarsimalluni, taamaattumillu akileraarutitigut utertoortissanik akilerneqartussaalluni.

§ 16-mut

Aalajangersakkap akileraartarnermut inatsisip § 50 c-p nanginneraa, akileraaruseriffiulli qitiusumut inissinnerata malitsigisaanik kingunissatut allannguuserneqarluni.

Imm. 1-mut

Ukiumi akissarsiffiusumi nalunaarsuinissamut atugassanik ukioq naaniariarpat akileraaruseriffik nammineq nalunaarsuiffissanik il.il. akileraartartunut nassiussuissaaq. Naatsorsuutigineqarpoq nammineerluni nalunaarsuiffik januarip qaammataata ingerlanerani nassiunneqartassasoq, taamaasilluni akileraartartut nammineerluni nalunaarsuiffimmik immersuinissaminnut periarfissaqarluarniassammata.

Akileraartartut kikkulluunniit, akileraartartut naammassillugit akileraareersimasut pinnatik, namminneq nalunaarsuisussaapput.

Nammineq naluaarsuiffissat qanoq isikkoqassanersut Naalakkersuisut malittarisassiorsinnaapput. Malittarisassat tamakku ullumikkut akissarsiat A-t nalunaarsorneri il.il. pillugit nalunaarusiaq nr. 7 ulloq 26. juni 1979-imeersumi aalajangersagaapput.

Imm. 2-mut

Akileraartartoq nammineq nalunaarsuineri immersugassamik nassinneqarsimangikkuni nammineq nalunaarsuinngitsoornissamut utoqqatsissutissaanngilaq.

Imm. 3-mut

Nammineq nalunaarsukkat ullumikkutut kingusinnerpaamik 1. marts nassiunneqassapput. Nammineq nalunaarsukkat 1. marts allakkerisarfikkut nassiunneqarpata piffissaq eqqorlugu nassiunneqartutut naatsorsuutigineqassapput. Nammineq nalunaarsukkat kingusinaartumik nassiunnerini aalajangersakkami § 19, imm. 1 naapertorlugu akileraarutissat qaffaassutissaannik amerlineqassapput.

Imm. 4-mut

Immikkut peqquteqarluni akuerineqarsinnaasumik nammineq nalunaarsuineq kingusinnerusukkat nassiunnissat akileraaruseriffiup akuerisinnaavaa, akileraaruseriineri sulianut naapertuuppata.

Nammineq nalunaarsuinissaq kingusinnerusukkat nassiunniarlugu qinnuteqaat kingusinnerpaamik 1. marts nassiunneqassaaq. Qinnuteqaat tunngavilersorneqassaaq, soorlu akileraartartup immersuinissaminut paasisutissat tamaasa pissarsiarisimangikkunigit, napparsimaguni assigisaanilluunniit.

Nammineq nalunaarsugassap kingusinnerusukkat nassiunnissaa akileraaruseriffiup itigartissinnaavaa, kingusinnerusukkat nassiussineq suliat pilersaaruseriinerinut inaarsarnerinullu kinguarsaataasussaappat.

Imm. 5-mut

Naalakkersuisut aammattaq malittarisassanik aalajangersaasinnaapput, akileraartussaataasut nammineq nalunaarsuummik immersuiffissaq atussagaat. Malittarisassat taamaattut maannamut aalajangersarneqarnikuunngillat.

§ 17-mut

Aalajangersakkap akileraartarnermut inatsisip § 52-iata nanginneraa, akileraaruseriffiulli qitiusumut inissinnerata malitsigisaanik kingunissatut allannguuserneqarluni.

Aalajangersakkap siunertaraa isertitanit akileraarutissat annertussusilernissat siunertaralugu akileraartussaataasup aningaasaqarnikkut inissisimanerata paasiniarnissanut akileraaruseriffiup qulakkeerinninnissaa.

Imm. 1-mut

Akilerartussaataasup nammineq nalunaarsuinermini aningaasarsiani sinneqaraluarpata amigaraluarpataluunniit nalunaarutigisussaavai. Nalunaarsukkami isertitat, aningaasartuutit paasissutissallu allat akilerarnermi taggissinernut nammineerluni nalunaarsuiffittut immersugassami Naalackersuisut aalajangersagaat malillugit pingaaruteqartut nassuiarneqassapput. Isertitat akilerartussaataasup nammineq nalunaarsukkamini ilanngussimanngisai immikkut nassuiaasorsorneqarnissaat piunasaqaataasinnaavoq.

Nammineerluni nalunaarummi isertitanut immikkut nassuiaatit il.il. aalajangersarniarneranni Naalackersuisut atorfilittaminnut piginnaatitsinermikkut suliakkiutigisinnaavaat.

Taamattaq Naalackersuisut nalunaarutikkut malittarisassiuussisinnaapput akilerartartut naatsorsuusiortussaataanngitsut nammineq nalunaarsuinermini paasissutissat pingaernerit, soorlu nammineq atuinerup iluani, tamatumani ilaallutik angerlarsimaffimmi ikiorteqarnermut aningaasartuutit, pequtinik annertuunik pisinerit assigisaallu.

Imm. 2-mut

Akilerartartup pisuussutini pillugit nammineq nalunaarsuinermi siusinnerusukkut ilanngussimanngippagit nammineq nalunaarsuinermit ilaassapput akilerartartup ukiup naanerani aammalu aallartinnerani pisuussutini pillugit nalunaarsussavai. Pisuussutit sinneqarpata amigaraluarpataluunniit, Naalackersuisut aalajangersagai malillugit pigisanut akiitsunullu immikkoortiterlugit nammineerluni nalunaarsuiffimmi nalunaarsorneqassapput.

Imm. 3-mut

Akilerartartut naatsorsuusiortussaataasut nammineq nalunaarsukkanut ilanngutissavai ingerlatsinermi naatsorsuutit ukiullu naanerani aallartinneranilu killiffiit naatsorsorlugit, siusinnerusukkut nammineq nalunaarsuutitut ilanngunneqarsimanngippata.

§ 18-mut

Aalajangersakkap akilerartarnermut inatsisip § 53-iata nanginneraa, akileraruseriffiulli qitiusumut inissinnerata malitsigisaanik kingunissatut allannguuserneqarluni.

Imm. 1 aamma 2-mut

Aalajangersakkami Naalackersuisut malittarisassiuussisinnaapput naatsorsuusiortussaataasut naatsorsuusiortussaataanngitsullu ingerlatsinermi naatsorsuutit suliarinninnissamut aalajangersaasinnaallutik.

Aalajangersakkat ingerlatsinermi naatsorsuutit minnerpaaffissaanerit pillugit nalunaarummi nr. 8 ulloq 26. juni 1979-imeersumi aalajangersagaapput, nammineq nalunaarsuinermit ilanngunneqartussat.

Imm. 3-mut

Akilerartartoq nammineq nalunaarsukkaminut ilanngullugit ingerlatsinermut naatsorsuutininik nassiussissappat § 19, imm. 1 naapertorlugu isertitat amerlineqassapput, ingerlatsinermut naatsorsuutit piffissaq eqqorlugu nassiunneqarpata, imaluunniit ingerlatsinermut naatsorsuutit malittarisassat malillugit ilanngunneqarsimangippata.

Nammineq nalunaarsukkat ingerlatsinermilu naatsorsuutit piffissaq eqqorlugu nassiunneqarsimangippata isertitat § 19, imm. 1 malillugu taamaallaat ataasiaannartumik amerlineqarsinnaapput.

Imm. 4-mut

Akilerartartup naatsorsuusiortussaaitaasup naatsorsuutit bilagit tassunga ilanngullugit ukiup naatsorsuusiortiusup naareerneratigut ukiuni tallimani toqqortarissavai. Naatsorsuutit pappialanngorlugit toqqortarineqassapput.

§ 19-mut

Aalajangersakkap akilerartarnermut inatsisip § 54-iata nanginneraa, akileraaruseriffiulli qitiusumut inissinnerata malitsigisaanik kingunissatut allannguuserneqarluni.

Imm. 1-mut

Nammineq nalunaarsukkat sivikinnerpaamik ullormik ataatsimik ullulli ikinnerpaamik qulit sinnernagit kingusinaartumik nassiunneqarsimappata akileraarutissaasut 2 procentimik qaffanneqassapput. Piffissaliusaaq ullunik qulinik amerlanernilluunniit qaangerneqarpat akileraarutissat 5 procentimik amerlineqassapput. Pisuni marluinni amerlissut ikinnerpaamik 100 kr-ussaaq amerlanerpaamilli 2.000 kr-ussalluni.

Nammineerluni nalunaarsuut ingerlatsinermilu naatsorsuutit piffissaagallartillugu tunniunneqanngippata malittarisassaq malillugu ataasiaannarluni qaffanneqarsinnaapput.

Imm. 2-mut

Immikkut ittunik peqquteqarsimappat tamakkiisumik ilaannakortumilluunniit amerliinnginnissaaq akileraaruseriffiup nalunaarutigisinnavaa. Immikkut peqqutit tassaasinnaapput akilerartartup tassanngaannaq napparsimalernerani, ilaqquttani qaninnerni toqusoqarsimanera assigisaallu.

Imm. 3-mut

Ingerlatseqatigiiffik peqatigiiffilluunniit il.il., taassuma ataani assersuutigalugu andelsselskabi killilimmik akisussaaffeqarfusoq, nammineq nalunaarsuutininut ilanngullugu naatsorsuutininik ilanngussisimappat, nassiussinermi ataatsimeersuarnermi suli akuerineqarsimangitsunik, ataatsimeersuarnerup kingorna kingusinnerpaamik ullut 14-it qaangiutinnginnerini naatsorsuutit pillugit ataatsimeersuarnermi aalajangikkat pillugit akileraaruseriffimmut

nalunaarutigissavai. Nalunaarut piffissaq eqqorlugu nassiunneqanngippat, ataatsimeersuarnermilu isertitat akileraarutissatut naatsorsukkat amerlinissaat aalajangerneqarsimappat, ingerlatseqatigiiffittut akileraarutip qaffaataa malittarisassani imm. 1 malillugu naatsorsorneqartumik tapiissutissaq akileqquneqassaaq.

§ 20-mut

Siunnersuutigineqarpoq Naalakkersuisut misiligutaasumik aalajangersinnaagaat kommunimi ataatsimi amerlanerniluunniit akileraartartut aalajangersimanerusut nammineerluni nalunaarsuummik nassiussinngitsoorsinnaasut. Taarsiullugu akileraartartut pineqartut 1. juni nallertinnagu akileraartartup isertissimasai pillugit nalunaarfigineqassapput. Akileraartartup akileraarnikkut tagginnerani paasissutissanik pingaarutilinnik tamanik imaqanngippat imaluunniit nalunaarut paasissutissanik eqqunngitsunik imaqarpat, akileraartartup 15. august nallertinnagu allakkatigut akileraaruseriffik nalunaarfigissavaa.

Aalajangersakkakut akileraartartut amerlangaatsiartut nammineq nalunaarsuinerup quppernerata 1-iani isertitat kisiisa pillugit nalunaaruteqartartut eqqarsaatigalugit nammineq nalunaarsuisarnerat misiligutitut atorunnaarsinneqarnissaa, taarsiullugulu isertitat pillugit akileraaruseriffimmit nalunaarfigineqaannarsinnaasut.

§ 21-mut

Aalajangersakkap akileraartarnermut inatsisip § 55, imm. 1-ip tunngavigaa

Imm. 1-mut

Maannakkumutut siunnersuutigineqarpoq amerlassusiliineq nalinginnaasoq kingusinnerpaamik 1. september nassiunneqartassasoq, tassalu ukioq amerlassusiliiffissaq qaangiuppat. Amerlassusiliinerli § 47 aamma 48-mi malittarisassat malillugit uteqqinneqarsinnaavoq.

Aalajangersakkami ersersinniarneqarpoq annertussusiliineq nalinginnaasumik 1. september naammassineqariissasoq, taassuma inernera pillugu innuttaasut ilisimaniassammassuk. Assersuutigalugu qarasaasiakkut ajornartorsiorneq pequtigalugu akileraaruseriffik kinguaattuussagaluarpat amerlassusiliinissamut piffissaliussaq piffissami sivikitsumi kinguartinneqarsinnaavoq.

Imm. 2-mut

Ingerlatseqatigiiffinnut peqatigiiffinnullu il.il., taassuma ataani assersuutigalugu andelsforeningimut killilimmik akisussaaffeqarfiusut, annertussusiliinissaq nalinginnaasumik ullorsitit malillugit ukioq akissarsiffiusoq kingoqqullugu kingusinnerpaamik 1. november naammasseriissaaq. Sulianilu tamakkunissaaq § 47 aamma 48-mi malittarisassat malillugit taggissineq uteqqinneqarsinnaavoq.

Imm. 3-mut

Nutaatut siunnersuutigineqarpoq Naalakkersuisut amerlassusiliinermut atugassanik nalinginnaasumik ilitersuutitut innersuussutinik malittarisassiuussisinnaasut. Innersuussinermi ilaatigut pineqarsinnaapput nerisaqartitaanerup, angallateqartitaanerup, nammineq nioqqutissaatinik atuinerup assigisaasalu nalinginik taggissineq.

Manna tikillugu taama innersuussinerit Skatterådip isumagisarpai, inatsisitigulli illersorneqarnissaq siunertaralugu Skatterådi siunissami maalaarutit kisiisa sammisalertusaammagit, iluaqutaanerussasutut isumaqarfigineqarpoq innersuussutit taggittarneri Naalakkersuisut akisussaaffigissagaat. Naatsorsuutigineqarpoq suliassaq akileraartarnermut naalakkersuisumut isumagitinneqartassasut.

§ 22-mut

Aalajangersakkap akileraartarnermut inatsisip § 60-iata nanginneraa, akileraaruseriffiulli qitiusumut inissinnerata malitsigisaanik kingunissatut allannguuserneqarluni.

Aalajangersakkami aalajangerneqassaaq inaarutaasumik akileraarutit akileraarutissatut amerlassusiliineq tunngavigalugu akileraaruseriffiup naatsorsortassagai. Naatsorsuinerup inernerissavaa inaarutaasumik naatsorsuinerimi paasineqartussanngorlugu akileraarutissatut siumut nalunaarutit inaarutaasumik akileraarutissanut tulluuttoq, imaluunniit akileraarutissatut siumut nalunaarummi akiliinikipallaartoqarsimanersoq akiliisoqarpallaarsimanersorluunniit.

§ 23-mut

Aalajangersakkap akileraartarnermut inatsisip § 61-iata nanginneraa, akileraaruseriffiulli qitiusumut inissinnerata malitsigisaanik kingunissatut allannguuserneqarluni.

Imm. 1-3-mut

Aalajangersakkamut attuumassuteqarput akileraarnermi naatsorsuutit inaarutaasumik akileraarutit tunngavigalugit, akileraarnissamut tagginneqarallartut oqimaaqatigiissaarlugit, tassalu ilaatigut akileraarutit A-t aamma B-t eqqarsaatigalugit, taakkua Inatsisartut aningaasarsianit akileraarutit pillugit inatsisaanni § 85 assigalugu nammineq piumassuseq naapertorlugu akiliutaappata aamma akiliutit peqquneqarluni Inatsisartut aningaasarsianit akileraarutit pillugit inatsisaanni § 94 naapertorlugu akiliutaasut. Akileraarutit § 15 malillugu utertinneqarsinnaasimasut akileraarutaagallartunit ilanngaatigineqassapput.

Akileraarutinik naatsorsuut inaarutaasumik naatsorsuutikkut akileraartussaataasumut nalunaarutigineqassaaq.

Imm. 4-mut

Siunnersuutigineqarpoq Naalakkersuisut pisinnaatinneqassasut nalunaarutikkut malittarisassanik aalajangersaassasut, taassuma kingorna akileraartussaataasup nalunaarutigissavaa aningaasat qanoq amerlatigisut unerartinneqarsimanersut imaluunniit akileraarutaagallartut akileraaruseriffimmut akilerneqarsimanersut. Aalajangersagaq maannakut atuutilersinneqarnikuunngilaq, kisiannili kingusinnerusukkut paasinarsisinnaavoq immikkoortumi malittarisassiornissaq pissusissamisuussasoq.

§ 24-mut

Aalajangersakkap akileraartarnermut inatsisip § 62-iat tunngavigaa.

Imm. 1-3-mut

Inaarutaasumik akileraarutit akileraarutaagallartut sinnersimappatigit akileraartartoq akileraarutit sinnerinut tapiissuteqassaaq. Akileraarutit sinnerinut tapiissutissat 8 procentimik taperlugit akilerneqassapput. Akileraarutit sinnerinut tapiissutissat pingasoriartumik akilerneqassapput qaammatit september, oktober aamma novembarip aallaqqaataanni, qaammatini pingasuni taakkunani kingusinnerpaamik 20-anni akilerneqartartussat.

Imm. 4-mut

Naalakkersuisut malittarisassiuussisinnatitaapput tapiissutitut akileraarutit siumut ukiumi akileraarfiusumi tullianiluunniit siumut akileraarutininut ingiaqatigitillugit akileqquneqartassanersut. Aalajangersakkap, siusinnerusukkut atorneqarnikuunngitsup, periarfissippaa nalunaarutikkut aalajangersaaneqarnissaq, akileraartartut akileraarutissat sinneri assersuutigalugu 15.000 kr.-it tikillugit akilissannigikkaat. Tassunga taarsiullugu akileraarutissat sinneri taakku ukiumi aningaasarsiorfimmi tullermi akileraarutissanut ilanngullugit akiligassannortinneqassapput, tamannalu kinguneqavissaaq taamatut periuseqarnermi akileraartartut ilanngaataasa ikilisinneqarnerinik.

Imm. 5-mut

Siunnersuutigineqarpoq kingusinnerusukkut aalajangiineqarpat akileraarutitut tapissat amerlinissaannik kinguneqartumik, akileraarutit ikinaarlugit akilerneqarsimasut 8 procentimik taperlugit ilanngussinikkut, aalajangiinerup kingorna qaammatit pingasut qaangiutereerpata qaammatip aallaqqaataani akilerneqassapput, qaammammi akiliiffissatut piffissaliussami 20-ani akilerneqariissallutik. Akileraarutit sinnerinut tapiissutit ilassutilluunniit kiisalu 8 procentimik tapit ilanngullugit ukiumi annertussusiliiffiusumi 1. september aallarnerfigalugu ullullu aalajangiinermik nalunaaruteqarnerup tungaanut qaammatit aallartinnerani 0,5 procentimik ernialerneqassapput, akileraarutissatut taggissinissaq tikillugu. Inaarutaasumik nalunaarsuinerup allanngornerani akileraarutit sinnerinut tapiissutitut akiligassat ukiumi akissarsiorfiusup kingorna 1. septemberip erniaalersorneqassapput.

Imm 6-mut

Inaarutaasumik nalunaarsuinerup allanngornera tapiissutitut akileraarutit sinnerinut ikilisinneqarnerannik atorunnaarsinneqarnerannilluunniit kinguneqartumik allannguisoqarsimappat, tapiissutitut akileraarutit sinnerisa ikilisinnerat 8 pct-imik taperlugit, aalajangernerup nalunaarutiginerata ulluata kingorna qaammat naatinnagu utertinneqassapput. 1. septemberip kingorna qaammatit aallartinneri tamaasa akileraartartoq 0,5 pct-imik ernialerfigineqassaaq. Inaarutaasumik naatsorsuinerup allanngortinneranik kinguneqartumik tapiissutitut akileraarutit sinneri ikilisinneqarpata ukiumi akissarsiffiusumi 1. september aallarnerfigalugu ernialersorneqassapput.

§ 25-mut

Aalajangersakkap akileraartarnermut inatsisip § 63-iat tunngavigaa

Imm. 1-mut

Inaarutaasumik akileraarutit akileraarutaagallartut sinnersimappatigit akileraarpallaarutit utertinneqassapput.

Imm. 2-mut

Akileraarpallaarutit 4 procentimik erniaalerneqassapput. Tamannali pissanngilaq akileraarpallaarutit piunaffigineqaqaarani akilerneqarsimappata.

Imm. 3-mut

Akileraarpallaarutit akileraaruseriffiup utertillugit akilissavai.

Imm. 4-mut

Akileraarpallaarutit ukiumi akileraarfiusumi 1. september nallertinnagu utertinneqassapput. Ukiumi akileraarfiusumi akileraarpallaarutit 1. september kingorna utertinneqarpata akileraartartoq § 44, imm. 4 naapertorlugu ernialiiffigineqassaaq, tassalu qaammatikkaartumik 1 procentimik annertussusilimmik.

Imm. 5-mut

Inaarutaasumik akileraarutit ikilisinneqarnerisa kingorna aalajangertoqarpat akileraarpallaarutit 4 procentimik ilallugit aalajangernerup kingorna qaammat ataaseq qaangiutinngitsoq utertinneqassapput. Ukiumi akileraarfiusumi 1. september aallarnerfigalugu aalajangernerlu pillugu nalunaaruteqarnermit akileraartartoq qaammatikkaartumik 0,5 procentimik ernialersuiffigineqassaaq. Utertoorutissalli § 24, imm. 5, malillugu piunarsarinqarpata erniaat aatsaat akiliiffissatut ulloq piffissaliussaq qaangiuppat aatsaat ernialersorneqassapput. Inaarutaasumik akileraarutit ikilisinneqartut ukiup akileraarfiusup kingorna 1. septemberimit ernialersorneqassapput.

Imm. 6-mut

Inaarutaasumik nalunaarsuinerup allanngornera akileraarutaavallaartut ikilisinneqarnerannik atorunnaarsinneqarnerannilluunniit kinguneqartumik

allannguisoqarsimappat utertillugillu akilerneqareersimappata, utertitassatut akileraarutit 4 procentimik taperlugit utertinneqassapput. Ukiumi akileraarfiusumi 1. september aallarnerfigalugu aalajangernerup nalunaarutiginera tikillugu aningaasat katinneri qaammatikkaartumik 0,5 procentimik ernialersorneqassapput. Aalajangersakkami § 24, imm. 5, oqaaseqatigiit. 1 aamma 2 malillugit utertitsineq pissaaq. Akileraarutit utertoortissat ikilisinneqarneqarpata ukiumi akissarsiffiusumi 1. september aallarnerfigalugu ernialersorneqassapput.

§ 26-mut

Aalajangersakkami akileraartarnermut inatsisip § 64-iat tunngavigneqarpoq.

Imm. 1-mut

Toqumasup akileraarutissaasa inaarutaasumik tagginnerini akileraarutit tapiliussassat utertoortissalluunniit tapeqartinnagit naatsorsorneqassapput.

Imm. 2-mut

Utertoortissaqassappat nammineerluni nalunaarsuinerup akileraaruseriffiup tignerata kingorna kingusinnerpaamik qaammatit 5-it qaangiutsinnagit akilerneqassapput. Utertitsineq piffissaq eqqornagu pissappat § 44, imm. 4, malillugu kingornussisussanut ernialersuisoqassaaq, tassalu qaammatikkaat aallartinnerannit 1 procentimik annertussusillit.

Imm. 3-mut

Akileraarutit sinnerinut tapiissutissat qaammatisiutit malillugit qaammammi inaarutaasumik taggissineq pillugu nalunaarutit tigareernerata kingorna qaammatit pingasut qaangiunnerini akilerneqassapput.

§ 27-mut

Aalajangersakkap akileraartarnermut inatsisip § 65-iat tunngavigaa.

Imm. 1-mut

Ingerlatseqatigiiffinnut peqatigiiffinnullu il.il., taassuma ataani assersuutigalugu andelsforeningit killilimmik akisussaaffeqarfiusut, akileraarutit 99 kr. sinnersimappasuk akileraarutinit 6 procent tapiliullugu akilerneqassapput. Ilassummut pissutaavoq selskabit peqatigiiffillu il.il. assersuutigalugu inunnit namminersortunit allaanerusumik akileraarutaagallartunik akileqquneqarneq ajornerat.

Imm. 2-mut

Akileraarutit ukiumi akileraarfiusumi 1. november akilerneqassapput, qaammammi kingusinnerpaamik akiliiffissami novemberip ulluisa 20-at piffissaq eqqorlugu kingullermik akiliiffissaavoq.

Imm. 3-mut

Akileraaruseriffik imaluunniit Skatterådi akileraarutit amerlinissaat pillugu kingusinnerusukkut aalajangiippata, akileraarutit ikinaakkat qaammatip tulliani qaninnermi ulluisa aallaqqaataanni 6 procentimik taperlugit akilerneqassapput, kingusinnerpaamik qaammatip ulluisa 20-ani akilerneqassallutik, aalajangernermit qaammatit 3-t ingerlareerneranni. Akileraarutit amerlisat tapit ilanngullugit ukiumi akileraarfiusumi akileraarutissatut taggissinerup ullua tikillugu 1. november aallarnerfigalugu ullullu aalajangiinermik nalunaaruteqarfiup tungaanut qaammatikkaartumik 0,5 procentimik erniaalersorneqassapput.

Imm. 4-mut

Akileraarutit ikilisinneqarnissaanik akileraaruseriffimmiit, Skatterådimiit imaluunniit eqqartuussivinniit kingusinnerusukkut aalajangertoqarpat, aalajangernerup kingorna qaammat ataaseq qaangiutinngitsoq akilerpallaarsimasat 6 procentimik taperlugit utertinneqassapput. Akileraartusaaq utertitsiffigineqarnissamini ukiumi akileraarfiusumi 1. november aallarnerfigalugu aalajangernermillu nalungaartuginninnissamut ulloq tikillugu qaammatikkaartumik 0,5 procentinik tapeqartillugit utertitsiffigineqassaaq.

Imm. 6-mut

Najoqqutassat Naalakkersuisut aalajangersagaat malillugit akileraaruseriffiup pisuni immikkut ittuni akuersissutigisinnaavaa imm. 1,3 aamma 4 malillugit ilassutit selskabinut peqatigiiffinnullu il.il., taassuma ataani andelselskabinut killilimmik akisussaaffeqarfiusunut, akileraarutit akilersinniarnannut atorneqassanngitsut.

§ 28-mut

Aalajangersakkap akileraartarnermut inatsisip § 69-iat tunngavigaa.

Siunnersuutigineqarpoq naalakkersuisut pisinnaatinneqassasut nalunaarutikkut ukiup ingerlanerani akileraarutissaatitaasut allanngornerini nammineerluni nalunaarsuineq, taggissineq, akiliisarneq, akiliisitsisarneq erniaalersuinerlu il.il., taassuma ataani assersuutigalugu ingerlatsinermi naatsorsuusiorneq, pillugit malittarisassiornissamut.

Aalajangersagaq piareersimaffittut taaneqarsinnaasoq manna tikillugu atorneqartarsimanngilaq. Aalajangersakkamili siunnersuutigineqarpoq ingerlanneqassasoq akileraariaatsimik atonerlueriarsinnaanerit pitsaaliorniarlugit.

§ 29-mut

Aalajangersagaq nutaajuvoq.

Siunnersuutigineqarpoq akileraaruseriffik piffissaliussanik sivikinnerusunik aalajangiisinnaassasoq § 24, imm. 3 aamma 5, § 25, imm. 6, aamma § 27. imm. 2 aamma 3-mi aalajangersakkanit allaanerusunik, tassa aalajangiinermi pineqartup akileraarutit sinnerinut tapiissutissanik, inaarutaasumik akileraarutit amerlinerinik,

isertitanik akileraarutaasussanik, imaluunniit isertitanik akileraarutaasunik amerliliniinerni pineqartup akiliinissaminut malunnartumik akileerusunnginnissaa aarlerinaateqarpat. Piffissaliussaq ullunik 7-inik sivikinnerusinnaanngilaq, akiliinissamullu piffissaliussaq ullunik 14-inik sivikinnerusinnaanani.

Aalajangersagaq akiligassanik kinguaattoornissamik pitsaaliuisuuvoq, assersuutigalugu atorneqarsinnaavoq, akiitsulik ilisimaneqartoq nuna qimalersaarlugu nalunaarpat, nunamilu maani pigisaminik tuniniaassalluni ilimagineqarpat. Aalajangersagaq immikkut pingaaruteqalersinnaavoq akileraaruseriffiup illoqarfinni aalajangersimasumik sinniisoqarfiginngisamininut tikeraaraangat.

Siunnersuut § 11, imm. 6-imi siunnersuummut atatinneqassaaq, taamaalereerpat pisuni assingusuni sulianik saqqummiussinermi tusarniaanissamut piffissaliussaq sivikillisinneqarsinnaalluni.

§ 30-mut

Aalajangersakkap aningaasarsianit akileraartarneq pillugu inatsisartut inatsisaani § 88-iata nanginneraa.

Imm. 1-mut

Kikkulluunniit akileraarutit pillugit inatsimmi § 75, imm. 1-imi aamma 2-mi taaneqartunik suliffeqarfimmini aningaasarsianik akiliisoq ukiut tamaasa qaammatip januarip naannginnerani aningaasarsiat allagartaannik aammalu aningaasarsianik nalunaarummik suliaqassapput akileraaruseriffimmullu nassiussillutik.

Aningaasianik A-nik tigusaqartartut pillugit aningaasarsiat allagartaannik suliaqartoqartassaaq, paasissutissanik imaqartunik tiguisup inuttut normuanik, aqqanik, najugaanik, kommunimut sorlermut akileraartarneranik, piffissamik atorfeqarsimaneranik, ukiumut aningaasarsiat A-t, ukiumut akileraarutit A-t, ajunngitsorsiassanik tamakkiisunik ilaannakortunilluunniit, aningaasarsianit akileraarutit pillugit inatsisartut inatsisaanni § 41, imm. 2-mi aningaasanik pineqartunik tamarmiusunik utoqqalinersissanut inuunermullu sillimmasiinernut aaqqissuussinernut akilerneqartunik paasissutissaasinnaasunillu tiguisup kinaaneranik takutitsisuusinnaasunik.

Aningaasarsianik nalunaarummut allanneqassapput aningaasarsiat A-t aamma akileraarutit A-t. taamaalilluni kisitsisit katinneri nassuiaatit qaammatikkaartut ilaatigullu unerartitsisussaataasup naatsorsuutinut nalunaarsugai assigissavaat.

Imm. 2-mut

Suliffeqarfik atorunnaarpat ukiumi aningaasarsiorfiusumi ingerlareersumi paasissutissat tunniunneqassapput kingusinnerpaamik aningaasarsivimmiit kingullermiit ullut qulit qaangiuppata.

Imm. 3-mut

Atuakkiortunut, erinniortunut, eqqumiitsuliortunut, oqalugiartartunut assigisaannulluunniit aningaasarsisitsisut, suliffeqarfimmik atornermut attartormulluunniit, kisermaassilluni atuisinnaanermut imaluunniit piginnittussaanermut atuisinnaanermut akitsuutunik, ilusilersukkanut, nioqqutissap ilisarnaataanut assigisaannulluunniit akiliisoq, akitsuut ingerlaavartumik akilerneqartaraluarpat ataatsikkulluunniit akilerneqaraluarpat imm. 1-imi aalajangersagaq malillugu paasissutissanik tunniussisussaataapput.

Imm. 4-mut

Akunermiliuttoq aqqutigalugu aningaasarsianik akiliisoqarpat, taanna paasissutissiisussaataavoq, sulisitsisoq paasissutissanik tunniussisinnaanngippat. Sulisitsisoq, imaluunniit akunermiliuttoq, ikiortissarsinermini taassuma aqqanik, najugaqarfianik eqqortumik kiisalu inuup normuanik pissarsissaaq.

Imm. 5-mut

Paasissutissat akileraaruseriffimmut tunniunneqassapput.

§ 31-mut

Aalajangersagaq aningaasarsianit akileraarutit pillugit inatsisartut inatsisaannik § 89-
imik ingerlatitseqqinneruvoq.

Imm. 1-imut

Akileraaruseriffiup paasissutissiisussaataasoq § 30-mi taaneqartunik isertitaqartartoq pillugu paasissutissanik piniarfigisinnaavaa, § 30-mi piffissanit aalajangersakkanit siusinnerusukkut, isertitanik tigusaqartoq Kalaallit Nunaanni akileraartussaataajunnaarpat. Paasissutissiisussaataasoq qinnuigineqaruni 1. januarimii akileraartussaataanerup atorunnaarnerata tungaanut pineqartup aningaasarsiaanik kiisalu akileraarutit A-t unerartitat annertussusaannik ilisimatitsissaaq.

Imm- 2-mut

Taamatuttaaq pineqartoq taassumaluunniit sinniisua, imaluunniit toqusup qimataanik aqutsisuusinnaasoq, akileraaruseriffiup qinnuiginnissinnaanera assigalugu, § 30-mi piffissami aalajangersaaneq sioqqullugu § 30 malillugu taaneqartunik isertitanik paasissutissiisussamut paasissutisseqquneqarsinnaapput, aningaasarsisartup Kalaallit Nunaannut akileraartussaataanera taamaatippat.

§ 32-mut

Aalajangersagaq aningaasarsianit akileraarutit pillugit inatsisartut inatsisaannik § 90-
imik ingerlatitseqqinneruvoq.

§ 30 aamma § 31, imm. 1 malillugu aningaasarsiaqartoq pillugu paasissutissat assilineranik aningaasariaqartoq tunineqassaaq.

Paasissutissiisussaatisoq taamaalilluni akileraaruserfimmum ilisimatitsissutiminik aningaasarsianik tiguisartoq ilisimatittassavaa. Tamanna nalinginnaasumik pisarpoq paasissutissiisutigineqartut assilinerinik aningaasarsianik tiguisartup tunineratigut.

§ 33-mut

Aalajangersagaq aningaasarsianit akileraarutit pillugit inatsisartut inatsisaannik § 91-imik ingerlatitseqqinneruvoq.

Aalajangersagaq imaqarpoq Naalackersuisut arlalinnik piginnaatitsissutininik, paasissutissiisussaatisoq pillugit erseqqinnerusunik aqunneqarnissaannut nalunaarusiortitsinikkut. Aalajangersagaq aningaasarsiat A-t il.il. pillugit nassuiaateqartarnermut nalunaarutikkut atuuttukku nr. 5 nr. 7 26. juni 1979-imeersukku atuutsinneqarpoq. Nalunaarummi ilaatigut aalajangersarneqarpoq ilisimatitsissussaatisoq immersugassat Akileraartarnermut Pisortaqaarfiup suliai aallaaviusumik atussagaat.

§ 34-mut

Aalajangersagaq aningaasarsianit akileraarutit pillugit inatsisartut inatsisaannik § 100 imm. 1-mik aamma 2-mik ingerlatitseqqinneruvoq.

Imm. 1-mut

Aalajangersagaq unerartitsissussaatisoq nalunaarsuisarneq pillugu nalunaarutikkut nr. 26. juni 1979-imi atortuutinneqarpoq.

Imm. 2-mut

Malittarisassani imm. 1-imi taaneqartuni aalajangersarneqarsinnaavoq unerartitsissussaatisoq aallartinnera taamaatinneranilu, unerartissussaatisoq najugaqarfiata allanngornera aamma aningaasarsianik A-nik tiguisartut ilanngunneri ilaajunnaarnerilu unerartitsissussaatisoq akileraaruseriffimmum nalunaaruteqassasut.

Unerartitsissussaatisoq nalunaarsuineq pillugu nalunaarummi nr. 2, 26. juni 1979-imeersumi ilaatigut ersippoq unerartitsissussaatisoq unerartissussaalernerminiit kingusinnerpaamik ullut qulit qaangiuppata sulisitsisunik nalunaarsuiffimmum nalunaassasoq aammalu sulisitsisunik nalunaarsuiffimmi pissutsit nalunaarsorneqarsimasut allannguuteqarpata unerartitsissussaatisoq allannguutinik kingusinnerpaamik ullut qulit qaangiuppata nalunaaruteqassasoq.

§ 35-mut

Aalajangersagaq aningaasarsianit akileraarutit pillugit inatsisartut inatsisaannik § 93-imik tunngaveqarpoq.

Imm. 1-mut

Aalajangersakkap kinguneraa Naalackersuisut nalunaarutikkut malittarisassanik aalajangersaasinnaasut aningaaseriviit allallu pappiaqqanik nalilinnik pisinerit tunisinerillu pillugit paasissutissanik akileraaruseriffik tunissagaat akileraarutissanik aalajangiinermut akileraarutissanillu naatsorsuinermut atorneqarsinnaasunik. Ilisimatitsisussaataitanermut ilaapput assersuutigalugu nalillit nalinginik pissarsiat ajunaarutillu, ernianit isertitat pissarsiallu taakkununga assingusut, pappiaqqanik nalilinnik pisinermut tunisinermillu atatillugu ajunaarutit aningaasartuutillu. Aalajangersagaq Aningaaserivinni il.il. ernianit isertitat il.il. akileraarutinut tunngatillugu nakkutigineqarnerat pillugu Namminersornerullutik Oqartussat nalunaarutaasigut nr. 28, 23. august 1986 –imeersukkut § 4-imi atuutsinneqarpoq, tassani ilaatigut ersilluni ilisimatitsisussaataitanermut aamma ilaasut aningaasat taarsigassarsiallu ukiup ilaannaani aqunneqartut taarsigassarsissutigineqartulluunniit.

Naalackersuisut aammattaaq malittarisassanik aalajangersaasinnaapput, pisisoq imaluunniit tunisisoq eqqartuussissuserisumik pisinnaatinneqartumilluunniit allamik sinniisooqaraangat, taanna sullitap inuttut normuanik imaluunniit selskabip normuanik, aqqanik najugaanillu paasissutissiissasoq, taamaalilluni aningaaseriviit allallu kina sinnerlugu pappiaqqanik nalilinnik pisisoqarnerasoq akileraaruseriffik eqqortumik paasissutissinnaaniassammassuk.

§ 36-mut

Aalajangersagaq aningaasarsianit akileraarutit pillugit inatsisartut inatsisaannik § 94 a-imi ingerlatitseqqiineruvoq.

Imm. 1-mut

Aningaaseriviit sparekarsit allallu akiliutinik ernialersugassanik imaluunniit ernialerlugit taarsigassarsisitsisartut imaluunniit taarsigassarsinermi akunnermiliuttut taamaalillutik ernianik pissarsititsissutit akiligassiissutigineqartulluunniit kiisalu kontomik piginnittut ataasiakkaat pillugit ukiup ingerlanerani ernianik pissarsianik akiligassanilluunniit nalunaaruteqassapput. Aammattaaq ernialiinerup ullua kiisalu aningaasat uninngasuutit akiitsulluunniit annertussusaat nalunaarutigineqassapput. Nalunaaruteqartussaataitanermi aamma kontonut ukiup ingerlanerani atorunnaarsinneqartut atuuppoq.

Nalunaarutigineqartut taakku akileraartussaataitaasup akileraarutissaanik annertussusiliinerup eqqortuunissaanut qulakkeerinnissamut taperseeqataassapput.

Imm. 2-mut

Aalajangersagaq Aningaaserivinni il.il. ernianit isertitat il.il. akileraarutinut tunngatillugu nakkutigineqarnerat pillugu Namminersornerullutik Oqartussat nalunaarutaasigut nr. 28, 23. august 1986 –imeersukkut atuutinneqarpoq. Nalunaarummi ilaatigut aalajangersarneqarpoq pissusiviit tunngavigalugit paasissutissallu pingaaruteqarpallaanngikkaangata ilisimatitsisussaataitaasut ataasiakkaat imaluunniit ilisimatitsisussaataitaasut immikkoortui imaluunniit kontot assigiinngissitaartut ilaat pillugit ilisimatitsisussaajunnaarsinneqarsinnaapput

annikilliviigineqarlutilluunniit aammalu nalunaaruteqartussat aningaasartaat ammut killissaat aalajangersarneqarsinnaalluni.

§ 37-mut

Aalajangersagaq aningaasarsianit akileraarutit pillugit inatsisartut inatsisaannik § 94 b-mik ingerlatitseqqiineruvoq.

Imm. 1-mut

Aalangersakkap kinguneraa § 36, imm. 1 malillugu nalunaaruteqarnermut atatillugu aningaaserivik kontomik allallu ingerlatsisut kontomik piginnittup inuup normua imaluunniit selskabip nalunaarsorneqarnerani normu allassagaa. Paasisutissiisussaataasup qinnuteqarneratigut kontomik piginnittup inuttut normuanik imaluunniit selskabip nalunaarsorneqarnerani normuanik akileraaruseriffiup paasisissinnaavaa.

Imm. 2-mut

Aalajangersagaq Aningaaserivinni il.il. ernianit isertitat il.il. akileraarutinut tunngatillugu nakkutigineqarnerat pillugu Namminersornerullutik Oqartussat nalunaarutaasigut nr. 28, 23. august 1986 –imeersukkut atuutsinneqarpoq. Nalunaarummi ilaatigut aalajangersarneqarpoq kontomik ataatsimik pilersitsisup kontomik ingerlatsisumut paasisitsissutigineqartut eqqortuuneri uppersarsassagai, kinaanermik uppersarsaat imaluunniit inuup normuanik uppersarsaat imaluunniit uppersarsaatit allap pisortaneersup takutitsinikkut.

§ 38-mut

Aalajangersagaq aningaasarsianit akileraarutit pillugit inatsisartut inatsisaannik § 96-imik ingerlatitseqqiineruvoq.

Imm. 1-mut

Pisortat karsiisa, aktieselskabit, anpartsselskabit, aningaaseriviit, sparekarsit allallu Kalaallit Nunaanni ernianut pissarsianullu allattuiffissianik akiliisartut malittarisassat, Naalackersuisut aalajangersagaat malillugit akiliinissamut piumasagaatit paasisutissat akiliisoqarnissaanik qinnuteqaateqartup kinaaneranik uppersarsaatit pisariaqartut, immersugassiamik piginnittup inuttut normua, aqqa najugaalu, immersugassiami aningaasat annertussusaat aamma aktiat anpartillu eqqarsaatigalugit selskabip aqqa pillugit akileraaruseriffimmut nassiutissavaat.

Imm 2-mut

Paasisutissat nalunaarutiginnissaasa ksikkussaat pillugit malittarisassanik Naalackersuisut aalajangersaasinnaapput.

§ 39-mut

Aalajangersagaq aningaasarsianit akileraarutit pillugit inatsisartut inatsisaannik § 96-
imik ingerlatitseqqiineruvoq.

Imm. 1-mut

Soraarnerussutisianut karsit, inuunermut aamma soraarnerussutisianut
sillimmasiisarfiit allallu soraarnerussutisianik akiliisartut imaluunniit inuunermut
sillimmatiniit ingerlaavartumik akiliisartut akileraaruseriffimmut ukuninnga,
ilassutitut sillimmasiinerullu akiliutit, soraarnerussutisianik aqqissuussinernit
aningaasarsianit akileraarutit pillugit inatsisartut inatsisaanni §§ 39, 40-imi
taaneqartunit akiliutigineqartut, soraarnermi ajunngitsorsiat, utertitsilluni nalilinnik
pisinermut aqqissuussinernilu taamaattuni bonusit akiliutigineqartut,
aningaasarsianit akileraarutit pillugit inatsisartut inatsisaanni § 46, imm. 5-imi
taaneqartunik aalajangersaanerit pillugit, aalajangersakkat taakku
soraarnerussutisianut karsit, inuunermut soraarnerussutisianillu sillimmasiisarfiit
allallu ilisimasaannik pisuuppata paasissutissiisassapput.

Siunnersuutigineqarpoq soraarnerussutisianut karsit, inuunermut
soraarnerussutisiassanillu sillimmasiisarfiit pisussaaffilerneqassasut
akileraaruseriffimmut ilisimatitsinissamut, naafferartumik sillimmasiissutinut
sillimmasiinermi akiliutinik aammalu inuunermut sillimmasiinermit akiliutinik,
taakkunaniit akiliuteqarnernik, soraarnermi ajunngitsorsiassaniit akiliutigineqartunik,
utertitsilluni nalilinnik pisinermut aqqissuussinernilu taamaattuni bonusit
akiliutigineqartunik aammalu aningaasarsianit akileraarutit pillugit inatsisartut
inatsisaanni § 46, imm. 5-imi taaneqartunik aalajangersaanerit malillugit iliutsinik,
aalajangersakkat taakku soraarnerussutisianut karsit, inuunermut
soraarnerussutisianillu sillimmasiisarfiit allallu ilisimasaannik pisuuppata.

Ilisimatitsissutigineqartut taakku akileraaruseriffiup akileraartussaaitat
aningaasarsiaanit angissusilerneqarneranni suliani eqqortumik angissusiliinissaanut
pisinnaatitsilissapput.

Imm. 2-mut

Ilisimatitsissutigineqartut taakku akileraaruseriffiup akileraartussaaitat
aningaasarsiaanit angissusilerneqarneranni suliani eqqortumik angissusiliinissaanut
pisinnaatitsilissapput.

Imm. 3-mut

Naalackersuisut nalunaarutikkut ilaatigut piffissamik nalunaaruteqarfiusussamik
taakkulu qanoq isikkulerlugit tunniunneqarnissaannik malittarisassiorsinnaapput.

§ 40-mut

Aalajangersakkap akileraarnermut inatsisip § 82-iata nanginneraa, taamaattorli
annaasanik agguaaqatigiittarneq pillugu malittarisassanik siunnersuutitaqarluni.

Imm. 1-4-mut

Aalajangersakkami Namminersornerullutik Oqartussat kommunillu akornanni nuna

tamakkerlugu akileraarutit, nuna tamakkerlugu immikkut akileraarutit, atuisinnaatitaanermut akileraarutit, kommuninut akileraarutit, kommunit ataatsimoorussamik akileraarutaat, sinneqartoornermi akileraarutit, ingerlatseqatigiiffiit akileraarutaat pillugit agguaaqatigiisitsisarnerit aalajangersarneqarput.

Akileraariaatsit taaneqartut aningaasarsianit akileraarutit pillugit inatsisartut inatsisaanni §§ 59 -65-ianni takuneqarsinnaapput.

Imm. 5-mut

Maannakkumutut siunnersuutigineqarpoq isertitat akileraarutaasussat, ilaallutik ingerlatseqatigiiffinnit suliffeqarfinnillu Kalaallit Nunaanni aatsitassarsiorneq pillugu inatsit malillugu atuisinnaanermut akuerisaasut §§ 27 aamma 43 naapertorlugu sinneqartoorutinit akileraarutaat, kiisalu erniaat tapiissutaallu, landskarsimut nakkartartussaasut.

Imm. 6-mut

Ingerlatseqatigiiffiit akileraarutaat, ilaallutik §§ 27 aamma 43 naapertorlugu sinneqartoorutinit akileraarutit, kiisalu ernialiuussaata tapiissutaallu, suliffeqarfiit landskarsimit pigineqartut, tassalu aktie- imaluunniit anpartselskabinnegortinneqarsimasut, ingerlatseqatigiiffiillu akileraaruseriffik kommunitut akileraarfigisaat, taakku akileraarutaat landskarsimut nakkartassapput.

Aalajangersagaq akileraartarnermut inatsimmi inatsisartut inatsisaattut nr. 2 ulloq 17. maj 1990-imi atuutsinneqaleqqaarpoq. Aalajangersakkami qularnaarneqassaaq suliffeqarfiit landskarsimit pigineqartut "allanngortitat" sinneqartoorutiminnit akileraarutaat landskarsimuinnaq nakkartarnissaat. Suliffeqarfiit landskarsimit pigineqartut eqqartorneqarnerini eqqarsaatigineqarput suliffeqarfiit aningaasaqarnermut inatsimmi ilanngunneqartut imaluunniit ilanngunneqarsimasut, taamaammallu tamakkiisumik ilaannakortumilluunniit aktieselskabitut pigineqartut, soorlu Air Greenland A/S, aalajangersakkamut ilaanngillat. Paarlattuanik assersuutigalugu Royal Greenland A/S, KNI A/S aamma Pisiffik A/S ilaatinneqarput.

Suliffeqarfiit siunissami qaninnerusumi ungasinnerusumilu sapinngisamik pitsaanagerusumik aaqqissuussinissaat periarfissinniarlugu kiisalu niueqatigiinnikkut qaqugukkulluunniit atuuttunut tulluussartinniarlugit, aalajangersagaq ingerlatseqatigiiffinnut ataatsimut arlalinnuunniit avilluni aaqqissuussimappata atuuppoq, taamallu piumasaqaataassanani ingerlatseqatigiiffiup aningaasaqarneranut landskarsi toqqaannartumik toqqaannanngitsumiluunniit piginittuulluni akisussaappat. Aalajangersagartaaq ingerlatseqatigiiffinnut kingusinnerusukku suliffeqarfittut kiisalu ingerlatseqatigiiffittut aallartinneqarpat pisiarineqarpalluunniit atuuppoq.

Imm. 7-mut

Taamattaq ingerlatseqatigiiffiup akileraarutai landskarsimut, kommunimut akileraarfiusumut kommuninullu nakkassapput; agguaaqatigiisinnerini ukiumi akileraarfiusumi akileraarnissamut procentip aalajangikkamut tunngasut, ukiumi

akileraarfiusumi 1. januar inuttussuseq naapertorlugu akileraarnissamut procenti aallaavigineqarnerata kiisalu ukiumi akileraarfiusumi akileraarnissamut procenti aalajangikkap oqimaaqatigiisinnerisigut.

Imm. 8-mut

Soraarnerussutisianit ingerlaavartumik tunniunneqartartussanit piffissaq sioqqullugu tiguneqartut akitsuutaat landskarsimut, kommunimut akileraarfiusumut kommuninullu nakkassapput; agguaqatigiisinnerini ukiumi akileraarfiusumi akileraarnissamut procentip aalajangikkamut tunngasut, ukiumi akileraarfiusumi 1. januar inuttussuseq naapertorlugu akileraarnissamut procenti aallaavigineqarnerata kiisalu ukiumi akileraarfiusumi akileraarnissamut procenti aalajangikkap oqimaaqatigiisinnerisigut..

Imm. 9-mut

Aalajangersakkatut nutaatut siunnersuutigineqarpoq akileraarutit, erniat tapiissutillu akilernerqarsimangitsut annaasaqaatigineri landskarsip nammassagai, ataatsimoorussamik kommuninut akileraarutitigut annaasaqaatit pinnagit.

§ 41-mut

Siunnersuummi kommunini naligiissaareriaaseq pineqarpoq. KANUKOKA-mik isumaqatigiinniareernikkut Naalakkersuisut nalunaarutikkut malittarisassanik aalajangersaasinnaapput, taanna malillugu kommunit inunnit ataasiakkaanit akileraarutitigut isertitaasa annertussusaasa naligiissarneqarnissaat kommunit akileraarutitigut isertitaasa annertussusaasa agguarnerisigut pissasoq.

Siunertarineqarpoq maanna naligiissaariaaseq kommuninik allanngortisaanissap tungaanut atuutsinneqarallassasoq. Ikaarsaariarnermi tulluannigitsut iluarsiiisutillu annikinnerusut ukiumoortumik Namminersornerusut kommunillu ataatsimoorussamik aningaasaliissutit isumaqatigiinniutiginerinut ilanngullugit iluarsineqarsinnaassasut.

§ 42-mut

§ 42-p kingunerissavaa akileraaruseriffiup ukiut tamaasa kingusinnerpaamik 30. junimi akileraarutitigut iluanaarutit missingerneru (akileraarutitigut isertitat) ukiumut akissarsiffiusussamut tullermut nalilertarnissaat.

Maanna suleriaatsimi atuuttumi Akileraartarnermut Pisortaqaarfiup nuna tamakkerlugu kiisalu kommunit ataatsimut akileraarutaasigut isertitassat missingersuusiortarlugit, kommunit, kommuninut akileraarutissatigut isertitassat missingersuusiortarlugit. Missingersuusiortarnerup nalaani illuatungeriit taakku marluk imminnut atuumassuteqakkajunngillat.

Siunnersuutigineqarpoq kommuninut, kommuninut ataatsimoorussamik nunalu tamakkerlugu akileraarutigut missingersuusiorneq kiisalu tamatumunnga akisussaaffik akileraaruseriffimmut nuunneqassasoq

Kommunik iluarsartuusseqqinnerup atuutilernissaata tungaanut ikaarsaariarnermi, maanna kommuniusut ilaasa aningaasarsiornerat ima annikitsigissaaq, kommunit isertitassatut naatsorsuutigisaat pillugit missingersuusiornermi immanguarluunniit amigartoortikkaanni taakku aningaasarsiornerat annertungaatsiartumik sunniuteqarfigisussaavaat, taamaammat kommunit taakku eqqarsaatigalugit "nakkarnaveequsiisoqartariaqarlutik".

Aaqqissuusseqqinneq piviusunngorpat, qularnanngitsumik kommunit angisuut sisamanngorlutik, ajornartorsiut immi illuarsissangatineqarpoq, kommunimmi taakku aningaasaqarnerat ima annertutigilissammat nikingasoorutit annertugaluarpataluunniit nammassinnaalissallugu.

Siunertarineqarpoq taama sillimaffiliineq maanna aningaasarsiornerup allanngorarnerani aningaasaateqarfik allatut ilusilerneqassalluni, 1. januar 2008 aallarnerfigalugu aningaasaateqarfimmit agguaneq tunngavigalugu amigartumik nikingassutit assersuutigalugu isertitassatut missingersuutinit 5 procentinik ilangerneqarsinnaallutik, taamaattorli aningaasat aalajangersimasut minnerpaaffilerneqarlutik (assersuutigalugu ukiumut 500.000./1.000.000). Allatut inissiineq 2007-imit atuutilernissaa naatsorsuutigineqanngialq, piffissamut tassunga kommunit namminneq missingersuusioreersimammata, 2007-imut missingersuutit inaarlugit 2006-imi aalajangiunneqareersimassammata.

Manna tikillugu aningaasarsiornerup allanngorarnerani aningaasaateqarfimmit misilittakkat tunngavigalugit naatsorsuutigineqarpoq ukiuni 2006 aamma 2007-mi taama sillimaffiliinermut 8 mio. kr. illikartinneqarsinnaapput, taamaalilluni ukiumut 16 mio. kr.-t missaat qaavatigullu 10 mio. kr. ukiunut 2009 aamma 2010-mut imaqaassallutik, ukiuni 2006 aamma 2007-mi illikartitsisoqarpat.

Kommunit kattussuunnerat naammassineqarpat silliffiliineq atorunnaassaaq, aningaasallu sinneqassappata kommuninut utertinneqassapput, tamatumami kingorna kommunit ima angitigilersimassapput aningaasarsiornerup allanngorarnerani aningaasaateqarfimmi ukiumut 10 mio. kr.-t tulluukkunnaassapput. Tulluussorinarpoq maanna kommunini naligiissaariaatsip kommunit nutaamik aaqqissuunneqarpat qularnanngitsumik isumaqatigiinniutigineqaqqissammat.

Kommunit isertitassaannik missingersuusiorneq kommunit akileraaruseriffiullu akornanni qanimut suleqatigiinnikkut isumagineqassaaq, taamaaliornikkut sammisami kommunit malinnaaniassammata.

Imm. 2-mut

Siunnersuutigineqarpoq kommunit akileraarutit kommunit akornanni kiisalu landskarsip kommunillu akornanni akiliisarneq pillugu qanoq ilusilernissaa Naalackersuisut malittarisassiuussinissaannik pisinnaatinneqassasut. Tamatumunnga atatillugu akileraarutitik siumoortitsisarneq inaarutaasumillu akiliisarneq kiisalu

ukiuni akileraarfiusuni siuliini il.il. akileraarutitut tapiissutissat agguartarneri pillugit malittarisassanik aalajangersaasoqassaaq.

§ 43-mut

Imm. 1-mut

Akileraarutit piffissaq eqqorlugu akilernerqanngippata akiliiffissatut piffissaliussamit ulloq aallarnerfigalugu qaammatikkaartumik 1 pct erniaalersorneqassaput, minnerpaamilli 500 kr.-inik. Erniaat landskarsimut nakkartassapput.

Aalajangersakkami ilaatinneqarput isertitat akileraarutissat akitsuutillu, kingusinaarluni akiliineq pillugu erniaalersuineq kiffartuussinermilu akiliutit pillugit inatsisini aalajangersakkanut ilaanngippata. Aalajangersagaq assersuutigalugu erniaani § 24, imm. 5 aamma 6, § 25, imm. 6 aamma § 27, imm. 3-imi taaneqartuni atorneqarsinnaanngilaq. Paarlattuanik aalajangersagaq ilaatigut atorneqarsinnaavoq akileraarutitut tapissat kingusinaartumik akilernerqarnerini, takuuk § 24, imm. 3, aamma ingerlatseqatigiiffiit akileraarutaanni, takuuk § 27, imm. 2. Erniaat isertitanit akileraarutaasussaasunit ilanngaatigineqarsinnaanngillat.

Imm. 2-mut

Tapiissutissat § 24, imm. 2, aamma § 27, imm. 1-imi akileqquneqartut landskarsimut nakkassapput, taamallu siunnersuutip § 25, imm. 2-at naapertorlugu taarsiissutissat landskarsip akilertassallugit.

§ 44-mut

Imm. 1-mut

Akileraarutitut akilerpallaarsimasat qaammammi ulluinnaat kingullianni kingusinnerpaamik utertinneqassapput, tassa qaammatip akileraaruseriffik utertitsinissamik piumaffigineqarluni tigusinerata kingorna, tassani allatut akileraartarnermulluunniit inatsisini allani aalajangersaasoqarsimanngippat.

Aalajangersakkami akileraarutit akilerpallaarsimasat pillugit utertoortitsinissamut piffissaliussat nalinginnaasut atuutsilerneqassapput. Piffissaliineq atorneqassaaq akileraartarnermut inatsimmi akileraarutit utertoortissat pillugit immikkut piffissaliussanik aalajangersaasoqarsimanngippat. Piffissaliussat immikkut ittut soorlu § 24, imm. 6 aamma § 25, imm. 4-mi aalajangersagaapput.

Akileraartarnermut inatsisini arlalinni akileraarutit akilersimavallaat pillugit utertinnissaanut piffissaliussaqaanngilaq, tamatumalu malitsigisaanik taama akiligassinneqarnermi erniaalersuineq pillugu immikkut malittarisassaqaanngilaq. Siunnersuutip siunertaraa innuttaasut suliffeqarfiillu pissarsiassaat erniaalersorneqarnissaannut pisinnaatilerussaavai, soorlu akileraaruseriffik killormut taama periarfissinneqartoq.

Imm. 2-mut

Imm. 1 malillugu utertitsinissamut piffissaliussaq unitsinneqassaaq, utertitsiffigineqartussaq pillugu pissutsit pillugit utertitsinissamik piumasaqarnermi akileraaruseriffiup misissuinissamini tunngavissaqanngippat. Unitsitsineq atorunnaassaaq pissutsit pineqartut misissornissaannut aporfissaaruppat.

Taamaalilluni eqqarsaatigineqassaaq utertoorteqarnissamik qinnuteqaat eqqarsaatigalugu qinnuteqaammut tunngaviusup akileraaruseriffiup misissuinngitsoornissaanut pisuusimappat. Qinnuteqartoq eqqarsaatigalugu, soorlu taassuma naatsorsuutai annertuumik tukappata, naatsorsuusiorsimannngippat imaluunniit qinnuteqarneq tutsuiginartumik uppernarsaaserneqarsimannngippat utertoortitsinissamut piffissaliussaq unitsinneqartutut isigineqassaaq. Qinnuteqarnermi misissuinissamut tunngavissatut pissutsit aporfissaaruppata utertoornissamut piffissaliussaq aallarteqqinneqassaaq.

Imm. 3-mut

Utertoornissamut qinnuteqartoq nammineerluni nalunaarsuummik imaluunniit akitsuutinik piffissaq eqqorlugu nassiussisimannngippat utertoortitsinissaq akileraaruseriffiup unitsissinnaavaa. Nammineerluni nalunaarsuut imaluunniit akitsuutinik nalunaarutiginninneq tiguneqarpat utertoortitsinissamik unitsitsineq atorunnaassaaq. Utertoortitsinissaq unitsinneqarpat utertoortitsinissamut piffissaliussaq imm. 1 malillugu unitsinneqassaaq.

Aalajangersakkami innuttaasut suliffeqarfiillu kaammattuutaassaaq nammineerluni nalunaarsuutit imaluunniit akitsuutinik nalunaarutiginninneq piffissaq eqqorlugu nalunaarutiginnittarnissaannik, ilutigitillugulu qularnaarneqassaaq akileraarutit akilerpallaarsimasat akileraaruseriffiup akilertassanngikkai utertoortitsinissamut eqqarsaatigalugu isertitanik akileraarutaasussanik akitsuutinillu akiligassaminik kinguaattoorsimannngitsoq ilisimaqqaarnagu.

Siunnersuutip taamaallaat siunertaraa utertoornissamik qinnuteqaatit imm. 1-imi akilernissaannut piffissaliunneqartut, taamaattumik assersuutigalugu akileraarutinit utertoortissat aalajangersakkamut attuumassuteqanngillat.

Imm. 4-mut

Piffissap utertitsilluni akiliiffiusussap naaneraniit qaammatit aallartinneranni qaammammut 1 procenti erniatut akilernerneqartassaaq, piffissamit utertitsilluni utertitsilluni akiliiffissamit kingusinnerusumik 25-imi, imm.4-mi aamma 26, imm. 2-mi imaluunniit akileraartarneq pillugu aalajangersakkanit kingusinnerusumik akileraarutit utertillugit akilernerneqaraangata. Erniat nunap karsiata akilissavai, erniallu akileraartussaataasup aningaasarsiaasa naatsorneqarannut ilanngunneqassapput.

§ 45-mut

Imm. 1-mut

Siunnersuutigineqarpoq akileraaruseriffik pisinnaatinneqassasoq akileraarutitigut kinguaattoorutit erniaalersornerinik unitsitsisinnaasoq, akiitsullip ukiuni

qaninngerusuni akiligassaminik isumaginnissinnaangippat. Kisiannili akileraaruseriffik akileraarutitut kinguaattoorutitut ernialiineq nangeqqissinnaavaa, akiitsullip aningaasatigut inissisimamera pitsanngoriarpat imaluunniit paasineqarpat erniarlersuinerup unitsinneqarnissaanik aalajangiisoqarnerani akileraaruseriffik paasissutissanik pisariaqartunik tamanik pigisaqarsimanngitsoq.

Siunnersuutip siunertaraa, akiitsullip aningaasaqarnikkut ima inissisimappat, erniaanik akiliinissaminut periarfissaqanngippat, taamaattumillu pisuni taamaattuni erniaalersuiuarnissaq siunertaqassanani, taamaallaallu naatsorsuusereriaatsitut tunngaannarsinnaalluni. Akiitsullip aningaasaqarnikkut inissisimanagera nalilersonera eqqarsaatigineqarsinnaavoq naafferaartumik akilersuinissamik isumaqatigiissusiorsinnaanermut, taamaalilluni akiitsullip akileraarnikkut kinguaattoorutai ikilisinneqarsinnaallutik, ingerlaavartumillu erniaalersuinerup malinnaalersinnaassalluni.

Aalajangersagaq §§ 53-55-mi isumakkeerfiginninneq pillugu malittarisassanut attuumassuteqanngilaq, ilaatigut nassatarissallugu akileraaruseriffiup erniaalersuinerminik unitsitsiniarluni imaluunniit erniaalersuinerminik unitsitsinngitsoornissaminik aalajangigai akileraarutitut, erniaanik assigisaannillu isumakkeerfiginniniarluni aalajangigai eqqartuussinermi siullersaalluni isummernertut sunniuteqanngikkaluarluni.

Akileraaruseriffiup akiitsullip aningaasaqarnikkut inissisimanageranik misissuinaa akiitsunik isumakkeerfiginninissaq pillugu sukumiinerussanngilaq, erniaalersuinerup unitsinnissaanik akileraaruseriffiup aalajangerneqar allanngortinneqarsinnaammat, akiitsullip aningaasaqarnikkut inissisimamera pitsanngorsimappat imaluunniit sammineqartumi paasissutissat aalajangernerup nalaani eqquissortuunngitsut paasineqarpata. Taamaalilluni akileraaruseriffik ernialersuinerup nangeqqinnissaanik qaqugukkulluunniit aalajangersinnaavoq.

Ernialersuinerup unitsinnissaanik aalajangerneq akiitsullip eqinnuteqarnera tunngavigalugu pisinnaavoq imaluunniit akileraaruseriffiup nammineq suliniuteqarnermini naliliinera tunngavigalugu.

Imm. 2-mut

Siunnersuutigineqarpoq aalajangersagaq taamaallaat inuinnarnut attuumassuteqartunut atorineqarsinnaasoq.

Imm. 3-mut

Siunnersuutigineqarpoq akileraarutitigut kinguaattoornermi erniaalersuinerup unitsinnissaa pillugu Naalakkersuisut erseqqinnerusumik malittarisassiuussinissamut pisinnaatinneqassat. Naalakkersuisut ilaatigut aalajangersinnaavaat akileraaruseriffiup immikkoortui sorliit taama aalajangiisarnissamut akisussaassanersut, taamallu pisuni qanoq ittuni akileraaruseriffiup ernialersuineq unitsinninnaaneraat pillugu periarfissanik Naalakkersuisut naleqqussaasinnaasut.

§ 46-mut

Aalajangersakkami pineqarput aningaasarsianit akileraarutit, akitsuutit aamma inatsisit tunngavigalugit akiliutit.

Aalajangersakkap kinguneraa akileraarutinik utertitsilluni piumsaqaatit qularnaveeqqusinermut atorneqarsinnaangitsut allatulluunniit allanulluunniit tunniunneqarsinnaangitsut malittarisassat malillugit ulloq utertitsilluni akiliiiffiusussaq sioqqullugu. Taamatut tunniussinissamut isumaqatigiittoqarlunilu isumaqatigiissuteqartoqarpat taakku atortussaataassanngillat.

Akileraarutinik utertitsilluni akiliisoqarnissaanik piumasaqaatit utertitsilluni akiliisarnermik malittarisassat malillugit ullormit tassanngaaniit allamut tunniunneqarsinnaapput. Akileraartussaataasoq assersuutigalugu akileraarutinik amerlanaarutaasunik utertitsilluni akilernerqarnissaannik piumasaqaatit allamut tunniussinnavai ukiumi akileraarutissanik annertussusiliinermi ulloq 31. august.

Aalajangersakkap qulakkeerpaa akileraartussaataasup akileraarutinik utertitsilluni akiliisoqarnissaanik piumasaqaatai inuttut akiitsoqarfianut ingerlateqqinneqarsinnaannginneri, taamaalillunilu anguneqarluni Kalaallit Nunaanni Namminersornerullutik Oqartussat kommunillu pisortanut akiligassanit kinguaattoorutit pisassat ilanngarnerisigut imaluunniit piumasaqaatinut pisassalernikkut matussisersinnaanngikkaat.

§ 47-mut

Nutaatut siunnersuutigineqarpoq isertitat akileraarutaasussat pillugit nalinginnaasumik piffissaliisarnissaq aalajangerneqassasoq. Piffissaliussatut siunnersuutit maanna tamakkunannga samminnittarnerit aallaavigaat.

Akileraarutissatut taggissinermi eqqarsaatigineqarput isertitat aamma akileraarutissatut naatsorsuutigisat taggissinermut tunngavigineqartut.

Taggissinissamut ilutigitillugu piumasaqaataavoq akileraarutissatut taggissinerit pisuussutit pillugit inatsisitigut pisoqalisootitsinissamut malittarisassanut atuuttut. Namminersornerusut kommunilluunniit akileraarutitigut akitsuutitigulluunniit pisortatut inatsisit malillugit pisoqalisoomnissaat piffissaliussap qaangiunnerani ukiut 5-t atuupput, takuuk pissarsiassat ilaanni pisoqalisootarneq pillugu inatsit nr. 274 ulloq 22. december 1908-meersoq (1908-mi inatsit) § 1, nr. 4, tak. § 2. Taamattaq akileraaruteqarpallaarsimasut piumasaqaataat ukiuni 5-ini pisoqalisoomnissaq pillugu inatsimmut ilaavoq, tak. 1908-mi inatsit § 1, nr. 6. Kiisalu Danske Lov 5-14-4 naapertorlugu ukiuni 20-ni pisoqalisoomnissamut piffissaliussaq atuuppoq, akiitsoqalernerup nalaanit naatsorsuutigalugu.

Uteqqiinissamut atatillugu isertitat akileraarutaasussat nalinginnaasumik taggissinissamut piffissaliussaasoq siunnersuutip § 47-ani takuneqarsinnaavoq, § 48-

mi pineqarlutik taggissinerit piffissaliussap nalinginnaasup avataatigut isumagineqarsinnaallutik.

Imm. 1-imut

Siunnersuut malillugu akileraaruseriffik akileraarutissanik taggissineq pillugu ukiup akileraarfiusup 5-iata qaangiunnerata kingorna siumut ilimasaaruteqarsinnaananilu qaffaanissamik ilimasaaruteqarsinnaanngilaq. Akileraaruseriffik nammineerluni akileraarutissanik taggissisinnaanngilaq, aamma nammineerluni nalunaarusiorneq pigineqannikkaluarpalluunniit, imaluunniit akileraarutissanik (qaffaalluni appaalluniluunniit) ukiup akileraarfiusup qaangiunneranit ukiut 6-issaanni 31. januar kingorna taggissisinnaanani. Akileraarutissanik taggissineq ilutigitillugu akileraarutissanik naatsorsuisoqartussaavoq (inaarutaasumik nalunaarsuineq).

Imm. 2-mut

Akileraartussaataasup akileraagassaminik taggissineq allanngortikkusukkuniuk ukiup akileraarfiusup 5-iata naanerani 31. oktober nallertinnagu allannguutissanik tunngavilersuilluni paasissutissanik nutaanik saqqummiussissaaq.

Suliamik uteqqiinissaq pisinnaavoq piviusut tunngavigalugit paasissutissanik saqqummiinikkut, soorlu erniaanik aningaasartuutinit uppersaatinik saqqummiussinikkut, inatsisinik tunngavilinnik, soorlu akileraartussaaniikkut naliliinertut ittut. Siunnersuummi aamma erseqqissarneqarpoq akileraarnermi taggissineq uteqqinneqarsinnaasoq, paasissutissat allannguinnermut tunngaviusinnaasut akileraaruseriffimmut saqqummiunneqarpata, naak paasissutissat nutaajunngikkaluartut. Apeqqutaavoq paasissutissat aalajangiinnermut uteqqikkusutamut tunngaviliisuunngitsut, paasissutissallu saqqummiunneqartut akileraarnermi taggissinerup allanngortinneranut tunngaviusut.

Tamakku saniatigut siunnersuutigineqarpoq akileraartartup uteqqiinissamut qinnuteqarnissaanut piffissaliussaq nalinginnaasoq ukiup akileraarfiusup kingorna ukiut tallimassaanni 31. decembarimut aalajangiunneqassasoq. Tassani eqqarsaatigineqarpoq pisuni erseqqissuni akileraaruseriffik ingerlatsinikkut inatsisilerinerit nalinginnaasut malillugit pisortat taggissinissamut piffissaliussinnginnerini taggissinermik allanngortitsisinnaasut, aalajangernerup allanngortinnissaani paasissutissanik tunngavissanik pissarsisoqarpat. Tamanna aamma atuuppoq akileraartartup akissarsialeriffik paasissutissanik saqqummiussiffigippagu. Siunnersuummi erseqqissaatigineqarpoq pisortat akileraartartullu piffissaliinerat ataqatigiissut.

Imm. 3-mut

Akileraarnermi taggissineq ukiumut akileraarfiusumut taggissinissap nalinginnaap avataaniittoq, nalikilliliinnermut tunngaviup nalilernerani allanngortitsisoq, imm. 1 malillugu pisinnaasoq allanngortissinnaasorluunniit, isertitat tagginneri eqqoriaanerunngippata.

Nalikilliliinnermut tunngavik kukkusumik taggineqarsimappat taggissinissamut piffissaliussap iluani akileraarnermut taggissinnermut eqqortumut tunngaviuusaaq,

takuuk imm. 1. Tamannali atuutinngilaq isertitat tagginneri eqqoriaanermik tunngaveqarpata.

Imm. 4-mut

Akileraaruseriffiup amigartoornermi annaasaqarnermiluunniit saqqummiussassat allanngortinnissaanni naliliisinnaanera taamaatissaaq, amigartoorneq annaasaqarnerluunniit ukiumut isertitsiffiusumut nalinginnaasumik piffissaliinerup avataani nammineq nalunaarutigineqarsimappat, takuuk imm. 1. Taamaalilluni akileraarnermut taggissineq allaanerusumik suliarineqassanngilaq, apeqqutaalluni taggissineq isertitat tagginnerini sinneqartutut amigartutulluunniit ilaatinneqarpata. Siunnersuutip nassatarissavaa saqqummiussassani amigartoorneq annaasaqarnerluunniit allanngortillugu nalilernerani akileraarutini taggissinerup tunngaviuppat, allannguineq siunnersuutip imm. 1-iani piffissaliussap iluani kalerriutigineqarpata. Taamaalilluni amerlartoornerit annaasalluunniit ukiumi akissarsiffiusumi, amigartoornerit annaasalluunniit nammineq nalunaarsorfiani, taggissinissamat piffissaliussap iluani angissusilerneqassaaq, taamaalillunilu nalileneq akileraarnerup tagginneranut atuuttussangorlugu allanngortinneqarsinnaanani.

Amigaartoorneq annaasaqarnerluunniit assersuutigalugu ukioq 0-imut nammineq nalunaarsuummut ilanngussimappat, taassuma allanngortillugu nalilernerani ukioq 5-imi 31. oktober kingoqqullugu kalerriutigineqarsinnaanngilaq, taamallu taggissineq ukioq 6-imi kingusinnerpaamik 31. januar isumagineqassalluni. Piffissaliussat nalinginnaasut qaangiutereersut amigartoorut annaasaqaalluunniit atornerqarpata, soorlu ukioq 6-imi akissarsiffiusumi, amigartoorummik annaasaqaammilluunniit allanngortitsinerup malitsigisaanik akileraarutini taggissinerup allanngortitsinissamat piffissaliussaq qaangiutereersimassaaq. Siunnersuut taamaallaat pingaaruteqarpoq amigartoorutip annaasaqaalluunniit saqqummiussasap allanngortillugu nalilernerani akileraarutit tagginnerinut tunngaviuppat.

Imm. 5-mut

Aalajangersakkami eqqarsaatigineqarpoq ingerlatseqatigiiffiit arlallit il.il. ukioq naatsorsuiffiusoq ullorsiutit malillugit ukiumut naleqqutinngitsoq atorniarlugu qinnuteqarsimappata akuerineqarlutillu. Pisuni taamaattuni piffissaliussat ukiup isertitsiffiusup naanerani taarsiullugut naatsorsuutigineqassapput.

Pisuni ataasiakkaani naatsorsuiffiusoq ullorsiutit malillugit ukiumut kingumoortumik naatsorsuisoqartarpoq, assersuutigiinnarlugu akilerartartup isertitai piffissami 1. juli 2005-imiit 30. juni 2006-imi, ukiumut aningaasarsiorfiusumut 2007-imut inaarutaasumik naatsorsuinerup tunngavigineqartarpoq.

Pisuni ataasiakkaani allani naatsorsuiffiusoq ullorsiutit malillugit ukiumut siumoortumik naatsorsuisoqartarpoq, assersuutigiinnarlugu akilerartartup isertitai piffissami 1. april 2005-imiit 31. marts 2006-imut, ukiumut aningaasarsiorfiusumut 2006-imut inaarutaasumik naatsorsuinerup tunngavigineqartarpoq.

Imm. 6-mut

Aalajangersakkap nassatarissavaa imm. 1-imi piffissaliussap sivitsornera, imm. 1-

imi taggissinissamut piffissaliussap iluani pippat ukiup naanerani naleqqatigiisitsisoqassaaq, ukiumi isertitsiffiusumi imm. 1-imi piffissaliussap avataaniilluni. Pisuni taamaattuni ukiup aallartinnerani naleqqatigiisitsineq taamaallaat allanngortinneqarsinnaavoq, ukiup isertitsiffiusup siulianut ilutigittillugu taggissineqarpat.

§ 48-mut

§ 47-imi piffissaliussat nalinginnaat avataanni taggissineq pisinnaavoq allanngortinneqarluniluunniit § 48-mi piumasaqaatit eqquutsinneqarpat.

§ 48-p siunertaraa siunnersuutip § 47-ia pissusissaanngitsumik sunniuteqarnisaasa pitsaaliornissaat. Siunnersuutip § 48-ani, imm. 1 aamma 2, erseqqissumik taaneqarpoq pisuni suni akileraarnermi immikkut taggissisoqarsinnaasoq.

Imm. 1-mut

§ 47-mi, imm. 1, piffissaliussat apeqqutaatinnagit akileraaruseriffik taggissinnaavoq allanngortitsilluniluunniit, akileraartartup isumagisai taggissinnaanagillu allanngortissinnaanngikkai akileraaruseriffiup ilisimasaqarsimannginnera peqqutaasimappat.

Siunnersuummut atatillugu eqqarsaatigineqarpoq akileraaruseriffiup taggissinissamut allannguinissamulluunniit periarfissai ataqatigiilluinnartut kiisalu taamaalilluni akileraarutit ilassutaannik piumasaqarsinnaanera, takuuk inatsit nr. 274 ulloq 22. december 1908-meersoq, piumasarisat ilaasa pisoqalisarneri pillugit inatsit (1908-Loven). Taamaalilluni oqaaseq "pissutsit piviusut pillugit ilisimasaqannginneq" 1908-Lovemi § 3 malillugu paasineqassaaq. Taamaammat 1908-Loven-ip § 3-anut innersuussinerup erseqqissaatigaa, 1908-Loven malillugu pisoqalisoornerup atorunaarsinneqarnera pillugu piumasaqaatit sakkortungaatsiartut innersuunnerani aamma atuutissaaq siunnersuutip § 47-ani, imm. 1, taggissinissamut piumasaqaammut aalajangerneranut atatillugu siunnersuutip § 48, imm. 1 malillugu atorunnaarsinneqarpoq. Paarlattuanik innersuussinerup siunertarinngilaa 1908-Loven-ip § 3-a atorlugu pisoqalisoornerup unitsinnissaa.

Pissutsit piviusut pillugit ilisimasaqarsimannginneq peqqutigalugu taggissinermut piffissaliussaq atorunnaarsinnaavoq. Akileraaruseriffik peqqutissaqanngitsumik periarfissat tamaasa eqqarsaatigissallugit imaluunniit itinerusumik misissuissalluni pisussaatitaanngilaq. Aappaatigut assersuutigalugu taggissinissamut piffissaliussap aallartinnissaata kinguartinnissaa naammanngilaq akileraartartup nammineq nalunaarsuutai eqqortuusimanngippata, akileraaruseriffik nammineq nalunaarsukkamik nalinginnaasumik misissuisimappat kiisalu ukiut siuliinut nammineq nalunaarsorsimasanut assersuussinermi paasissutissat nalunaarutigisimanngisat malugineqarsimassagaluardmata.

Taggissinissamut piffissaliussaq assersuutigalugu atorunnaarsimassaaq, pissutsit maanna ukiulluunniit siuliini nammineq nalunaarsuinerni ilanngunneqarsimanngippata. Paasissutissani naatsorsuutitigut tunngaviusut

akileraaruseriffiup pissarsiarisimangisai najoqqutassanit aallaaveqanngitsut akileraaruseriffiup misissuinerminni naammattoorunigit, pissutsit allat eqqarsaatigalugit taggissinissamut piffissaliussaq atorunnaassaaq, pissutsit suunersut akileraaruseriffiup ilisimalernissaata tungaanut. Piffissaliussartaaq atorunnaassaaq akileraartartup nuussimanini nalunaarutigisimangippagu, imaluunniit killilimmik akileraartartoq nammineq nalunaarsuisimangippat, akileraaruseriffiup nalinginnaasumik mianersornermigut pineqartup akileraartussaanera ilisimasimangippagu.

Piffissaliussaq atorunnaarsinneqarsimappat atorunnaarsitsinissamut piffissami piunasaqaatit eqquutsinneri piffissaliussaq ingerlassanngilaq. Tassa imaappoq; nammineq nalunaarsuutip tunniunnerata nalaani piffissaliussaq aatsaat aallartissaaq pissutsit atorunnaarsitsinermut pequtaasut unippata, tassaakkajuttarluni paasissutissat attuumassuteqartut akileraaruseriffiup ilisimalerpagit. Taassuma kingornan piffissaq suliap suliarineranut atorneqartoq, soorlu kingumut allakkianik nassiussineq il.il., piffissaliussamik atorunnaarsitsinermik kinguneqakkajunngilaq, aatsaalli atorunnaarsitsinerup uninneranut atatillugu akileraaruseriffiup paasissutissat annertut tigusimappagit, taamaalillunilu tamakkunanga samminnermi piffissamik atuinerunissaq pisariaqartoq nalilerneqarpat.

Piffissami akileraaruseriffiup akileraartartup iliuuserisimasai ilisimanerneranit imaluunniit malussarniarnermigut ilisimasaqalersimaffissaraluani kingusinnerpaamik qaammatit 6-it qaangiutsinnagit § 12, imm. 1-imi taaneqartutut akileraaruseriffik kalerriissaaq isertitat akileraarutaasussat pillugit inissiisoqartussaasoq imaluunniit taggissinermik allanngortitsisoqartussaasoq. § 12 imm. 1-imi taaneqartutut kalerriinerup nassiunnerata kingorna kingusinnerpaamik qaammatit 6-it qaangiutinnginnerini taggissisoqassaaq.

Imm. 2-mut

Aalajangersagakkap imm. 1-ip assigaa, tasanili akileraartartoq immikkut angissusiliisoqarnissaannik piunasaqarsinnaalluni, aammattaaq takuuk §47, imm. 2-imut oqaaseqaatini oqaaseqatigiit pingajuanni.

Imm. 1-imi oqaaseqaatit ilaatigut innersuussutigineqarput.

§ 49-mut

Imm. 1-mut

Akileraarnermi allannguisinnaaneq inuttut piunasaqaataavoq, tamannalu tunngavigalugu taamaaliorinnaaneq atorunnaassalluni imaluunniit allanik imaqalersinnaalluni, pisortat taama iliorneq akileraarnermi naatsorsuutigisamit allatut iliorpata. Akileraarutininik nalornisooruteqarsinnaaneq piviusut tunngavigalugit innuttaasunut/suliffeqarfinnut iliuuseqarsimasunut kisimi atuutinngilaq, kisiannili aamma akileraarnermi oqartussanut.

Uppernarsaasertarneq peqqutigalugu siunnersuutigineqarpoq akileraarnermi nangaaneq taamaallaat atuussinnaasoq, akileraaruseriffimmut erseqqissumik,

allakkatigut nalunaarutigineqarpat, qanoq iliornissap imarisai pillugit ilutigitillugu akileraaruseriffimmut nalunaarutigineqarpata. Tamanna nalinginnaasumik pisarpoq akileraaruseriffik amerlassusiliinermik suliaqarneranut ilanngullugu qanoq iliornissap imarisai pillugit uppersaaseqqusineratigut.

Piumasarineqarsinnaangilaq akileraarnissamut allannguisinnaaneq suli atuutilertussaangitsoq akileraaruseriffiup siumut isummerfigissagaa, tassa akileraarnikkut sunniutip kissaatigineqanngitsup suli atuutilinnginnerani.

Aallaavigineqarpoq akileraarnissamut allannguineq taamaallaat akileraarnikkut sunniuteqarsinnaasooq kingusinnerpaamik qanoq iliornissaq ilutigitillugu akileraarnikkut allannguinermi paatsuugassaangitsumik oqaatigineqarpat allannguinissaq qanoq ililluni akileraarnikkut sunniuteqassanersoq taama akileraarnikkut siunertaq ajalussagaluarpat. Akileraarnikkut pingaaruteqarsinnaangilaq, assersuutigalugu akileraarnermi allannguinissami oqaatigineqarpat, isumaqatigiissummi illuatungeriit peqqaarnertut sunniutilimmik nutaamik isumaqatigiissusiorpata, akileraarnermi allannguineq atuutilissappat, imaluunniit akileraarnikkut allannguinermut atatillugu allamik isumaqatigiissuteqarnissaq ilanngunneqarsimappat.

Imm. 2-mut

Akileraarnermi allannguinissaq akileraaruseriffiup itigartissinnaavaa inuttut erseqqinngitsumik paatsoornartumillu sunniuteqassappat, assersuutigalugu suliffeqarfimmik tunisinermut tunngatillugu, allannguinerlu tunisereernerup kingorna ukiut arlallit aatsaat qaangiuppata piviusunngussappat, imallu sunniuteqarluni, suliffimmik tunisinerup kingorna ingerlatsinikkut utertinneqarluni. Akileraarutitigut sunniutilimmik allanngortitsineq itigartinneqarnerini inuttut akileraarnikkut isumagisat atuutsinnarnerinik nassataqarpat, akileraarnermi oqartussat nalunaarfigineqarpata iliuuseqarnek siunissamut atuuttussanngorlugu allanngortinneqartoq.

Akileraarnermi allanngortitsineq akileraarnikkut sunik sunniuteqassanersoq aalajangerneqarnera akileraarnikkut aalajangikkani inunnut sunniuteqartut allatulli Skatterådimit maalaarutigineqarsinnaavoq, takuuk § 2. Akileraarnikkut allannguineq, assersuutigalugu maalaarut Skatterådimit suliarineqarnerata nalaani aatsaat atuutsinneqalersooq, Skatterådimit siullertut suliarineqassanngilaq, kisiannilu akileraaruseriffimmit.

§ 50-mut

Allannguinissamik akuersissuteqarnerup kingunerissavaa, akileraarnermi oqartussat akuersissasut, inuttut iliuutsit kingorna allannguineq, akileraarnermi taggissinermut tunngaviusut, akileraarnermi taggissinermi sunniuteqartinneqassaaq, taamaalilluni akileraarnermi taggissineq "kukkusunngorluni" allanngortittariaqarlunilu.

Nr. 1-mut

Aalajangersagaq iliuitsit allanngornissaannut killiliissaaq, akileraarnikkut sipaarniutaanngitsut imaluunniit akileraarutissanik kinguartitsinerunngitsut pissutsit allat tunngavigigaanni. Allannguneq nalinginnaasumik akuerineqarsinnaanngilaq, iliuitsit assersuutigalugu ingerlatseqatigiiffimmi piginneqataassuteqarnerup oqartussaasullu akornanni pigisat malunnartumik akisunaarlugit akikinaarlugilluunniit tunissagaanni. Aappaatigut allannguneq akuerineqarsinnaasassaaq kingornussinermik kinguneqarpat, naak kingornussinerup akileraarutininik kinguartitsinermik kinguneqassagaluartoq, taama iliorneq akileraarutininik kinguartitsinerunngitsumik allat eqqarsaatigalugit tunngaveqarsorinassammat.

Nr. 2-mut

Aalajangersagaq allannguinnissanik killiliivoq, iliuitsit akileraartussap qularnanngitsumik siumut ilisimanngisaminik akileraarnikkut sunniuteqartussaappat, taamallu sunniutit pingaaruteqarlutik. Pingaaruteqarnermut piunasaqaammi qanoq iliuuseqarnissap pingaaruteqarnera piunasaqaataanngilaq, ataatsimulli isiginnilluni piunasaqaataalluni, akileraarnikkut sunniutit siumut ilisimasimanngisat pingaaruteqarneri, tassalu aningaasaqarnikkut nammatassat.

Nr. 3-mut

Aalajangersagaq allannguinnissamut killiliivoq, iliuitsit allanngortinniakkat, aallaqqaammulli erseqqissumik akileraartarnermi oqartussanut saqqummiunneqarsimappata, taamaalilluni iliuusissap atuunnera imarisaalu oqartussaasut qularutigisimanagu.

Nr. 4-mut

Aalajangersagaq allannguinnissamut killiliivoq, iliuusissatut kissaatigisat allanngorneri inuttut sunniuteqartussat ajornaappata paasinarpatalu, ukiumi iliuuseqarfigisami, ukiumi tullerisaanni. Taamaalilluni allannguinnissamut akuersissutip malitsigisaanik allannguinerup akileraarnikkut allanut sunniutai qularutigineqassanatik. Taamaattorli piunasaqaatip eqquutsinneqannginnerani allannguinerup aningaasaqarnikkullu sunniutai imminnut tulluutinngippata tamanna pinngitsoorsinnaavoq.

Nr. 5-mut

Aalajangersagaq allannguinnissamut apeqqutaavoq kikkulluunniit allannguinnissamut qinnuteqaatip akuerineqarneratigut akileraarnikkut attorneqartussat, allannguinnissamut qinnuteqaammut akuerisimanersut.

Nr. 1-imiit 5-imut aalajangersakkat imminnut ataqatigiipput, taamaammalu aalajangiinerup atorunnaarsinnaasut akuersisoqassappat tamarmik eqqortinneqarsimassallutik.

Imm. 1-mut

Akileraaruseriffiup akitsuutip akilerneqartussanngorfianiit kingusinnerpaamik ukiut sisamat qaammatillu pingasut qaangiunneranni akitsuutinik akiliisarnerup allanngortinneqarnera pillugu ilimasaarut nassiusinnaavaa. Ilimasaarut akitsuutinik akiliisussamut nassiuqqassaaq aalajangigassatut siunnersuutitut ilusilerlugu suliaassap suliaassanngortinneqarnera tassunga tunngasoq ilanngullugu.

Akileraarutitut tunngasumik suliaasaqarfimmi piffissat akiliiffissat assigiinngissuteqarput. Piffissat akiliiffissat pisut akitsuutinik akiliiffissat pilernerat eqqarsaatigalugu assigiinngissuteqarput aammalu akitsuutip qanoq ittuunera apeqqutaalluni. Assersuutigalugu akitsuut 13. marts 2000-imi akilerneqartussanngorpat, akiliiffissaq 13. juni 2004-mi qaangiutissaq. Piffissaliusaaq taamatuttaaq akileraaruseriffiup akitsuutip taarserneqarnissaanik allanngortitsineranut tunngatillugu atorveqassaaq. Piffissaliusaaq taamaattoq piffissamiit akitsuutip taarserneqarnissaa pillugu piumasaqaatip taarsiiffigineqartussaataasumit atuutilersinneqarsinnaaffianiit naatsorsorneqassaaq.

Aalajangersagaq akileraaruseriffiup piffissaliussap qaangiunnerani akitsuutit akilerneqarfissaata allanngortinneqarnera pillugu imaluunniit akitsuutip akitsuutinik akiliisussamut taarserneqarnissaa, aammalu taarsiissutinik pissarsisumut, ilimasaarummik nassitsisinnaannginneranik kinguneqassaaq. Akitsuutit akilerneqarnissaat imaluunniit taarsiissutit akilerneqartut taamaalillutik piffissaliussap qaangiunnerani inaarutaasussatut aallaaviupput. Akitsuutinik akiliisussaaq taamaalilluni, immikkut aalajangersaaneq tunngavigineqarsimangippat, tak. § 52, akileraarutitik akiliisussaaq pineqartoq pillugu pisimasumut tunngasunik immikkut akitsuutitut piumasaqaatinik saqqummiusseqqissinnaanngilaq. Aammattaaq akileraaruseriffiup piffissaliussap qaangiunnerata kingornagut taarsiissutit utertillugit akilerneqarnissaat piumasarisinnaanngilaa.

Akitsuutinik suliaasaqarfimmi akitsuutit akilerneqarnissaanni kingusinnerusukkut nammineerluni nalunaarsuinerit ilusilimmik allannguuteqartitsinerit pisarput. Kingusinnerusukkut nammineerluni nalunaarsuinerup atornissaanut periarfissaq oqartussaasut akitsuutinik akiliinissamik allanngortitsineranni piffissatulli sivistigaaq, tassa imaappoq piffissaliussap aalajangersakkami oqaaseqatigiit siullianniittup qaangiunnissaata tungaanut.

Aammattaaq siunnersuutigineqarpoq akitsuutinik akiliutissanik imaluunniit taarsiissutissanik aalajangersaaneq ilimasaarinnermi piffissaliussap qaangiunneraniit kingusinnerpaamik qaammatit pingasut qaangiunneranni ingerlanneqassasoq, tak. aalajangersakkami oqaaseqatigiit pingajuat.

Imm. 2-mut

Siunnersuutigineqarpoq akitsuutinik akiliisussap akitsuutit akilerneqarnissaasa suliaassanngorteqqinnissaannik aammalu taarsiivigineqartussaataasup akileraaruseriffiup ilimasaarinnermini piffissaliusnaanup naapertuuttumik akitsuutip taarserneqarnissaa pillugu qinnuteqarnerani ukiuni sisamani qaammatinilu pingasuni piffissaliusaaq atulersinneqassasoq.

Akitsuutinik akiliisussap taamaalilluni nalunaarsuinissap kingornagut kingusinnerpaamik ukiut sisamat qaammatillu pingasut qaangiunneranni paasissutissat piviusut imaluunniit inatsiseqarnermut tunngasut, allannguuteqartitsinissatut kissaatigineqartunut tunngavilersuutaasinnaasut saqqummiutissavai.

Tamatumunnga assingusumik akitsuutit taarserneqarnissaannik qinnuteqarneq, taarsiisuteqarnissamik piumasaqarnerup piaarnerpaamik atuutilersinnaaffianiit kingusinnerpaamik ukiut sisamat qaammatillu pingasut qaangiunneranni taarsiivigineqartussamit saqqummiunneqassaaq. Aalajangersagaq akileraartussaataasup akileraarutitik amerlassusiliinerup suliassanngorteqqinnissaa pillugu qinnuteqarnerminik saqqummiussisinnaaneranut tunngatillugu § 47, imm. 2-mut naapertuuppoq.

Akileraaruseriffik tassaavoq suliassanngortitseqqinnissamik qinnuteqaatip akuerineqarnissaanut aalajangiisussaq. suliassanngortitseqqinnissamik itigartitsineq Skatterådimit naammagittaalliutigineqarsinnaavoq, tak. § 2, akitsuutinik akiliutissat naatsorsorneqarnerat imaluunniit taarsiivigineqarnissamik itigartitsineq assigalugit.

Akitsuutinik akiliisussaataasooq kingusinnerusukkut nammineerluni nalunaarsukkaminik tunniussiguni, taassuma atorunnaarsillugu utertinnissaanut periarfissaa aammalu akileraaruseriffiup naammagittaalliuteqarnissamut periarfissalimmik qinnuteqarfiginera taamatuttaaq suliassanngortitseqqinnissamut piffissaliussap naanissaata tungaanut atuutissaaq. Piffissaliussaq ullormit akiliiffissamiit naatsorsorneqassaaq, apeqqutaatinnagu suliffeqarfiup akitsuutinik akiliisussaataasup kingusinnerusukkut nammineerluni nalunaarsukkani qanga tunniussimaneraa.

Suliassanngortitseqqinnermut piffissaliussaq maleruassagaanni naammappoq qinnuteqaat piffissaliussap qaangiutinnginnerani saqqummiunneqarsimappat. Akileraaruseriffiup aalajangiinerata kingusinnerusukkut nammineerluni nalunaarsuineq naak malittarigaluaraa, taamalu siullermik nammineerluni nalunaarsukkanut naleqqiullugu akitsuutinut akiliutissat qaffanneqarnissaat peqqussutigineqarluni, taava akileraaruseriffiup aalajangiinera taamaalilluni imm. 1-imi 2-milu piffissaliussap qaangiunnerani aalajangerneqarsimassaaq.

§ 52-mut

§ 52-ip siunnersuumi § 51-p naatsorsuutiginnngisamik sunniutissaasa pinngitsoortinneqarnissaat siunertaraa. Siunnersuummi § 52, imm. 1 aamma 2-mi sukumiisumik nalunaarsimavoq qanoq pisoqarnerani akitsuutinik akiliutissat immikkut ittumik annertussusilerneqarnissaat ingerlanneqarsinnaasoq.

§ 52 akileraarutissanik immikkut ittumik aningaasarsianit akileraarutitik annertussusiliinernut tunngatillugu siunnersuummi § 48-mut naapertuuppoq.

Imm. 1-mut

Akileraruseriffiup § 51, imm. 1-imi piffissaliussaq apequtaatinnagu, akitsuutitut akiliutissat ingerlassinnaallugilluunniit allanngortissinnaavai, akileraruseriffiup akitsuutitut akiliisussaataasup akiliisinnaassusia pillugu pisuutitsissutaasinnaanngitsumik ilisimasaqannginnermik pissuteqartumik annertussusiliinissaq ingerlassinnaanngippagu allanngortissinnaanngippaguluunniit.

Siunnersuummut atatillugu isumagineqarpoq akileraruseriffiup annertussusiliinissamik ingerlataqarnissaata imaluunniit allanngortitsinissaata taamalu akilerarutitik akileeqqusinissaata akornanni qanimut ataqtigiittoqarnissaa isumagineqarpoq, tak. akiligassat pisoqalisimasut assigiinngitsut pillugit inatsit nr. 274 22. december 1908-meersoq (1908-mi inatsit). Taamaalilluni oqaaseq "pissutsit piviusut pillugit ilisimasaqannginneq" 1908-Lovemi § 3 malillugu paasineqassaaq. Inatsit 1908-imeersoq malillugu pisoqalisooresimatillugu atorunnaarsitsinissamut piunnaasaqatit sakkortungaatsiartut § 51, imm. 1-imi annertussusiliinissamut piffissarititaq § 52, imm. 1 malillugu atorunnaarsitsinissamut aalajangiinernut atatillugu aamma atuutissaq

Akitsuutitut akiligassat aalajangersarnissaannut allanngortinneqarnissaannulluunniit piffissaliussaq pissusiviusut pillugit pisuutitsissutaasinnaanngitsumik ilisimasaqannginnermik pissuteqartumik pisoqarnerani atorunnaarsinneqarsinnaavoq. Akileraruseriffik pissutaasinnaasunik tamanik naatsorsuuteqarnissaminut imaluunniit pissutissaqanngitsumik sukumiinerusumik misissuinissamik aallartitsinissaminut pisussaataitaanngilaq. Illuatungaatiigullu assersuutigalugu piffissaliussap aallartiffissaata siuartinnissaa naammannngilaq, akitsuutitik akiliisussaataasup nalunaaruteqarnera eqqortuusimanngippat, akileraruseriffiullu pisarnek naapertorlugu misissuinermini pissutsit paasissutissiisutiginneqanngitsut maluginiarsimanngippagit.

Piffissaliussaq assersuutigalugu atorunnaarsinneqassaaq pissutsit nalunaaruteqarnermi ilanngunneqarsimanngippata. Akileraruseriffiup naatsorsuusiornikkut paasissutissat misiliinermini atortussanit akileraruseriffiup maannamut pigisai malillugit nassuiaatissaqartinneqanngitsut naammattoorpagit, piffissaliussaq pisut allat eqqarsaatigalugit atorunnaarsinneqassaaq, piffissaliussamut akileraruseriffiup pisunik paasisaqarfigisaata tungaanut.

Piffissaliussaq atorunnaarsinneqarpat, piffissaliussaq piffissami atorunnaarsitsinissamut piunnaasaqatit maleruarneqarfiannut atuutissanngilaq. Tassa imaappoq, atorunnaarsitsinissamut piunnaasaqatit akitsuutit nalunaarutigineqarfianni naammassineqarsimappat, piffissaliussaq aatsaat atuutilissaaq piffissamiit atorunnaarsitsinerup atorunnaarfianiit atuutilissaaq, imaakkajuttarluni paasissutissat suliamut tunngassutillit akileraruseriffiup paasisimalerpagit. Piffissaq, tamanna najoqqutaralugu suliap suliarineqarfissaanut ilanngunneqartoq, tassunga ilanngullugu paasissutissatut allagaqaat il.il., piffissaliussap allatut atorunnaarsinneqartannginneranik kinguneqarajuttarpoq, tamatumani pissutsit, akileraruseriffiup atorunnaarsitsinerup atorunnaarneranut atasumik tigusimasai imatut annertutigippata, taakkua suliarineqarnissaannut naammattumik piffissaliinissaq pissutsit naapertorlugit pisariaqartinneqartoq naliliisoqarpat.

Akileraaruseriffiup kingusinnerpaamik piffissaliussamiit qaammatit arfinillit qaangiunneranni, akileraaruseriffiup paasisaqarfianiit imaluunniit nalinginnaasumik sukumiisumik misissuinermigut akitsuutinik akiliisussaatitaasup akiliutigisinnaasaanut paasinnereersimaffissaraluaniit, akitsuutinut akiliinissap ingerlanneqarnissaanut allanngortinneqarnissaanulluunniit ilimasaarut § 12, imm. 1-imi taaneqartutut nassiuutissavaa. Aalajangersaaneq allanngortitsinerluunniit § 12, imm. 1-imi ilimasaarutip taaneqartup nassiuunneqarnerata kingorna kingusinnerpaamik qaammatit arfinillit qaangiunneranni ingerlanneqassaaq.

Imm. 2-mut

Aalajangersagaq imm. 1-imut naapertuuppoq, tamatumani akitsuutinut akiliisussaatitaasup akitsuutinik akiliinissaata immikkut ittumik allanngortinneqarnissaanut periarfissaq pineqarmat.

Aammattaaq imm. 1-imut nassuiaatit innersuunneqarput.

§ 53-mut

Siunnersuutigineqarpoq inuit akileraarutissaannik sinneruttunik isumakkeerinninneq pillugu aningaasarsianit akileraarutit pillugit inatsimmi § 115, imm. 9-mi malittarisassat aalajangersakkanik annertunerusunik taarserneqassasut, tassani akiliisinnaajunnaarneq pillugu inatsisip Kalaallit Nunaannut atuutilersitsinissaq pillugu peqqussummi nr. 983 16. december 1997-imeersumi § 197 aallaaviussalluni. Akiliisinnaajunnaarneq pillugu peqqussummi § 197-imi akiitsunik isumakkeerinninneq pineqarpoq.

Siunnersuummi pingaartinneqarpoq akiitsulik, akiitsui amerlanertigut akileraarutinit akitsuutinillu pisut, akiitsunik isumakkeerinninnermik suliami Landsrettimi suliarineqarnerisimappat annertoqataanik isumakkeerfigineqassasoq. Taamaalilluni anguneqassaaq ilaatigut Landsrettip akileraaruseriffiullu suliassaasa pissusissamisoornerusumik agguarnissaat, ilaatigullu suliani taamaattuni assigiiaarnerusumik suliaqarnissaq. Kisiannili akiitsullit akiitsui akiitsunik assigiinngiiaartunik katitigaasut Landsretti aqputigalugu suli akiitsunik isumakkeerfigineqarnissamut qinnuteqartassapput.

Imm. 1-mut

Akileraaruseriffik, aningaasarsianit akileraarutinit akitsuutinillu, ernianut, sullissinermi akitsuutinut aammalu allaffissornikkut pillaammik akiliutinut tunngatillugu akileraarutinit akiliisussaatitaanermut isumakkeerinnissinnaavoq, akiitsoqartup tamanna qinnuteqaatigippagu, aammalu akiitsoqartup akiitsuminik akiliisinnaanermi neriunartoqanngitsoq qularnaarsinnaappagu, aammalu isumaqartoqarpat isumakkeerinninneq akiitsoqartup aningaasaqarnerata sivisuumik iluarsiniarnissaanik kinguneqassasoq.

Aalajangersakkami immikkoortup siulliup akileraaruseriffiup akiitsoqartup akiliisinnaassuseqarneranik naliliinissaa kingunerissavaa. Taamaalilluni

isumakkeerinninnissamut piumasaqaataassaaq akiitsoqartoq imaannaanngitsunik akiitsoqarsimassasoq.

Tamatumanili naatsorsuutigineqassaaq, akiitsoqartup isumakkeerfigineqassaguni aningaasaqarnikkut piumasaqaatit naammassisimanerai akileraaruseriffiup naliliinermini, taamaallaat akiitsoqartup pigisai nalillit ilaat piviusunngortinneqarsinnaasut imaluunniit allatut iliorluni akiitsoqartup akiitsoqarfimminut akiliutissatut siunnersuutai ilanngutissammagit. Akiitsoqartoq assersuutigalugu ajoqusernermut taarsiivigitissimappat isumakkeerinninnermik suliaassami ilanngunneqartussaannngitsunik, taava ajoqusernermut taarsiivigitinneq tamanna aamma akiitsoqartup akilersuinissaminut pisussaaffini naammassiumallugit ukiuni qaninnerni ilimanaateqannginneranut aammattaaq ilanngunneqassanngilaq.

Akiliisinnaajunnaarnek pillugu peqqussummi § 197, imm. 2 naapertorlugu ilaatigut akiitsut isumakkeerneqarnissaat pillugit eqqartuussisut aalajangiisinnaaneranni akiitsoqartup soqutigisai pingartinneqassapput. Pissusiviatigut tamatumani naliliisoqassaaq akiitsunik isumakkeerinninneq akiitsoqartup aningaasaqarnerata iluarsineranik kinguneqassanersoq, taamaalilluni pineqartoq akiitsumi piviusorsioortunut tunngasortaasa akilersornissaannut aammalu siunissami pisussaaffimmi naammassinissaanut periarfissaqalerluni.

Taamatut piumasaqaateqarneq akileraaruseriffiup isertitatigut akileraarutitut akitsuutinullu tunngasunik akiligassat kinguaattoorutit isumakkeerneqarnissaannut iluaqutaasinnaaneramik naliliinissaanut tunngaviussaaq. Akiitsoqartoq akiitsuminik isumakkeerfigineqareeraluarluni pisussaaffini maleruarumallugit akiitsoqartuassappat, isumakkeerinninneq pineqartup aningaasaqarnikkut ajornartorsiuteqarnerata iluarsiiviginnissaanut inaarutaasumik aaqqiissutaanaviannngilaq. Isumakkeerinninneq pisumi tamatumani tunngaviatigut tamatigut itigartinneqartassaaq.

Akiitsoqartoq imaannaanngitsunik akiligassaqarpat aammalu isumakkeerinninneq akiitsoqartup aningaasarsiornerata iluarsineranik kinguneqassappat, siunnersuutigineqarpoq akiitsoqartoq isumakkeerinninnermik nalunaarfigineqassasoq, pissutsit imm. 2-mi taaneqartut tamatumunnga akerliunngippata.

Imm. 2, nr. 1-mut

Isumakkeerinninneq akiitsoqartup aningaasarsiorneranut tunngasut erseqqissumik naammassineqarsimasut naatsorsuutigineqartinnagit nalinginnaasumik nalunaarutigineqarsinnaanngilaq.

Akiitsoqartup aningaasaqarnikkut atugaasa nalorninaateqarnerat siullermik akileraaruseriffiup pineqartup akiliisinnaannginnerminik uppersaasinnaaneramik naliliinissaanut pingaaruteqassaaq, pingaartumik siunissami aningaasatigut pisussaaffimminik ingerlatsisinnaannginneranut, taamatuttaarlu nalornissuteqarneq sunniuteqarsinnalluni isumaqartoqarpat isumakkeerinninneq akiitsoqartup aningaasaqarnikkut atugaasa ataavartumik iluarsiiviginnissaannut aqqutissiuussissanersoq. Naliliineq taamaalilluni imm. 1-imi akiitsut

isumakkeerneqarnissaannut aningaasaqarnikkut piunasaqaat naapertorlugu naliliinerup ilaatut ilanngunneqassaaq.

Aappaattut akiitsoqartup aningaasaqarnikkut atugai pillugit nalornissuteqarneq akiitsoqartup naafferartumik akilersuinissamik aaqqissuussinissaata aaqqissuunnissaanut akileraaruseriffiup isumannaatsumik tunngaveqarnissaanut pingaaruteqassaaq.

Aalajangersakkami naatsorsuutigineqarpoq akiitsoqartup piffissami naafferartumik akilersuiffimmi missingersuusiaticut atugai (isertitanut aningaasartuutinullu tunngasut) pisariaqartinneqartumik isumannaassuseqarnerat aalajangerneqarsinnaanersoq, aammalu akiitsoqartup missingersuusiaticut atugai ima annertutigisumik naammassineqarsimanngippata, taakkua isumakkeerinninnissamik suliamut pingaaruteqarlutik, taava akileraaruserfiup malittarisassatut pingaarnertut akiitsut isumakkeerneqarnissaannik qinnuteqaat itigartissavaa.

Akiitsoqartup aningaasaqarnikkut atugai assersuutigalugu naammassineqarsimassanngillat, akiitsoqartoq suliffissaarussimappat imaluunniit ilinniagaqartuuppat. Akiitsoqartup ineqarnikkut atugai nalorninaateqarpata tamanna aamma kinguneqarajuttarpoq akiitsoqartup aningaasaqarnikkut atugaasa naammassineqarsimanngitsutut isigisariaqarnerannut.

Akiitsoqartoq assersuutigalugu piffissami sivisuumi suliffissaaleqisimappat pineqartup aningaasaqarnikkut atugai pissutsit najoqqutaralugit naammassineqarsimasutut naatsorsuutigineqassapput, apeqqutaatinnagu akiitsoqartoq isumaginninnikkut ikiorsiissutinik pisartagaqarnerasoq. Akiitsoqartoq (taassumaluunniit aapparisa) assersuutigalugu piffissap sivisuup ingerlanerani suliffeqarnermut attuumassuteqarsimanngippata, aammalu pineqartoq suliamut tunngasumik ilinniagaqarsimanngippat, akiitsoqartup (aapparisaataluunniit) siunissami suliffissaqarnikkut atugassaat aningaasatigullu isertitassaat eqqarsaatigalugit taakkua naammattumik nassuiaatissaassapput, taamaalillunilu pineqartoq isumakkeerfigineqarsinnaalerluni.

Akiitsoqartoq piffissami killeqartumi atorfeqarsimappat, tassunga ilanngullugu assersuutigalugu ukiuni aalajangersimasuni atorfeqarneq, tamanna aammattaq pineqartup maannamut aammalu siornaticut atorfeqarneranik, aningaasaqarnikkut atugaanik allanillu aalajangersimasumik naliliinermik tunngaveqassaaq, akiitsoqartup aningaasaqarnikkut atugai imatut annertutigisumik naammassineqarsimasutut naatsorsuunneqarpata pineqartoq isumakkeerfigineqarsinnaalerluni. Akiitsoqartoq assersuutigalugu ukiut arlallit ingerlaneranni piffissani killeqartumik kinguleriaartunik ataqatigiiaartunillu assigiinnangajattunik atorfeqarsimappat, pineqartup suliffeqarnikkut aningaasaqarnikkullu atugai taamaalillutik naammattumik nassuiaatitut naatsorsuunneqassapput.

Akiitsoqartoq isumakkeerneqarnissamik qinnuteqaateqartinnani ukiumi imaluunniit ukiunut aggersunut nammineerluni nalunaarsuineramik tunniussaqaarsimanngippat, pineqartup aningaasarnikkut atugai aallaaviaticut naammassineqarsimanngitsutut

naatsorsuunneqassapput, pissutigalugu assersuutigalugu aalajangeruminaammat akiitsoqartoq akileraarutigut amigartooruteqarnerminik saqqummiussinissaminut pisinnaatitaanersoq imaluunniit akileraarutissat sinneruttut akiligassanngussanersut.

Tunngavilersuutigineqassappat qinnuteqartup inummit toqusumit kingornussisussaataasoq, taassumalu toqunissaa qanittuararsuusoq, pineqartup aningaasaqarnikkut atugai taamatuttaaq naammassineqanngitsutut naatsorsuunneqassapput.

Akiitsoqartup aningaasaqarnikkut atugai naammassineqanngippata akileraaruseriffik isumakkeerinninnermik nalunaaruteqarnissamik nalinginnaasumik itigartitsisussaavoq.

Imm. 2, nr. 2-mut

Nr. 2-mi, litra a-d-mi, pisut arlaqartut taaneqarput akiitsoqartup aningaasaqarnermut tunngasuni illersorneqarsinnaanngitsumik iliuuseqarsimanerata nalilernerqarnissaanut ilanngunneqartussat, taamaalilluni pineqartoq isumakkeerinninnermik nalunaarfigineqarsinnaajunnaarluni. Taaguinerit sukumiisuunngillat.

Litra a malillugu akiitsoqartoq aningaasaqarnermut tunngasuni illersorneqarsinnaanngitsumik iliuuseqarsimassaaq, pineqartoq piffissami imaannaanngitsunik akiligassaqaalersimappat, tamatumani pineqartup aningaasaqarnikkut pisussaaffini naammassisinnaajunnaareersimassallugit. Aalajangersagaq assersuutigalugu atornerqarsinnaassaaq, akiitsoqartoq akiligassatigut pisussaaffini akigassanngoreersimasut akilersorsinnaajumallugit nutaamik taarsigassarsippat.

Litra b malillugu akiitsoqartoq aningaasaqarnermut tunngasuni illersorneqarsinnaanngitsumik iliuuseqarsimassaaq, akiligassat imaannaanngitsut pilersimassappata, taamaalillunilu akiitsugaqartoq aningaasaqarnikkut pisussaaffimmik tigusilluni akiitsoqartup aningaasaqarnikkut atugaanut naleqqutinngitsumik. Tamanna pisinnaassaaq, akiitsoqartoq piffissap ilaani akiliisinnaassuseqarani imaluunniit pisussaaffimmik tamatuminnga akiliisinnaajunnaaratarsinnaalluni tigusinermigut aningaasanik nuussaqaqparat, iluanaarniutitut isikkoqartutut suussusersineqarsinnaasunik. Tamatumani assersuutigalugu tassaasinnaapput pisussaaffiit, piginneqataassutinik akiitsoqartup inuussutissarsiummik ingerlatarneranut attuumassuteqanngitsunik allagarsiineratigut pilersimasut.

Litra c malillugu akiitsoqartoq aningaasaqarnermut tunngasuni illersorneqarsinnaanngitsumik iliuuseqarsimassaaq, akiligassat annikigisassaannngitsut atuinissaq siunertaralugu pilersinneqarsimappata. Tamanna nammineerluni atugassanik annertuunik aammalu ulluinnarni atugassanik pisinissamut taarsigassarsinnermut atuuppoq.

Litra d malillugu akiitsoqartoq aningaasaqarnermut tunngasuni illersorneqarsinnaanngitsumik iliuuseqarsimassaaq, akiligassat annikigisassaannngitsut tassaasimappata pisortanut akiligassat aammalu taakkua

aaqqissuussamik amerliartuaartinneqarsimappata. Pisortanut akiligassat assersutigalugu tassaasinnaapput akileraarutinut akiligassat, meeqqanut akilersuutit aamma ineqarnermut akilersuutit. Akiligassanut aaqqissuussamik amerliartuaartinneqartunut assersuutaasinnaapput, akiitsoqartup ukiut arlallit ingerlaneranni pisortat aningaasaataat "aningaasatut nammineq pisussaaffigisatut" atorsimappagit. Akiligassat taamaattut ilaatigut ilisarnaatigaat, taakkua akiitsoqartumit illuinnaatigut pilersinneqarsimasarmata, pisortat piumasaqaatip pilersimanerata pinngitsoortinnissaanut periarfissaqartinnagit, tassunga ilanngullugu soorlu akiitsoqartup nalunnikkaluarlugu siuortoortumik nalunaarsuinermini kukkusumik immersuisarnera.

Nr. 2-mut tunngatillugu tamatumani atuuppoq naatsorsuutini akiligassaqaarfik "pingaaruteqanngitsuusinnaammatt", akiitsoqartup akiitsuinut tamarmiusunut tunngatillugu aammattaarlu eqqoqqissaartumik naliliinermi. Akiitsoqartumut, katillugit 250.000 kr.-inik akiitsoqartumut, assersutigalugu saniatigut 2.500 kr.-inik taarsigassarsineq nalinginnaasumik pingaaruteqartuunngilaq. Akiitsoqartoq illuatungaatigut kr.-inik millioninik arlalinnik akiitsoqarpat saniatigut taarsigassarsineq taamaallaat akiitsut tamakkerlutik amerlassusiisa procentiminiinnanguannik amerlatigisunik, eqqoqqissaartutulli kisitsisinnorlugit annertuujullutik, pissutsit naapertorlugit, pingaaruteqarsinnaallutik.

Imm. 2, nr. 3-mut

Nr. 3 naapertorlugu isumakkeerinninneq nalinginnaasumik tunniunneqassanngilaq akiligassat ikittuunngitsut pinerluttuliornikkut imaluunniit taarsiivigitinniarnikkut pilersimappata. Akiitsunut pinerluttuliornikkut pilersimasunut aammattaaq suliamik ingerlatsinermut aningaasartuutit assigisaallu pinerluttulerinermik suliasamat tunngassuteqartut naatsorsorneqassapput.

Akiitsoqartoq taarsiivigitinniarnermik imaluunniit pinerluttuliornermik pisoqarnerata kingunitsiannuagut akileraarutinik akitsuusunullu kinguaattoorutinik isumakkeerinninnermik nalunaarfingeqarpat, tamanna ajuallannartuussaaq.

Akiitsut pinerluttuliornikkut imaluunniit taarsiivigitinniarnikkut pilersimappata isumakkeerinninnerup nalunaarutigineqarnissaata tungaanut piffissap sivisussusiani ingerlasimasussami piumasaqaateqarnermi pissutsit sukumiisumik nalilernerat apequtaassaaq. Taarsiivigineqarnissamik piumasaqaat assersutigalugu piaaralunerup imaluunniit ingasattumik mianersuaalliornerup kinguneranik pilersimappat, isumakkeerinninneq mianersuaalliornerminngarnit nalinginnasumit sivisunerusumik mattusimaneqassaaq.

Siunertarineqanngilaq akileraaruseriffiup pisuni taamaattuni piumasaqaateqarnermut tunngavissanik nammineerluni erseqqinnerusumik misissuinissaa imaluunniit naliliinissaa. Pisuni, piumasaqaatip naliliiviginissaanut erseqqinnerusumik allakkatigut tunngavissaqanngitsuni, assersutigalugu eqqartuussummi, akileraaruseriffiup naliliinerani taamaalilluni akiitsoqartup piumasaqaatip pilersimaneranut nassuiaasiaa tunngavilersugaq kiisalu assersutigalugu inummit paasissutissanik atuutisiumasumit paasissutissat nalinginnaasumik tunngavigineqassapput. Pillaammik akiliutit imaluunniit taarsiivigineqarnissamik

piumasaqaatit annertunngitsut nalinginnaasumik imm. 2, nr. 3 naapertorlugu isumakkeerinninnissamut akornutaanngillat.

Nr. 3-mut tunngatillugu tamatumani atuuppoq naatsorsuutini akiligassaqaarfik "pingaaruteqanngitsuusinnaammat", akiitsoqartup akiitsuinut tamarmiusunut tunngatillugu aammattaarlu eqqoqqissaartumik naliliinermi. Akiitsoqartumut, katillugit 250.000 kr.-inik akiitsoqartumut, assersuutigalugu saniatigut 2.500 kr.-inik taarsigassasineq nalinginnaasumik pingaaruteqartuunngilaq. Akiitsoqartoq illuatungaaticut kr.-inik millioninik arlalinnik akiitsoqarpat saniatigut taarsigassarsineq taamaallaat akiitsut tamakkerlutik amerlassusiisa procentiminiinnanguannik amerlatigisunik, eqqoqqissaartutulli kisitsisinngorlugit annertuujullutik, pissutsit naapertorlugit, pingaaruteqarsinnaallutik.

Imm. 2, nr. 4-mut

Nr. 4 naapertorlugu isumakkeerinninnermik nalunaaruteqarnissaq nalinginnaasumik pissanngilaq, akiitsoqartup akiitsuni naafferartumik akilersunngitsoorsimappagit, naak pineqartoq tamatumunnga periarfissaqarluaraluarluni. Akiitsut akilersornissaannut periarfissaq tamanna assersuutigalugu pilersinnaavoq akiitsoqartoq aningaasaticut isertitaqarsimappat akilersuutaasinnaasunik, imaluunniit aamma akiitsoqartumut pensionisiatigut aqqissuussinerit atuutilersinneqarsimappata, tamatumani akiitsoqartup akiitsuminut akiliutissaraluani nammineq atorsimappagit.

Imm. 2, nr. 5-mut

Nr. 5 naapertorlugu isumakkeerinninnermik nalunaaruteqarnissaq nalinginnaasumik pissanngilaq, akiitsoqartoq isumakkeerinnissaq siunertaralugu aqqissuussisimappat. Aalajangersagaq atorneqarsinnaavoq assersuutigalugu akiitsoqartoq kingusinnerusukkut isumakkeerinninnissaq siunertaralugu aqqissuusiniarsimappat isumakkeerinninnissamik qinnuteqaatip nassiutinnginnerani pigisat nalillit akiligassaqaarfinnut toqqorternerisigut.

Imm. 2, nr. 6-mut

Nr. 6 naapertorlugu isumakkeerinninnissamik nalunaaruteqarnissaq nalinginnaasumik pissanngilaq, akiitsoqartoq isumakkeerinninnissamik suliaq aallartereersoq allanik akiligassaqaalersimappat. Tamanna atuutissaaq allaat taarsigassarsianut annikkaluartunulluunniit imaluunniit akiligassaticut kinguaattoorutitut assigisaannulluunniit.

Akiitsoqartup isumakkeerinninnissamik suliaqarnerup nalaani akiitsut isumannaarneqarsimannngitsut naafferartumik akilersorsimappagit tamanna pissutsit najoqqutaralugit imm. 4-mut tunngatinneqarsinnaavoq, tamatumalu kingornagut akileraaruseriffiup isumakkeerinninnissaq itigartitsissutigisinnaallugu, pissutsit allat isumakkeerinninnissamut akerliusut pilersimappata, apequtaatinnagu pissutsit taakkua imm. 2-mi taagorneqarsimanninnerat.

Imm. 3-mut

Pissutsit taagorneqarnerat taanna imm. 2, nr. 2-mi 3-milu siunnersuutigineqartoq aammalu isumakkeerinninnissamut nalinginnaasumik mattussisussa,

ersiutaanngilaq akiitsoqartup pissutsit taakkua pilersimappata ataavartumik isumakkeerinninnissamut immikkoortinneqarneranut. Siunnersuutigineqarpoq akiitsoqalernermit pissutsit akiitsut qanoq pisoqaatiginerannut atasutut nalilerneqartariaqartut.

Aalajangersakkami ersiutaavoq akiitsut nutaajunerugaangata akiitsut pilersimanerannut isumakkeerinninnissamik aalajangernissap oqimaannerusarneranut. Tamanna aamma iliuutsinut imm. 2, nr. 4-mi 5-imilu taaneqartunut tunngatinneqaqrsinnaavoq, tassami iliuutsit taakkua pingaaruteqarnerat aammattaq ukiut ingerlaneranni annikiliartortarmat. Akiitsoqartoq akiitsuminik naafferartumik akilersuinngippat, naak akiitsoqartoq tamatumunnga periarfissaqarlualuartoq, assersuutigalugu ukiut arlallit qaangiunneranni isumakkeerinninnissaq mattunneqarsinnaanngilaq.

Eqqoqqissaartumik killissaq aalajangersarneqarsinnaanngilaq, naatsorsuutini akiligassaqarfik qaqugu imatut pisoqaatigilissanersoq, akiitsoqalerfimmuut tunngasumik pissutsit siunnersuummi imm. 2-mi taaneqartut pingaaruteqarnerat imatut annikillisimatigaluni allaat isumakkeerinninnissaq mattunneqarsinnaajunnaarluni. Akiitsut pisoqaassusiat manna tikillugu akiitsut pilersimaneranni pissutsinut atasutut nalilerneqassapput, tassunga ilanngullugu pissutsit isumakkeerinninnermik mattussisut qanoq imaannaanngitsiginerat.

Akiitsoqartoq naatsorsuutini nutaanerusunik annikitsunik ataasiakkaanik akiligassaqarfepat tamanna imm. 2, nr. 2 litra a naapertorlugu isumakkeerinninnissamik pinngitsoortitsisinnaanngilaq, akiitsut pilersimanerannut naammaginatut tunngavilersuut taaneqarsimappat. Tamanna assersuutigalugu tassaasinnaavoq akiitsoqartoq ilaqutaalu pisariaqartumik inissarsinissaat siunertarlugu taarsigassarsineq. Pisuni taamaattuni pissusissamisuussaaq akileraaruseriffiup piffissap sivitsorneqarnissaa isumaliutigissappagu, tamatumani akiitsoqartup akiitsut ilai akiitsut isumakkeerneqarnerannut ilagitillugit naafferartumik akilersussallugit.

Akiitsut ataasiartup aammalu maanna pisimasup qaangiuttup kinguneranik pilersimappata, assersuutigalugu inuussutissarsiutigalugu suliffittut nakkaattoorneq, taava akiitsut pisoqaassusiata pingaarutaa annikinnerulissaaq.

Taamatulli aamma akiitsoqartoq siornatigut suliassap aallartinnginnerani akiligassaqalersimanini pissutigalugu isumakkeerinninnissamik itigartitaasimasoq, tak. imm. 2, nr. 6, siunissaq tamaat isumakkeerinninnissamut mattunneqassanngilaq.

Taassuma saniatigut imm. 2 malillugu aalajangiinnermi pingaartinneqassaaq akiitsulik taamaallaat imaluunniit annertunerusumik pisortanut akiitsumik kinguaattooqqanersoq. Akiitsulik pisortanut akiitsuisa saniatigut akiitsui allanut akiitsuuppata isumaliutigineqartariaqarpoq akiliisinnaajunnaarneq pillugu peqqussummi malittarisassat malillugit akiitsunik isumakkeerfigineqarnissamut qinnuteqarnissamut innersuunneqassanersoq, taamaalilluni akiitsoqarfiit assigiimmik pineqarnissaat qulakkeerneqarniassamat. Akerlianik akiitsulik annertunerusumik

pisortanut akiitsoqarpat, akiitsoqarfiit assigiinngitsumik nalinginnaasumik pineqarneqariataarsinnaaneq ajorput.

Imm. 4-mut

Inatsisit oqaasertaanni pissutsit nalinginnaasumik isumakkeerinninnissamik mattussisussat taagorneqarpata, pisut allat takkussinnaapput tamatumani isumakkeerinninneq, naak mattussinissamik taagukkat taagorneqartut pigineqanngikkaluartut, taamaattorli sukumiisumik naliliinikkut itigartinneqartariaqarluni. Tamanna tunngavigalugu siunnersuutigineqarpoq akileraaruseriffiup isumakkeerinninnermik nalunaaruteqarnissani itigartitsissutigisinnaasariaqaraa, naak pissutsit imm. 2-mi pigineqanngikkaluartut, pissutsit allat isumakkeerinninnissamut aalajangiisuusussamik akerliusut pigineqarpata.

Aalajangersagaq assersuutigalugu atorneqarsinnaavoq akiitsoqartup imaluunniit akiitsoqartup aappaata imaluunniit inoqaataata inuussutissarsiorsinnaanertik tamakkiisumik atussallugu aalajangersimanngippata assersuutigalugu taamaallaat ullup ilaannaani taamatulluunniit sulisarlutik.

Imm. 5-mut

Isumakkeerinninneq aallaaviatigut inunnut immikkoortinneqarpoq, taamaattorli imm. 6-imut nassuiaatit takukkit. Siunnersuut akiliisinnaajunnaarneq pillugu peqqussummi § 197, imm. 3-mut naapertuuppoq.

Imm. 6-mut

Imm. 6-ikkut taamaattoq ingerlatseqatigiiffiit, peqatigiiffiit, sullissiveqarfiit nammineq ingerlattut, aningaasaateqarfiit assigisaaalu isumakkeerfigineqarnissaat ammaanneqarpoq, pissutsit immikkut ittut tamanna ajornartinngippassuk. Aalajangersagaq taamaallat annikitsuarannguumik atorneqartussatut eqqarsaatigineqartoq assersuutigalugu pisuni soqutiginaateqalersinnaavoq, peqatigiiffik kikkunnulluunniit iluaqusersuiniartoq akileraarutitigut akitsuutitigullu piaarinani akiligassatigut kinguaattooruteqarpat.

Pisut imm. 1-4-mi pineqartut avataatigut inuit isumakkeerinninnermut periarfissaqarput pissutsit immikkut ittut tamanna ajornartinngippassuk. Tamatumunngattaaq atatillugu aalajangersagaq annikitsuarannguumik atorneqartussatut eqqarsaatigineqarpoq. Aalajangersagaq assersuutigalugu isumakkeerinninnermut tunngavigineqarsinnaavoq akiligassat kinguaattoorutit eqqarsartaatsikkut naapaateqalernerup uppersarsarneqarsinnaasup kinguneranik pilersimappata.

§ 54-mut

Aalajangersakkatut siunnersuut malillugu isumakkeerinninnermi akiitsoqartup akiitsuisa atorunnaarnissaat imaluunniit ikilisinneqarnissaat pineqarput. Ikilisitsinnermut atatillugu akiligassanik unitsitsigallarnek aamma/imaluunniit akiitsut isumakkeerneqanngitsut ilaasa naafferartumik akilersorneqarnissaat pillugu

aalajangersagaq aalajangersarneqarsinnaavoq. Piffissami akiligassanik unitsigallarfiusumi aammalu akilersuiffiusumi akiitsut ernialersorneqassanngillat. Aalajangersakkami imm. 1 aamma 2 katillutik akiliisinnaajunnaarneq pillugu peqqussumi § 198-imut naapertuupput.

Siunertaavoq misilittakkat pissarsiarineqartut ilutigalugit akiligassat isumakkeerneqanngitsut ilaasa naafferartumik akilersorneqarnissaat pillugu najoqqutassiat erseqqinnerusut suliarineqassapput, tassunga ilanngullugit akilersuutit piffissallu akilersuiffiusup sivilissusissaat.

§ 55-mut

Siunnersuut malillugu isumakkeerinneq atorunnaassaaq akiitsoqartoq isumakkeerininnermik suliamut atatillugu peqquserluttuliornermut pisuutinneqarpat, assersuutigalugu aningaasarsiat tamaasa nalunaarutigineqarsimatinnagit, imaluunniit akiitsoqartup akiitsumi ilaasa isumakkeerneqanngisut akilersornissaannut atatillugu pisussaaffini annertuumik sumiginnarpagit, assersuutigalugu arlaleriarluni akilersuutissani piffissaagallartillugu akilinngitsoorpagit.

Isumakkeerininnerup atorunnaarnerata kinguneraa akiitsoqartup pisussaaffeqalerneranik akiitsut tamaasa akilernissaannut akiitsut ilaat isumakkeerutaanikut ilaangullugit.

Aalajangersagaq katilluni pingaarnerusutigut akiliisinnaajunnaarneq pillugu peqqussummi § 229, imm. 1-imut naapertuuppoq.

§ 56-mut

Aalajangersakkami aningaasarsianit akileraarutit pillugit inatsimmi § 54 a-mik tungaveqarpoq, pissutigalugu aalajangersagaq innuttaasut akileraaruseriffimmut saaffiginnittarnerannik ilaqartillugu aammattaaq annertusineqarmat, taamatuttaarlu oqartussaaffiup Naalakkersuisunit isumagisassanngortinnissaa siunnersuutigineqarluni.

Imm. 1-mut

Akileraaruseriffiup innuttaasullu akornanni sukkanerusumik attaveqaqatigiittarnissaq naammassiniarlugu kiisalu pappiarat allaffissiat ileqqaarneqarnissaat anguniarlugu siunnersuutigineqarpoq Naalakkersuisut digitalimik attaveqaqatigiinnerup atulernissaanut malittarisassanik aalajangersaasinnaassasut.

Aalajangersagaq ilaatigut akileraarutit A-t qarasaasiakkoortumik nalunaarsorneqartalernissaat pillugu malittarisassat aalajangersarneqarnissaannut tungaviusinnaassaaq.

Aalajangersagaq naatsorsuutigineqarpoq innuttaasut ataasiakkaat digitalimik attaveqaqatigiinnermik atuerusunngitsut eqqarsaatigalugit atorneqassasoq, taamaalilluni nalunaarutit akileraaruseriffiup pineqartumit tigusai tassungalunniit nassiussai digitalinngortinneqartassanatik.

Oqartussaaffiup erseqqinnerusumik atorneqarnissaa digitalikkut periarfissat ineriartorneranni inissisimassaaq.

Imm. 2-mut

Aalajangersakkami ilaatigut tunngavigineqarpoq akileraaruseriffiup allakkat tamanut tunngasut amerlaqisut nassiussuuttarmagit. Siunertamut naleqquttuusinnaanngilaq taakkua tamarmik immikkut atsiortiterneqartassappata.

Hujesterettip 7. juni 2001-imi aalajangiinerani, tamatumalu kingorna Erhvervs- og Selskabsstyrelsenimi ingerlatseqatigiiffiup atorunnaarsinneqarnerani pigisat agguanneqartarnerannik sulialinnut tamanut atuuttumik saaffiginnissuteqarnikkut, allakkat tamanut tunngasut atsiornertaqanngitsut inatsisitigut pingaaruteqarnerisa nalornissutaanerat pilerpoq. Siunnersuutikkut allakkat tamanut atuuttut erseqqinnerusumik suussusiisa nalunaarneqartarnissaanni taamatut nalornissuteqarnerup peerneqarnissaanut periarfissiisoqarpoq.

§ 57-mut

Aalajangersagaq atuuppoq aningaasarsianit akileraarutininik annertussusiliinermut nalinginnaasumut aammalu aningaasarsianiit akileraarutininik nalinginnaasumik immikkullu ittumik annertussusiliinermut atatillugu. Aammattaaq aalajangersagaq atuuppoq akitsuutininik annertussusiliinermut aammalu akitsuutininik immikkut ittumik annertussusiliinermut atatillugu.

Akileraaruseriffik qaqugukkullunniit nammineerluni nalunaarsuiffimi akitsuutinillu nalunaaruteqarnermi kisitsinut uppersaatiginik illuatungerisanut qinnuteqaateqarsinnaapput, assersuutigalugu akiitsugassarsinermi pissutsit pillugit isumaqatigiissutip nassiunneqarnissaanik illuatungerisat qinnuiviginerisigut. Akileraaruseriffik aammattaaq uppersaassutit allat piniarsinnavai, assersuutigalugu pisinnaatitsissut imaluunniit nalunaarut.

Akileraaruseriffiup illuatungerisanik oqaasiinnartigut isumaqatigiinniarnermut aggersaasinnaaneranut oqaasiinnartigut oqaloqatigiinneq allakkatigut atassuteqaqatigiinnermit ilaatigut paasisaqarfiusinnaasarnera pissutaavoq. Oqaatsimi oqaasiinnartigut isumaqatigiinniarnermi aamma pineqarpoq isumaqatigiinniarnarit atortut elektroniskiusut iluaqutiggalugit pisinnaanerat, assersuutigalugu web-cam-ikkut imaluunniit oqarasuaatikkut.

§ 58-mut

Aalajangersagaq akissarsianit akileraarutit pillugit inatsimi § 86-imik ingerlatitseqqinneruvoq, aalajangersagarmi aammattaaq inunnut akitsuutinut akiliisussaataitaasunut suliffeqarfinnullu tunngalersillugu annertusineqarnissaa siunnersuutigineqarmat. Aammattaaq allannguutit erseqqissaataanerusut suliarineqarput.

Imm. 1-mut 2-mullu

Akileraaruseriffiup naatsorsuutininik ingerlataqarnermik misissuisinnaaneranut inuussutissarsiummik namminneq ingerlaqartut aammalu inatsisit naapertorlugit inuit kiisalu naatsorsuuserinerimik namminneerlutik ingerlatsisut ilaapput kiisalu inatsisilerituut aammalu inuit akitsuutinut akiliisussaataitaasut suliffeqarfiillu, naak taakkua inuussutissarsiummik ingerlataqanngikkaluartut. Tamatumuuna akileraaruseriffiup naatsorsuuserinerimut atortussanik piniarsinnaanera aammalu akileraaruseriffiup sumiiffimmi sumiluunniit naatsorsuutininik misissuinissaa naleqquppoq.

Naatsorsuusiordermi atortunik assigisaannillu nassitsisussaataitaaneq atuuppoq apeqqutaatinnagu naatsorsuusiortussaataitaaneq naatsorsuusiortussaataaanginnerluunniit. Naatsorsuutininik nammineq piumasutsimik ingerlataqarnermi aammattaaq atortussat taakkua nassiunneqartussaananerat pineqarpoq.

Atortussat nassiunneqartussatut piumasarineqartut siullermik tassaapput "naatsorsuusiordermut atortut bilagitallit", tamatumani ukiumoortumik naatsorsuutinut naatsorsuusiordernikkut tunngavigineqartut kisimik siunertarineqaratik, tassunga ilanngullugit pappialatigut uppersaataatissat tunngavimmikkut naatsorsuuserivimmi ingerlanneqartartut, aammattaaq eqqussukat nalunaarsorderi, akitsuutit nalunaarsorderi, kassekladder, naatsorsuusiorderup aqqissuussaananera nassuiarnera assigisaallu, kontup assilineri assigisaallu. Nassitsisussaataitaanermi aammattaaq pineqarput akitsuutinut naatsorsuutaasinnaasut imaluunniit kildeskat pillugu naatsorsuutit.

Aammattaaq suliffeqarfik pillugu uppersaatatit pappialat allat nassiunneqarnissaat piunarsaqaataasinnaavoq. Tamatumani tassaasinnaapput allaffigeqatigiittarneq, isumaqatigiissutit, naatsorsueqqissaarnerit, aktiaatillit allattorsimaffii, aktiaatilinnut/piginneqataassutinullu isumaqatigiissutit assigisaallu kiisalu kukkunerisuisut nalunaarutaat aamma kukkunerisuisut oqaaseqaataat.

Aalajangersakkami pineqarput naatsorsuusiordermi atortussat bilagitallit piffissamut naatsorsuusiorderfiusumut siullermut ingerlaavartumullu tunngasut, tassunga ilanngullugu piffissaq akitsuuteqarfiusoq. Akileraaruseriffik taamaalilluni assersuutigalugu periarfissaqarpoq akileraartartup ukiumut isertitaqarfiusumut kingullermut naammassineqartumut naatsorsuutaasa misissuataarnissaanut takussallugulu taakkunani naatsorsuuteqarfiit oqimaaqatigiissinneqartutut nalunaarsimasut ukiumut ingerlasumut naatsorsuusiordermut naapertuuttuunersut.

Naatsorsuusiordermi atortut assigisaallu taamaallaat naatsorsuusiordermut tunngasut nassiunneqarnissaat piunarsaqaatigineqarsinnaavoq, nassitsisussaataitaanermili

assersuutigalugu aammattaaq pineqarlutik atortussat "ungasissumi sulineq pissutigalugu sulisup namminerisaminik najugaaniittut, imaluunniit atortussat naatsorsuusiorneq pissutigalugu nunami allami suliarineqartut, nunami allamiittut.

Atortussat nassiunneqarnissaat piumasaqaatigineqarsinnaavoq, taakkua akileraarusiinissamut aammalu akitsuutinut akiliisussaataitanerup annertussusilerneqarnissaanut pingaaruteqarsinnaappata. Taamatut oqaasertaliinermi siunertarineqarpoq akileraaruseriffiup paasissutissat naatsorsuusiornermi atortussani takuneqarsinnaasut, akileraartussaataitasut allat akileraarutaasa annertussusilerneqarnissaasa nakkutigineqarnissaannut kiisalu akitsuutinut tunngasut atorsinnaammagit. Akileraaruseriffik akileraartussaataitasut allat akileraarusiiffigineqarnerannut akitsuusiiffigineqarnerannullu tunngasut nakkutigineqarnissaannut paasissutissat pissarsiarinissaannut taamaalilluni periarfissaqarpoq.

Atortussanik akileraarusiinissamut atugassanik nassitsisussaataitaneq inuussutissarsiummik ingerlataqartut kikkulluunniit nunamut maanga tamakkiisumik ilaannakortumilluunniit akileraartussaataitasut pisussaaffigaat. Taamaaqataanik inuussutissarsiummik ingerlataqartoq kinaluunniit akileraaruseriffimmut atortussanik nassitsinissaminut pisussaataitavoq, apeqqutaatinnagu pineqartoq nunami maani najugaqarnersoq angerlarsimaffeqarnerorluunniit, nunami allamiinnersoq, Savalimmiuniinnersoq Danmarkimiinnersorluunniit.

Atortussat nunami allami, Savalimmiuni Danmarkimiluunniit suliffeqarfimmut tunngasut nassiunneqarnissaat piumasaqaatigissagaanni naatsorsuutigineqassaaq tamanna nunatsinni maani akileraarusiisarnerup imaluunniit akitsuutinut tunngasut nakkutigineqarnissaat siunertaralugu pissasoq. Taamaattorli Kalaallit Nunaata nunani tamalaani akileraarutitigut suleqateqarnerani tamanna ilaasutut aatsaat tamatumunnga pisussaaffeqarpat.

Inuussutissarsiummik nammineerluni ingerlatsisup qinnuigineqarnera naapertorlugu naatsorsuusiornermi atortussanik assigisaannillu akileraaruseriffimmut nassitsinissaanut pisussaataitaneq taamatulli inummut inatsisilerinermik suliaqartumut kimulluunniit aammalu akitsuutinut pisussaattumut kimulluunniit atuuppoq, apeqqutaatinnagu taakkua inuussutissarsiummik ingerlataqartuunersut ingerlataqartuunnginnersulluunniit.

Imm. 3-mut

Naatsorsuusiornermi atortut assigisaallu kissaatigineqartut inummi allamiippata, assersuutigalugu kukkunersiuisumi, akileraaruseriffiup atortussat inummit allami pineqartumit piniarsinnaavai. Akileraaruseriffiup taama pisoqartillugu atortussat atoreerunigit inummut tassunga utertillugit nassiunneqarnissaat isumagissavaa.

Imm. 4-mut

Naatsorsuuserinermi atortut il.il. nassiunneqarnissaasa piumasarineqarnerannut taarsiullugu akileraaruseriffiup suliffeqarfimmi naatsorsuusiornermik misissuineq ingerlassinnaavaa, tamanna pisariaqartutut nalilerneqarpat. Taamatut misissuissagaanni aalajangersimasumik naliliinissaq tunngavigineqassaaq.

Naatsorsuusiortoq/inuussutissarsiummik ingerlataqartoq misissuineranut atortut atornerannut nalinginnaasumik piunasaqaatissaqanngilaq, akileraaruseriffik misissuineranut atortut taakkua atornerannut pisariaqartoq naliliippat aammalu inatsimmi aalajangersakkamut innersuussippat taakkunani misissuineranut atortussat allassimammata.

Suliffeqarfimmut takuniaanissaq pisariaqartoq naliliisoqarpat sulissutigineqassaaq misissuilluni takuniaanissami inuussutissarsiummik ingerlataqartup ulluinnarni sulinera akornuserneqassanngitsoq. Taamaattumik ilaatigut sulissutigineqassaaq suliffeqarfimmut takuniaaneq suliffeqarfimmik siumoortumik isumaqatigiissuteqarnikkut aammalu taanna suleqatigalugu pissasoq. Nalunaaqqaarani suliffeqarfimmik takuniaaneq taamaallaat pissaaq misissuinerani siunertarineqartoq suliffeqarfimmik siumoortumik ilimasaarereernermit maangaannartinneqarpat.

Siunnersuutigineqarpoq akileraaruseriffiup misissuiernermini uppersaammik eqqortumik takutitaqarnissaa erseqqissarneqassasoq. Kikkut oqartussaasuusut atorfilittap sinniisuuffiginerai, kiisalu pineqartup kinaaneranut uppersaat piunasaqaatitaqanngitsumik takutinneqassaaq.

Siunnersuut malillugu akileraaruseriffiup suliffeqarfimmik misissuinerani eqqartuussisut aalajangiinngikkaluartut ingerlanneqarsinnaavoq.

Naatsorsuuserinermit atortut assigisaasalu misissorneqarnerat "sumiiffimmi sumiluunniit" pisinnaavoq. Aalajangersakkami akileraaruseriffik taamaallaat illuummi tassani ininilu taakkunani naatsorsuuserinermit atortut nalinginnaasumik toqqortarineqarfiini misissuisinnaatitaavoq. Suliffeqarfimmi mikinerusuni amerlanertigut illuutit inuussutissarsiornermut tunngasortaa namminerisamullu tunngasortaa erseqqissumik avissartinneqartanngillat, tassami "allaffissorneq" amerlanertigut "namminerisami" ingerlanneqartarmat. Pisuni taakkunani akileraaruseriffik aalajangersagaq naapertorlugu illup ilaanut allaffissorfiusumut naatsorsuuserinermit atortut toqqortarineqarfiannut isersinnaatigaavoq. Naatsorsuuserinermit atortut il.il. sulisup nammineq najugaaniippata, assersuutigalugu "ungasissumi sulinerup" kinguneranik, aamma akileraaruseriffik sulisup najugaata ilaani, naatsorsuuserinermit atortut assigisaasalu toqqortarineqarfianni misissuinissaminut periarfissaqarpoq.

Inini namminerisamik ineqarfinni imaluunniit sukisaarsaartarfinni qaqutigooortumik misissuinissaq pisariaqartoq naliliisoqarpat, tamanna illumi misissuineq pillugu eqqartuussisarnermit inatsimmi kap. 5-imi tassungalu ilanngullugu § 11-mi malittarisassat naapertorlugit pissaaq, tamama kingorna misissuineq inuup taassuma aallartiffigineqartussap akuerinngippagu, tamanna tunngaviatigut taamaallaat eqqartuussisup aalajangiineratigut pissaaq.

Aammattaaq ornigulluni misissuinerani akileraaruseriffiup eqqarsaatigineqarnissaa tunngaviussaaq. Akileraaruseriffik isumaqarpat paasissutissat inummut allamut tunngasut akileraaruseriffiup pingaaruteqartut atortussat misissuataarneranni takkuttut, akileraaruseriffiup tamanna atorniarsinnaavaa.

Akileraaruseriffiup aningaasat uninngasuutit assigisaallu imminnut amerlaqatigiinnersut naatsorsorsinnaavai. Oqaaseq "assigisaallu" "aningaasat atoriaannaat" saniatigut aningaasanut atorneqarsinnaasunut tamanut atuuppoq.

Taamaallaat inuussutissarsiummik ingerlataqartut ingerlatsinermi pigisat nalillit sumiiffimmi naatsorsornissaat nalilernissaallu pisinnaatitaaffigaat. Aalajangersagaq inuussutissarsiummik ingerlataqartunut naatsorsuusiortuunngitsunut aammalu inuussutissarsiummik annikinnerusumik ingerlataqartunut immikkut pingaaruteqarpoq.

Siunnersuutigineqarpoq erseqqissarneqassasoq inuussutissarsiummik ingerlataqartoq suliffeqarfimmilu sulisut misissuinerup ingerlanneqarnerani pisariaqartumik ikiuullutillu siunnersuissammata.

Imm. 5-mut

Naatsorsuusiordermi atortunut il.il. isersinnaanermi atortussat sumiinnerat apeqqutaanngilaq. Taamaalilluni aammattaaq atortussanut qarasaasianiittunut isersinnaaneq periarfissaavoq. Tamanna atuuppoq apeqqutaatinnagu akileraaruseriffik naatsorsuusiordermut paasisutissanik inuussutissarsiummik ingerlataqartumit/naatsorsuuserisumit imaluunniit inummit allamit piniarsimanersoq imaluunniit suliffeqarfimmi misissuisimanersoq. Akileraaruseriffiup taamaalilluni toqqarsinnaavaa qarasaasiakkut paasisutissanut qarasaasiakkut isersinnaanarluni, assersuutigalugu paasisutissat qarasaasiakkut nassiunnerisigut.

Imm. 6-mut

Imm. 6-imi missingersuummik annertussusiliinissamut inatsisitigut tunngavissaq erseqqissoq inissineqarpoq, tamatumani akileraartussaataasup naatsorsuusiordermi atortunik atugasseeqqinnissamik qinnuteqarneq naalakkumanngippagu. Taamaattorli missingersuummik annertussusiliinermi naatsorsuutigineqassaaq, naatsorsuutiniq misiliinissap pinngitsoortinneqartup assersuutigalugu nammineerluni nalunaarsuinermi imaluunniit akitsuutit nalunaarutigineqarnissaanni uppernassuseqarneq annikillerujussuassammat.

Imm. 7-mut

Eqqartuussisut aalajangiinngikkaluartut politiit ikiuussinnaapput inuussutissarsiummik ingerlataqartup/naatsorsuuserisup najukkaminut akileraaruseriffik misissuiartortoq isersinnaatinnngippagu. Politiit suliassaat taamaallaat tassaavoq misissuinerup ingerlannissaani inuit akornusersuisinnaasut pinngitsoortissallugit. Akileraaruseriffik tunngavilersuutitalimmik ilimasuttariaqarpoq pissarsisinnaaneq nangarneqarsinnaasoq, imaluunniit misissuinerup immikkut ittuunera peqqutigalugu ajornartorsiutaalersinnaammat, takuniaanerup aallartinneranit politiit najuuttariaqassammat, misissuinerup aallartinneqarnerani politiit ikiuuteqqullugit aggersarneqarsimappata.

Aalajangersagaq siusinerusukkut maannamullu isumaqatigiissuteqarnikkut atuutsinneqarsimangilaq. Pissutsini piviusuni politiit pisariaqartinneqarfinni atorfissaqartinneqartillutik akuersaarumasarsimanginnermik tusarliussisarsimangillat.

§ 59-mut

Imm. 1-mut

Nutaatut erseqqissaatit aalajangersakkatut siunnersuutigineqarpoq, kinaluunniit suliffeqarfiutiminut atatillugu akileraaruseriffimmut nalunaaruteqarnerminut atatillugu tamatumunnga tunngasut naatsorsuuserineq pillugu inatsimmi naatsorsuutininik assigisaannillu, aamma niuernermi uppersarsaatit, toqqorsisarneq pillugu malittarisassat naapertorlugit toqqorsimassavai. Tamanna atuuppoq, pineqartoq naatsorsuuserisussaataappaat naatsorsuuserisussaataaangippalluunniit.

Nalunaarsuisussaataaasoq naatsorsuuserisussaataappaat, paasissutissallu nalunaarsuisussaataaasup naatsorsuutaanut ilaappata, naatsorsuusiorneq ima aaqqissuunneqassaaq, paasissutissat nalunaarutigineqartut naatsorsuutininut tulluussarneqarsinnaallutik.

Akileraartarnermi aalajangersagaq assersuutigalugu atuuppoq sulisitsisunut isertitat A-t akilernerqarsimasut nalunaarutigineqarnerini. Akitsuusersuinermi aalajangersagaq assersuutigalugu nioqqutissanik eqquusuinermi nalunaarusiornermut atatillugu atorineqartarpoq.

Imm. 2-mut

Nalunaarsuisussaataaasup akileraaruseriffiup piumasaqarneratigut najoqqutassat paasissutissanut nalunaarutigisassanut tunngaviusut nassiuttussaavai.

Imm. 3-mut

Akileraaruseriffiup, pisariaqartutut nalilerneqarpat, qaqugukkulluunniit kinaassutsimik uppersarsaatigartumik eqqartuussivimmit akuerineqaaqaarani naalunaarsuisussaataaasup najoqqutassaatai misissorsinnaavai. Misissuinermi piginnittoq sulisuilu akileraaruseriffik pisariaqartitaanik iltersuutissavaat.

Aalajangersimasumik naliliinermi apeqqutaavoq taama misissuinissaq pisariaqartutut nalilerneqarnerneq. Nalunaarsuisussaataaasoq nalinginnaasumik misissueriaatsit atorineqarnissaat allatut tunngavilersussallugit piumasaqarsinnaasannigilaq, taamaallaat misissueriaatsip taassuma atornissaa akileraaruseriffiup pisariaqartutut nalilerpagu, misissueriaaserlu pillugu inatsimmi aalajangersagaq innersuussutigiguniuk.

Suliffeqarfimmut takuniaanissaq pisariaqarsorinarpat, eqqarsaatigineqassaaq misissuiar-tornermi inuussutissarsiutilik suliaanik akornusersorneqanninnissaaq. Taamaammatt ilaatigut anguniarneqassaaq suliffeqarfik siumut isumaqatigeqqaarlugu suleqatigalugulu takuniaasoqartassaaq. Kalerreeqqaarani suliffeqarfimmut misissuiartorneq taamaallaat pisassaaq, suliffeqarfik siumut kalerrereerlugu misissuiartorneq maangaannartussatut isumaqarfigineqarpat.

Erseqqissaatit siunnersuutigineqarpoq akileraaruseriffimmit misissuiartortoqarnerani kinaassutsimik uppersarsaatit takutittarnissaat. Uppersarsaatit takutinneqassaaq atorfillip pisortat kikkut sinniisuuffiginerai,

kiisalu nammineq kinaanini uppersarlugu. Kinaassutsimik uppersarsaat piuffigineqarani takutinneqassaaq.

Siunnersuut malillugu akileraaruseriffik eqqartuussivimmit akuerineqaqqaarani suliffeqarfimmut misissuiartorsinnaavoq. Inatsisit atuuttut malillugit tamanna aamma pisinnaatitaassutaavoq.

Najoqqutassanik misissuineq "sumiiffimmi" pissaaq. Aalajangersakkami taamaallaat akileraaruseriffik misissuisinnaatitaavoq illumi ininilu suliffeqarfiup ingerlanneqarfiani, soorlu inini najoqqutassat toqqorsimaneqarfiini. Suliffeqarfinni minnerusuni illu inuussutissarsiorfittut ingerlatsivik namminerlu angerlarsimaffik erseqqissumi avinneqartanngillat, allaffissorneq "angerlarsimaffimmi" ingerlanneqakkajuttarmat. Taamaattoqartillugu aalajangersagaq malillugu akileraaruseriffik illumi allaffissornermik ingerlatsiviusumi kiisalu naatsorsuutitigut najoqqutassat il.il. toqqorsimaffiani isersinnaavoq. Najoqqutassat sulisup angerlarsimaffianiippata, soorlu "ungasianit sulineq" peqqutigalugu, akileraaruseriffik sulisup angerlarsimaffiani najoqqutassat uninngatinneqarfiani misissuiartorsinnaavoq.

Qaqtigoortumi pisartuni inini angerlarsimaffiusumi imaluunniit sunngiffimmi illuararisami misissuinissaq pisariaqassappat, eqqartuussisarneq pillugu inatsisip kap. 5-iat naapertorlugu misissuisarneq pillugu malittarisassat malillugit pisassaaq, misissuineq misissuiffigisassami piginnittoq akuersaanngippat, najoqqutassavaq taamaallaat eqqartuussisup aalajangiineratigut pisinnaavoq.

Aamma ornigullu misissuinermit tunngavigisami akileraarnermi amerlassusiliineq eqqarsaatigineqassaaq. Najoqqutassanik misissuinerup nalaani inummut allamut paasisutissat pisariaqartitat akileraaruseriffiup naammattoorpagit, tamanna tassani atornerarsinnaavoq.

Erseqqissaatissatut siunnersuutigineqarpoq suliffiutilik suliffimmilu sulisut akileraaruseriffiup misissuinerani sapinngisamik ikiussagaat ilitsersorlugulu.

Imm. 4-mut

Najoqqutassat qanorluunniit isikkoqaraluarpata pissarsiarineqarsinnaassapput. Taamaalilluni najoqqutassat aamma qarasaasiamiittut iserfigineqarsinnaallutik. Tamanna atuppoq akileraaruseriffiup najoqqutassat suliffiutilimmut /naatsorsuuserisumut allamilluunniit nassiteqquneqaraluarpata, imaluunniit misissuineq suliffeqarfinni isumagineqarpat. Taamaalilluni akileraaruseriffik paasisutissat elektroniskiusut iserfigisinnaanissaannik aalajangersinnaavoq, soorlu qarasaasiaq aqqutigalugu paasisutissanik nassitsinnikkut.

Imm. 5-mut

Nalunaarusiortussaataasup akileraaruseriffik sumiiffimmut misissuinissaanut iseqqunngippagu politiit eqqartuussivimmit akuerineqaqqaaratik ikiuussinnaapput. Politiit taamaallaat suliaassaraat misissuinerup ingerlannerani assersuinissat pitsaaliornissaat. Akileraaruseriffik tunngavissaqartumik ilimasussinnaapput isertinneqarnissaq itigartitsissutigineqassasoq, imaluunniit misissuinerup immikkut

ittuunera peqqutigalugu ajornartorsiortitsisoqassasoq, taamaalilluni politiit takuniaanerup aallartinneranit najuuttariaqassallutik, misissuinerup aallartinninnerani politiit ikiortissarsiarineqarsimagunik.

Aalajangersagaq siusinerusukkut maannamullu isumaqatigiissuteqarnikkut atuutsinneqarsimangilaq. Pissutsini piviusuni politiit pisariaqartinneqarfinni atorfissaqartinneqartillutik akuersaarumasarsimanginnermik tusarliussisarsimangillat.

§ 60-mut

Imm. 1-mut

Siunnersuutigineqarpoq inuit selskabini minnerpaamik 25 procentinik piginneqataassuteqartut imaluunniit taasinnermi nalinik tamarmiusunik 50 procentit sinnerlugit pigisaqartut (amerlanerussuteqartunik aktiaatillit) akileraaruseriffiup aalajangerneratigut piginneqataassuteqarnerup taassumalu katissimalluni aappaata ingerlatseqatigiiffiullu akornanni isumaqatigiissutit pingaarutillit paasissutissiissutigissavai. Taamattaq inuit nunamut maanga tamakkiisumik akileraartussaangitsut piginneqatigiiffik nunami maani angerlarsimaffeqarpat piginneqataassuteqarnerup ingerlatseqatigiiffiullu pineqartup akornanni aningaasarsiornikkut isumaqatigiissutit pingaarutillit pillugit paasissutissiissapput. Taamattaq atuuppoq inunnut tamakkiisumik akileraartussaataitaasunut, marloqiusamik akileraartarneq pillugu isumaqatigiissut malillugu nunami allami angerlarsimaffeqartutut naatsorsuussaasunut (marloqiusamik qullersaqarfeqarneq).

Siunnersuummi tunngavigineqarpoq illuatungaatigut aalajangersimasumik nalilerneqarpat, akileraartussaataitaasup pineqartup pisuussutai pillugit saniatigut paasissutissanik pissarsinissaq pisariaqassappat. Allatut oqaatigalugu, paasissutissanik pissarsiniarluni misissuinissaq pisariaqassaaq, soorlu piginneqataassuteqarnerup taassumalu aktieselskabip pigisaata akornanni niunernerme atugassarititaasut nalinginnaat eqquutsinnagit niuertoqarsimanersoq ilimagineqarpat. Illuatungaatigut piumasaqaataangilaq akileraaruseriffik akileraartussaataitaasumut tunngavilersortariaqanngilaq, oqartussaasut sooq isumaqarnerisut pisuussutit pillugit saniatigut paasissutissanik akileraartartumit atorfissaqartinneqarnerisut. Taama piumasaqarneq pisut malilugit akileraartartup aningaasaqarnera pillugu misissuinissami paasissutissanik pissarsiniarnermi siunerta maangaannartussaavoq.

Piumasaqaat eqqarsaatigalugu tamatuma saniatigut malugineqassaaq, piginneqataassuteqarnerup taamaassappat piginneqataassuteqarnerusup taassumaluunniit katissimallugu aappaa kiisalu ingerlatseqatigiiffiup piginneqataassuteqarnerup aquataata akornaanni pingaarutilinnik isumaqatigiittoqarsimanersut pillugit paasissutissiissasoq, paasissutissanilu minnerpaamik ersissaaq isumaqatigiissut qanga pisimanersoq, isumaqatigiissutit suunersut, kiisalu isumaqatigiissutip imarisai pingaarnerit, soorlu isumaqatigiissutip suuneri aningaasaqarnikkullu qanoq annertutiginersut.

Piginneqataassuteqarnerup aallaqqaammut aalajangissavaa pingaaruteqarnertut piumasaqaat eqquutsinneqarnerisq. Isumaqatigiissutilli ilaat pingaaruteqartutut isumaqarfigneqartuarsinnaapput. Pingaartumik tassaasarput piginneqataassuteqarnerup taassumaluunniit katissimallugu appaata ingerlatseqatigiiffiullu atorfitsitsineq, taarsigassarsineq, attartorneq illumillu tunniussineq pillugit isumaqatigiissutit. Pigisanik tunniussineq aningaasaqarnikkut isumaqatigiissutaasinnaavoq pingaarutilik paasissutissiisussaataitanermut ilaatinneqartoq. Piginneqataassuteqarnerup ingerlatseqatigiiffiullu niueqatigiinnermi ingerlaavartumik akiitsoqatigiippata, suleqatigiinnissamik isumaqatigiissut immi ilaavoq, akerlianik isumaqatigiissut naapertorlugu niueqatigiinnerit ataasiakkaat ilaatinneqaratik.

Aamma isumaqatigiissutit ingerlaavartumik akiitsoqatigiinnermut ilaasut niueqatigiinnermilu atugassarititaatut nalinginnaasut malillugit, paasissutissiisutigineqassapput, naak isumaqatigiissutit taamaattut aktieselskabeqarnerup imaluunniit anpartsselskabeqarnerup pillugu inatsit naapertorlugu allakkatigut saqqummiussisarnissaq pillugu piumasaqaatinut ilaanngikkaluartut.

Piginneqataassuteqarnerup ingerlatseqatigiiffiullu akornanni isumaqatigiissutit pingaarutillit taakkaluunniit allannguutat paasissutissiisutigineqassapput, apeqqutaatinnagu ukiup akissarsiorfiusup ingerlanerani piginneqataassuteqarnerusutut qanga atuutilersimansoq.

Pisuussutit pillugit ilassutit paasissutissanik akileraartussaataaasoq piumaffigineqarsinnaavoq, ukiumi akissarsiorfiusumit siuliiniillu, paasissutissat taamaattut ukiumut akissarsiorfiusumut akileraartut amerlassusilernissaannut pingaaruteqarsinnaappata, oqartussallu allanngortissinnaasaat, takuk §§ 47, 48, 51 aamma 52.

Imm. 2-mut

Siunnersuut malillugu akileraaruseriffiup akileraartartoq piumasaqarfiginnaavaa piffissap naammaginatup iluani ilassutit paasissutissanik tunniusseqqullugu. Piumasaqarnermi ukiut siulii ilanngunneqassappata piffissaliussaq tupinnanngitsumik sivisunerussaaq. Akileraartartup piffissaliussap sivitsorneqarnissaanik qinnuteqaataa nalinginnaasumik akuerineqartariaqarpoq, piffissaliussaq akileraaruseriffiup taggissimasaa akileraartartup taassumaluunniit kukkunersiuisuata sulinngiffeqarnerat nalaarpagu, imaluunniit akileraartartup kukkunersiuisuata ulapinnera nalaarpagu.

Taamattaq isertitassat eqqoriarlugit tagginneqarsinnaapput paasissutissat akileraaruseriffiup piffissaliussaa eqqorlugu takkussimanngippata.

§ 61-mut

Inuit inuttut inatsisilernermiluunniit attuumassutillit aningaasaqarnerat imaluunniit inuussutissarsiormut tunngasut pisortani oqartussanit allanit pissarsiniarnissaanik Naalakkersuisut akileraaruseriffik pisinnaatissinnaavaat, akileraarutininik

naatsorsuinnermut imaluunniit Namminersornerusut kommunilluunniit pissarsiassaannik akiliisitsiniarnermut pingaaruteqarpata, inuit pineqartut pillugit akileraaruseriffiup paasissutissaataasa ataqatigiissinneqarnissaat siunertaralugu.

Aalajangersagaq malillugu akileraaruseriffik aningaasarsiornermut inuussutissarsiornermulluunniit tunngasut pillugit paasissutissanik taamaallaat pissarsiniarsinnaavoq, taamaallaallu paasissutissat suliamut tunngassuteqarpata naammappatalu, akileraarutit eqqortumik naatsorsornissaannut imaluunniit Namminersornerusut kommunilluunniit pissarsiassamik akilersinniarnerinut aatsaat iluaqutaassappata.

Pisortat sulianik suliarinnittarnerat pillugu inatsisartut inatsisaata § 28, imm. 1-iani taaneqartut malillugit inuinnarnut tunngasut pillugit paasiniaasinnaanerit pisinnaatitaanermut ilaangillat.

Nalunaarsuutini ataqatigiissitsisarnermi malittarisassat nalinginnaasut aalajangersakkap aqunneqarnerani atorneqartassapput.

Oqaaseqatigiit " akileraarutit naatsorsornissaannut imaluunniit Namminersornerusut kommunilluunniit pissarsiassaminnik akilersinniarnerinut pingaaruteqarpata", naatsorsuinissamut akiliisitsiniarnissamullu immiini taamaallaat atuutinngilaq, aammali akileraaruseriffik misissuisinnaaniassammat paasissutissat kukkusut pitsaaliornisarlugit imaluunniit sunniuteqartumik akiliisitsiniarnissamut atorneqassalluni. Taamaalilluni aningaasaqarnikkut inuussutissarsiornikkulluunniit tunngasunik paasissutissanik qarasaasiakkut pissarsinissamut akileraaruseriffik periarfissinneqassaaq, ingerlaavartumik misissuinikkut ujaasinermi atugassanik.

Akileraaruseriffiup pisortanit allanit paasissutissanik nalunaarsukkanik pissarsinnaanerit ilaatigut pisinnaavoq qarasaasiakkut paasissutissat nalunaarsukkat toqqorsimaffiitut iserfiginerisigut, taamallu paasissutissanik qarasaasiamut toqqortikkanik pissarsiorsinnaallutik, soorlu diskette, cd-rom imaluunniit paasissutissat immiunneqarfii atorlugit.

Paasissutissat ataqatigiissinneqarnerat pillugu inuit pineqartut toqqaannartumik ilisimatinneqassanngillat.

Pisortat allat nalunaarsuutaat paasissutissanik akileraaruseriffimmi nalunaarsorsimasuni ataqatigiissitsinissaq siunertaralugu akileraaruseriffiup atorsinnaasai pillugit assersuutitut taaneqarsinnaapput:

- Isumaginninnikkut pisartagallit nalunaarsorsimaffii.
- Pisat amerlassusiinik nalunaarsuutit.

Pisortat paasissutissanik nalunaarsukkanik akileraaruseriffiup pissarsineranut atatillugum tunniussinermi aningaasartuuteqassappat namminneq akilissavaat, akerlianik akileraaruseriffik paasissutissanik tamakkunannga pissarsinermini suliarinninnerminilu aningaasartuuteqassaguni nammineq akilissavai.

§ 62-mut

Imm. 1-mut

Aalajangersagaq malillugu inuit inuttut inatsisilerinikkullu akisussaasut akileraarnikkut kiffartuussusunilluunniit assigisaannik pisortanik annaasaqartitsisimasut imaluunniit annaasaqartitsiniarsimasut pillugit akileraaruseriffik nalunaarsuisinnaavoq, taassuma ataani aningaasarsianit akileraarutit akitsuutillu.

Aalajangersakkami siunertarineqarpoq akileraartarneq pillugit inatsimmik unioqqutitsiniarnerit pitsaaliornissaat kiisalu pisortanut akiligassanik allanik, kiisalu akileraartarneq pillugu inatsimmik unioqqutitsinernik paasiniaanerni peqataaneq.

Oqaatsimi pisortanut akiligassani assersuutigalugu pineqarpoq aningaasarsianit ilanngaanissamik akiliisitsiniartartup peqqussuta, ATP-mut tapiissutitut akiliutit assigisaallu.

Nalunaarsuutit atorlugit akileraaruseriffik inuit ingerlatseqatigiiffillu akileraarutininik akiliinngitsoornissaannik aarlerinaatillit kikkunerit pillugit ilimasaarneqarsinnaavoq. Taamaalilluni akileraaruseriffiup suliassat samminissaannut pitsaannerusumik piareersarsinnaavoq, suliassani inuit ingerlatseqatigiiffillu taamaattut peqaataaffigisaanni, kiisalu pisuni inatsisinik unioqqutitsiffiusuni imaluunniit unioqqutitsiniarsarisunik paasisaqarniarluni.

Nalunaarsuummut ilanngunneqassaaq pineqartoq akileraarutitigut pisortanik annertuumik annaasaqartitsisimappat annaasaqartitseriarsimappalluunniit. Ilanngunneqarnermi allaffissornikkut aalajangertoqarsimassaaq imaluunniit eqqartuussuteqarsimassalluni, toqqaannartumik toqqaannanngitsumilluunniit paasineqarsimalluni pineqartoq taaneqartuni pisortanik annaasaqartitsisimappat imaluunniit pisortat taamaattunik annaasaqarteriarsimappagit. Aalajangiisimanerup taassuma inaarsimanissaa piumasaqaataangilaq.

Annaasaqartitsisimanerup malitsigisaanik nalunaarsorneqarneq piumasaqaataangilaq, pineqartorlu piaraluni imaluunniit sakkortuumik mianersuaalliornikkut iliuuseqarsimasoq. Nalunaarsuineq pisinnaavoq, paasineqarpat pisortat pineqartumit annaasaqartitsisimappat. Tassunga atatillugu annaasaqaatigineqartut pinngitsaaliissummik akilersinniarlugit tunniunneqarsimappata.

Misiligutini nalunaarsuinissamut tunngaviussaaq pineqartoq pisortat annertuumik annaasaqartinniarsimagai, pineqartorlu ilisimasanik iliuuseqarsimasoq.

Taama misiliinermi naammangilaq, pineqartoq assersuutigalugu malittarisassat nalorninartut imminut iluaquserniarluni kukkusumik paasisimappagit imaluunniit akileraarutissat naatsorsorsimallugit iluanaaruteqarniarluni sapinngisamik annikinnerpaamik akileraarnermik kinguneqartumik. Paasineqarpalli pissutsit pingaarutillit nipangiussimaneqarsimappata imaluunniit paasiuminaassarsimappata,

misiligummik nalunaarsorneqarnissamut peqqutissatut naammassinnaapput. Tamanna immikkut atuuppoq inuk assersuutigalugu akileraarnikkut akuerineqarsinnaanngitsumik aaqqissueqataasimappat.

Nalunaarsorneqarnissamut tunngavittut assersuutit tassaasinnaapput eqqartuussutit pineqaatissiissutit, allaffissornikkut akiliisitaanissamik aalajangerneq, taarsiisussaataasutit eqqartuunneqarnq, imaluunniit akuerineqarsinnaanngitsumik akileraarnikkut aaqqiinissamut neqerooruteqarsimasutut paasineqarneq.

Annarsuutimik annaasaqartitsineq annaasaqartitsiniarnerluunniit pillugu piumasaqaammi aningaasat imminni amerlangaatsiassammata. Misiligutini pisortat annaasaqarsinnaanerat naatsorsoruminaassinnaavoq, annaasaqartitsisoqarsimappalli najoqqutassat piumasaqaataassaaq aningaasat ataatsimut isigalugit 50.000 kr. ataassimassanngikkai.

Paasissutissat nalunaarsorneqartut tassaassapput pineqartup kinaaneramik paasissutissat kiisalu nalunaarsorneqarnissamut tunngaviit pillugit paasissutissat. Inuup inatsisitigut akisussaasup kinaassusianik nalunaarsuinermit atatillugu, tassaasinnaavoq inuk ataaseq ikittulluunniit inatsisitigut akisussaasut, soorlu assersuutigalugu aktieselskabi piginneqataassuseqarnermit pigineqartoq, pineqartup inuttut inatsisitigulluunniit akisussaasup kinaassusia nalunaarsorneqarsinnaavoq.

Nalunaarsuinermit malittarisassat nalinginnaasut, paasissutissannik atuineq ingerlatitseqqinnerlu nalunaarsuineq pillugu inatsit atuuttoq malinneqassaaq.

Akileraaruseriffik paasissutissanik akisussaasutut aalajangissaaq inuup inuttut inatsisitigulluunniit akisussaasup nalunaarsorneqarnissamini piumasaqaatit eqquutsinnerai. Nalunaarsorneqarneq pillugu tassungalu tunngailersuutit pillugit pineqartoq akileraaruseriffiup nalunaarfigissavaa, nalunaarsuineq ilutigalugu.

Nalunaarsuinissamik akileraaruseriffiup aalajangiinera Skatterådimut naammagittaalliutigineqarsinnaavoq, takuuk § 2, imm. 1.

Imm. 2-mut

Nalunaarsuineq malittarisassat malillugit akileraaruseriffiup isumagisinnaasaa piffissatigut killeqarpoq. Taamaalilluni nalunaarsorneqarneq pissutsit nalunaarsuinermit tunngaviusut paasinerannit ukiut tallimat sinnernerini pisinnaanngilaq. Taamattaq nalunaarsorneqarneq pissutsit nalunaarsuinermit tunngaviusut paasinerannit ukiut tallimat qaangiunnerini peerneqassaaq, tamanna sioqqullugu nalunaarsorneqarnissamut peqqutit nutaat nalunaarsuinerup ingerlatiinnarnissaanik kinguneqartut pisimanngippata. Pissutsit nutaat nalunaarsorneqarnissamut tunngaviliisut paasineqarpata nalunaarsorneqarneq ukiunik allanik tallimani ilaneqassaaq.

§ 63-mut

Aalajangersakkap akileraartarnermut inatsisip § 92-iat nanginneraa, taamaattorli paasissutissat akileraaruseriffiup piumasinnaasai pillugit suussanersut ataasiakkaatigut erseqqissaaneqarluni.

Imm. 1-mut

Aalajangersakkat siunertaraa akileraaruseriffik misissuinissamut qularnaariffigineqassammat, paasissutissat akileraartartumit/akitsuuteqartussamit pissarsiaasimasut, akileraaruseriffiup inummit allamit pissarsiaanit eqquunnersut (paarlaasseqatigiilluni kukkunerisuiineq). Aalajangersagaq ilaatigut atorneqassaaq takussutissaq ataaseq arlallilluunniit piviusunut tulluunnersut pillugit misissuinermi.

Siunnersuutigineqarpoq kinaluunniit namminersorluni inuussutissarsiummik ingerlataqartoq, ilaallutik akunnermiliuttartut akitsorterussisartullu, piumaffineqarnermikkut kaaviiartitat, pineqartup namminersortut atisigut taasat sinnerlugit suliarisimasai imaluunniit ingerlateqqissimasai, pillugit akissarsialeriffimmut tunniussisussaataassapput. Taamaalilluni akileraaruseriffiup namminersortup kaaviiartitai suunersut, piffissaq, amerlassutsit assigisaallu pillugit qinnuigisinnaavaa saqqummiuteqqullugit, tassalu pineqartup namminersortoq alla aqqatigut taaneqartoq peqatigalugu kaaviiartissimasai. Paasissutissat namminersortup tunniussassaasa annertussusii suunerilu pillugit akileraaruseriffiup qinnuteqarnermini aalajangersassavai. Akileraaruseriffiup paasissutissat qinnutigisai tassaasinnaapput namminersortut marluk akornanni piffissami aalajangersimasumi kaaviiartitat, soorlu kaaviiartitat aalajangersimasut ilaat, soorlu faktura-t aalajangersimasut.

Imm. 2-mut

Siunnersuutigineqarpoq tunisassiornermi, pisiortornermi tuniniaanermiluunniit peqatigiiffiit inuussutissarsiorinikkullu kattuffiit assigisaat, taassuma ataani ingerlatseqatigiiffiit, paasissutissiisussaataanerannut aamma ilaassasut kattuffiit ilaasortaminnut akiitsoqatigiiffii. Kaaviiartitat sulialluunniit suuneri pillugit paasissutissanik piumasaqartoqarsinnaavoq, kiisalu nioqqutissat tunisimasat, akissarsiat amerlassusii, kaaviiartitsinermi sulialluunniit ingerlannerani piffissaq, kiisalu akissarsiat qanga qanorlu akilerneqarsimanersut.

Imm. 3-mut

Siunnersuutigineqarpoq, pissutsit pisariaqarpata, Naalakkersuisut pisuni ataasiakkaani aalajangiisinnaasut paasissutissanik taamaattuni namminersortut atiisigut taaneqanngitsut akornaanni suleqatigiissutaat pillugit paasissutissanik piumasaqartoqarsinnaasoq. Naatsorsuutigineqarpoq pissutsini piviusuni pisinnaatitaaneq akileraarutinut Naalakkersuisumut suliasanngortinneqassasoq. Aalajangersagaq ilaatigut atorneqarsinnaavoq, sammisaqarfimmi ataatsimi imaluunniit namminersortup ataatsip arlallilluunniit kukkunerisiornerinut atatillugu pissutsit misissorneqarneranni.

Aalajangersakkat akileraartarnermut inatsisip § 98-iat tunngavigaa, oqariaatsit ataasiakkaat erseqqissaasiutitut allanngortinneqarsimmamata.

Aalajangersakkat siunertaraa akileraaruseriffik paasissutissanik tamanik piunasaqarnissaanut pisinnaatinneqassasoq, pissutsini akileraarnermi angissusiliinermut akitsuutinillu taggissinermut pingaaruteqarluartutut isumaqarfigineqarpata. Aalajangersagaq atorineqassaaq paasissutissanut tunngasut pisortani oqartussat, ingerlatseqatigiiffiit, umiarsuaatileqatigiiffiit, peqatigiiffiit, aningaasaateqarfiit, aningaasaliisarfiit suliffiillu allat §§ 30-39 malillugit akileraaruseriffimmut nalunaarsuuteqarsimanginnerini.

Inatsisit malillugit inuit, taassuma ataani pisortat, siulersuisut imaluunniit selskabinut, kommanditselskabinut, agguaqatigiilluni aalisariutaatileqatigiiffinnut, peqatigiiffinnut, stiftelsinut, legatinut sulisoqarfinnullu allanut qullersaasut ilisimatitsisussaataapput. Ilisimatitsisussaataanermut aamma interessentskabit ilaapput, taakkunanani peqataasut immikkut tamarmik aalajangersakkami pineqarpata.

Ilisimatitsisussaataasut taaneqartut ilisimatitsisussaataapput inatsisini ilisimatitsinissaq pillugu aalajangersakkani allani atuuttunit annertunerusumik, tassa pisussaaffeqarnermi ilisimatitsissutit tamarmik pineqarmata, ilimagineqarpat akileraarutinik annertussusiliinermi pingaaruteqarluinnartuusut. Kisiannili piunasaqataavoq ilisimatitsissutit pineqartut tassaasut ilisimatitsisussaataasup nalinginnaasumik ingerlatsinerminut atatillugu pigissagai.

Inuit ingerlatseqatigiiffiillu akisussaasut atinik taaneqanngitsut pillugit paasissutissat taamaallaat Naalakkersuisut aalajangersagaat malillugu tunniunneqarsinnaapput. Naatsorsuutigineqarpoq pissutsini piviusuni pisinnaatitaaneq akileraarutinut Naalakkersuisumut suliassanngortinneqassasoq.

Pisortat ingerlatsivii ilisimatitsinissamik peqquneqaraangata, pisussaaffeqarneq nipangiusimasussaataaneq pillugu aalajangersakkanut immikkut ittunut akerliusinnaapput. Aalajangersagassatut siunnersuutip pisortani sulisut tamanut atuuttumik nipangiusimasussaataanerit atorunnaarsippaa. Kisiannili ilisimatitsinissamik aalajangersagassatut siunnersuutip atuutinnginnissaanut nipangiusimasussaataanermik aalajangersakkat ataasiakkaat qanoq paasineqarnissaat apeqqutaapput. Pisortat ingerlatsiviinit allanit paasissutissanik pissarsinissaq pillugu pisortat suliassanik suliarinnittarnerit pillugu inatsimmi §§ 27 – 32 innersuussutigineqarput.

§ 65-mut

Aalajangersakkap aningaasarsianit akileraarutit pilluigt inatsisartut inatsisaanni § 94-iat allanngortinnagu nanginneraa.

Imm. 1-mut

Siunnersuutigineqarpoq bankit, sparekasset, andelskasset, bankierit, vekselerit, inatsisilerituut allallu ingerlatsinermut aningaasanik pissarsisartut imaluunniit

inuussutissarsiutigalugu aningaasanik taarsigassarsisitsisartut, akileraaruseriffiup piumasaqarneratigit inuit inuttut inatsisitigulluunniit akisussaat aqqisigut taasat ikisimasaat, taarsigassarsiaat, uninngasuutaat, taarsigassasiat amerlassusiat, kiisalu aningaasat uninngasuutit aqutalluunniit taakkulu erniaanersorneri, ikisimasat taarsigassarsialluunniit nikerarnerat pillugit paasissutissanik tunniussisoqartassaaq, ilaallutik checkit tigusat ikisallu pillugit paasissutissat, uppersaatit tunisimasat kiisalu taarsigassarsiat akitsorsinnaaffiillu qularnaveeqqusikkat.

Aalajangersagaq akileraaruseriffiup misissuisarnerani pingaaruteqarpoq, taamaalilluni inuit inuttut inatsisitigullu akisussaat aningaasaqarnikkut iliuusii pillugit paasissutissanik aningaaserivinni assigisaannillu pissarsisinnaaneranut qularnaarisuummat.

Imm. 2-mut

Siunnersuutigineqarpoq atiisigut taaneqanngitsut eqqarsaatigalugit Naalackersuisut aalajangiisinnaammata, aningaasat uninngasuutit aqunneqartulluunniit pillugit paasissutissanik piumasaqarsinnaammata kiisalu taakku piginnittuat taallugu erniaalersorneri, kiisalu atuisinnaatitaasup inuup normua, aqqa najugaalu ilanngunneqarlutik. Naatsorsuutigineqarpoq pissutsini piviusuni pisinnaatitaaneq akileraarutitut Naalackersuisumut suliaannngortinneqassasoq.

Imm. 3-mut

Siunnersuutigineqarpoq akileraaruseriffik Naalackersuisut aalajangigaat malillugu inuit atinik taasat atiinillu taaneqanngitsut akileraarnikkut misissuillattaarnermi aningaaserivinni, sparekasseni, andelskasseni, bankierini, vekselererini inatsisilerituunilu taakku suleqatigalugit tassani naatsorsuutitigit najoqutassani, takussutissanik uppersaatinillu pissarsisinnaatitaasut kiisalu akileraaruseriffik misissuinermit igiorakkat, taarsigassarsiat, toqqortat boksiluunniit, taarsigassarsiat amerlassusii, aningaasat uninngasuutit aqutalluunniit taakkulu erniaavi, igiorakkat taarsigassarsialluunniit nikerarneri pissarsiarisinnaagai, ilaallutik checkit tigusat ikioqqallallu, uppersaatit tunisat kiisalu taarsigassarsiat akiitsorsinnaaffiillu qularnaveeqqusikkat.

§ 66-mut

Aalajangersagaq aningaasarsianit akileraarutit pillugit inatsisartut inatsisaanni § 95-imik ingerlatitseqqinneeruvoq.

Imm. 1-mut

Akileraaruseriffik aalajangiisinnaavoq aningaaserivinni, eqqartuussissuserisuni allanilu aningaasanik akiliiffiusuni kontot qaammatini arfinilinni matuneqassasut, akiliutinik tigususip kontomik piginnittup kinaaneranik, inuttut normua/SE – normumik aqqanik, najugaanillu qulakkeerlugu ilisimasaqanngikkaangat. Assersuutigalugu kontomik piginnittoq atermik najukamillu ilisimatitsissutit naapertorlugit nassaaserineqarsinnaanngikkaangat imaluunniit kontomik piginnittup akiliutit nammeneq piginagit nalunaaraangat.

Akiliutinin akileraaruseriffimmit kinaassutsimik uppernarsaatissatut aalajangersakkamik tunniussinikkut konto-p matuneqarnerata kingorna siullermeerluni kontomik atuisumit tiguisumut piginnittuuneq nalunaarutigineqaraangat, matusineq taamaattassaaq, tassani pisortanit nalunaaruteqarnissaq pisariaqartinneqassanani.

Kinaassutsimik uppernarsaat tassaasinnaavoq assersuutigalugu passi, qamutinin motorilinnik ingerlatsisinnaanermut uppernarsaat ID-korti pisortatigootumilluunniit korti tassunga assingusoq inuttut normumik/nunani allani normumik imalik, Dankorti, Udenrigsministeriap diplomatinut kinaassutsimik uppernarsaataa (aappalaartoq/qorsuk) imaluunniit Erhvervs- og Selskabsstyrelsimiit naqitaq. Akerlianik kinaassutsimut uppernarsaatit uku atorneqarsinnaanngillat: Kuisinnermut atermullu uppernarsaatit qallunaat inuttut uppernarsaataannik imaqanngitsut, kreditkortit, aningaaserivinni tigusermut kortit assigisaallu assitaqanngitsut, utaqqiisaasumik qamutinin motorilinnik ingerlatsisinnaanermut uppernarsaatit imaluunniit ilaasortaanermut kortit.

Imm. 2-mut

Kantomik piginnittuimmik akileraaruseriffik paasisutissaateqanngippat akileraaruseriffiup piffissamik aalajangigaani minnerpaamik ukiumi ataatsimi matuneqarsinnaavoq.

Piffissap aalajangiunneqartup naareernerani kontomik piginnittoq suli kinaassusersineqarsinnaanngippat tamanna akileraaruseriffimmut nalunaarutigineqassaaq. Qaammatinik arfinilinnik piffissaliilluni avammut nalunaaruteqareernikkut piginnittuimmik nalunaartoqanngippat uninngasuutit nunap karsianut nakkartinneqassapput.

Imm. 3-mut

Immikkut pisoqartillugu akileraaruseriffik taamatut arsaarinninnginnissamut akileraaruseriffik immikkut akuersissuteqarsinnaavoq imaluunniit aningaasat arsaarinnissutaasimasut taarserneqarnissaat akuersissutigisinnaallugu. Immikkut pisoqarneratut ilaatigut isigineqarput taassuma kingornatigut kontomut piginnittuunermut uppernarsaatinik pisariaqartunik saqqummiussineq.

§ 67-mut

Aalajangersakkap nutaajusup Skatterådi akileraaruseriffittulli paasisutissanik piunasaqarsinnaaneranut periarfissippaa. Piunasaqaataassarli Skatterådip paasisutissanik piunasaqarnerani maalaarutinin suliarinninnermut atatillugu saqqummiunneqartassamat.

Siunnersuut aqutugalugu Skatterådi paasisutissanik pissarsisnaavoq, taamaalilluni Skatterådip akileraaruseriffik paasisutissanik pissarsiornissaanik qinnuteqarfigisariaqarnagu.

§ 68-mut

Akileraaruseriffiup inuussutissarsiummik ingerlatsisut akileraarutitigut akiligassai missiliuinikkut taggissinnaavai, inuussutissarsiummik ingerlataqartup naatsorsuusiortartup akileraarutitigut akiligassaasa amerlassusii pineqartup naatsorsuutai tunngavigalugit naatsorsorneqarsinnaanngippata. Taamattaaq akileraarutit akileraaruseriffiup missingiilluni taggissinnaavai, inuk inuttut inatsisitigulluunniit akisussaasoq nammineerluni nalunaarsuutinik nalunaarutinilluunniit nassiussisimanngippat, imaluunniit nammineerluni nalunaarsuut nalunaarusiarlunniit eqqortumik uppersarsaaserneqarsimanngippat uppersannngippallunniit.

Aalajangersakkap oqaaseqatigiivini siullianni namminersortunut naatsorsuusiortartunut atuuppoq. Pisuni taamaattuni akileraaruseriffiup missingiilluni taggissinissaanut tunngaviussaaq naatsorsuutitigut tunngaviit sumiginarneqarsimappata.

Naatsorsuutitigut tunngaviit ima ajortigisariaqarput akileraarutitigut akiligassa naatsorsuutitigut naatsorsuinermi eqqortumik tunngavigissallugit atorsinnaassanatik. Suliffeqarfiup naatsorsuutaani inassitsiternerit oqimaatatigiinnaarinermilu kukkunerit amigaatillu pingaaruteqanngitsut naatsorsuutinik sumiginnaanissamut tunngavissatut naammannngillat. Akileraaruseriffiup kukkunerit aalangersimasut amigaatilluunniit uppersarsartariaqarpai naatsorsuutitigut tunngaviit akileraarutitigut akiligassat naatsorsornerini tunngavissatut atorneqarsinnaanngitsutut uppersarsaataasut uppersanaqutaasulluunniit.

Naatsorsuutit misissorneranni paasineqarpat aningaasanik ilanngussinngitsoortoqarsimasoq imaluunniit aningaasartuutit amerlanaarlugit ilanngaataasimasut, immiini naammassinnaavoq naatsorsuutit tunngavissatut sumiginnaasoqarsimasoq. Tamanna pingaartumik pisinnaavoq aningaasat amerlasuut pineqarpat imaluunniit ilanngutinngitsuukkat ilanngaatillu arlaleriarneqarsimappata.

Naatsorsuutit tunngaviit sumiginarneqarsimappata kingunerisinnaanngilaq missingiilluni tassissisoqarsinnaanermut imaluunniit taggissisoqarnissaanut. Naatsorsuutitigut inernerit tunngaviummik eqqortuusinnaapput, naak assersuutigalugu paasineqartoq namminersortoq naatsorsuutinik pitsaasumik naleqqatigiisitsisimanngippat. Taamaalilluni akileraaruseriffik pisuni tamani tunngavilersuissaaq missigiilluni taggissineq inernernut naatsorsuutini takuneqarsinnaasunit allaanerusumik kinguneqartut, taamallu akileraaruseriffiup inernerisai uppersarsineqarsinnaassallutik.

Aalajangersakkat oqaaseqatigiivisa aappaanni inuit piginneqatigiiffinnullu akisussaasunut tunngavoq. Malittarisassaaq atorneqassaaq inuup nammineerluni nalunaarsuutinik imaluunniit akitsuutinik nalunaarutinik tunniussisussaataitanini sumiginnarsimappagu, imaluunniit nammineerluni nalunaarsuummi imaluunniit akitsuutinik nalunaarutini paasissutissat uppersartumik uppersarsarneqarsinnaanngippata uppersannngippataluunniit.

Aalajangersimasumik naliliinermi tunngaviussaaq nammineerluni nalunaarsuut imaluunniit akitsuutinik nalunaarut qaqugu uppernarsaasersimanersut uppernarnersulluunniit. Tassani ilaavoq paasissutissat saqqummiunneqartut, soorlu paasissutissat inummit saqqummiunneqartut paasissutissallu akileraaruseriffiup pisortat oqartussaannit allanit, sulisitsisunit, immikkut ilisimasalinnit assigisaannillu pissarsiarisimasai, nammineerluni nalunaarsuummi imaluunniit akitsuutinik nalunaarutiginninnermi paasisstissanik uppernartutut isumaqarfigineqarpata.

Akileraaruseriffik ataatsimoortumik naliliinermi isumaqarpat nammineerluni nalunaarsuummi imaluunniit akitsuutinik nalunaarutiginninnermi paasissutissat naammaginatut uppernarsaaserneqartut uppernartulluunniit, akileraaruseriffik pissutsini paasissutissanut pineqartunut paasissutissanut tunngasut pillugit missingiilluni taggissiniarluni aalajangersinnaavoq.

§ 69-mut

Imm. 1-mut

Naalackersuisut malittarisassanik aalajangersaanissamut piginnaatitaapput, taanna malillugu nunatsinni kommunalbestyrelsit qarasaasiakkut paasissutissanik akileraaruseriffimmi nalunaarsorsimasunik pissarsisinnaanngorlugit, malittarisassat qaqugukkulluunniit atuuttut malillugit kommunalbestyrelsip suliasaminik suliarinninneranut paasissutissat pisariaqaraangata. Pisortat allaffeqarfiini sulianik ingerlatsinermut Inatsisartut inatsisaanni §§-ini 29-31-imut maleruaqqusat naapertorlugit paasissutissanik aallersinnaalernermut periarfissiineq tassanilu piumasaqaatit malillugit taamaallaat pisinnaallunilu pisassaaq.

Pigittaatitaassut siunertanut marlunnut atorneqarsinnaavoq.

Siullertut piginnaatitaaneq atorneqarsinnaavoq kommunit kommunimi innuttaasut pillugit kommunit akileraaruseriffiini paasissutissanik annaasaqarnerannut taarsiutitut atorneqarsinnaalluni. Paasissutissat tamakku manna tikillugu kommunit ingerlatsiviini allani atorneqartarsimapput.

Aappaatut piginnaatitaaneq atorneqarsinnaavoq kommunit innuttaasunik kiffartuussinermi nunami innuttaasut pillugit paasissutissanik pisariaqartitanik atugassaminni pissarsisinnaallutik.

Piginnaatitaanerup taamaallaat nassatarissangilaa, paasissutissat erseqqinnerusumik aalajangerlugit suussanersut Naalackersuisut kommuninut periarfissiinerat.

Pisuni marluinni siunertarineqassaaq nunami kommunalbestyrelsit malittarisassat assigiit malissagaat.

Piginnaatitaaneq isumagineqassaaq pisortani oqartussaasut nalunaarsuineq pillugu inatsimmi malittarisassat malillugit kiisalu Datatilsynet suleqatigalugu aammalu pisortat allaffeqarfiini sulianik ingerlatsinermut Inatsisartut inatsisaanni §§-ini 29-31-imut maleruaqqusat naapertorlugit.

Imm. 2-mut

Aalajangersakkap kinguneraa akileraaruseriffiup kommunalbestyrelsi piumasqaateqarfigisinnaaga malittarisassat qaqugukkulluunniit atuuttut naapertorlugit kommunalbestyrelsip sulissanik isumaginninnissaannut siunertat saniatigut paasisutissat siunertanut allanut atorneqannginnissaat qulakkeerniarlugu.

Aalajangersakkamut tunngaviuvoq innuttaasut aningaasaqarnerannut tunngasut pisortanit atornerlunneqannginnissaasa pissusissamisoortumik qulakkeerneqarnissaa.

§ 70-mut

Siunnersuut malillugu kinaluunniit suliami peqataasoq maalaaruteqarsinnaavoq, tassa kinaluunniit aalajangernermit maalaarutaasumut inatsisitigut toqqaannartumik inuttullu pingaarutilimmik soqutigisaqartuusoq. Assersuutigalugu tassaasinnaavoq katissimalluni aapparisaq, tunisineq pillugu isumaqatigiissummut peqataasoq imaluunniit akitsuusiinermut akisussaatinneqartussaasoq. Maalaaruteqarsinnaavoq aalajangernermit toqqaannartumik sunnerfigineqartussaaq, soorlu kingornussinermut atatillugu, tamanna immikkut piginnaatitaaffilerneqarsimangippat.

§ 71-mut

Imm. 1-mut

Siunnersuut malillugu maalaarut Skatterådimut tunniunneqassaaq akileraaruseriffimmut pinnani. Maalaarut allakkatigut tunngavilersorlugu tunniunneqassaaq, tiguneqareersimassallunilu maalaarutigineqartup aalajangiunneqarnerata tiguneranit kingusinnerpaamik qaammatit pingasut qaangiutinnginneranni. Maalarut piffissaliussap naanerata kingorna tunniunneqarpat itigartitsissutigineqassaaq. Immikkulli pisut tunngavigineqarpata piffissaliussamik qaangiineq Skatterådip akuerisinnaavaa. Immikkut pisut tassaasinnaapput maalaaruteqarsinnaatitaasup sivisuumik napparsimarulussimamera.

Imm. 2-mut

Maalaarut pillugu Skatterådi aalajangiinginnermini akileraaruseriffik oqaaseqaateqaqoqqaassavaa. Aallaavittut qinnuigineqarnerminit tigusinerminit akileraaruseriffik ullut 14-it qaangiutinnginnerini oqaaseqaateqartussaavoq, akileraaruseriffiulli qinnuteqarneratigut piffissaliussaq Skatterådip sivitsorsinnaavaa maalaarutigineqartup aalajangiiffigineqarnissaanut tunngasut, soorlu suliap ajornakusoornera, pequtaappata.

Imm. 3-mut

Maalaaruteqartup saqqummiussai Skatterådip tamakkiisumik akuerisinnaanngikkunigit Skatterådip maalaarut aalajangiiffiginnginnerani suliami saqqummiussassanik suliaqartitsissaaq, tamannalu pillugu § 11, imm. 1-3-imut tunngaviusut malillugit illuatungeriinnik tusarniaasussaalluni.

Imm. 4-mut

Tusarniaanerup siunertaraa Skatterådip suliarinninnermini sapinngisamik pitsaanerpaanik tunngaveqarnissaq qulakkeerumallugu, taamaammat Skatterådip saqqummiussineranut atatillugu illuatungeriit ilisimatinneqassapput, Skatterådip tungaanut allakkatigut oqaasiinnakkullu oqaaseqarsinnaatitaasut. Oqaaseqaatip tunniunnissaanut piffissaliussamik Skatterådi aalajangiisinnaavoq. Piffissaliussaq aalajangerneqassaaq suliap annertussusia qanorlu ittuunera nalilersuutiginererisigut. Suliaq annikippat paasiuminartuullunilu suliamik allaaserinnineq illuatungerisamut anngutereerneraniit piffissaq sapaatit akunneri marluk sivisussusilerlugu naammaginarsinnaavoq. Akerlianilli suliaq annertuppat paasiuminaatsuullunilu piffissaq qaammatinik marlunnik sivisussusilerlugu naammaginartuussaaq.

Imm. 5-mut

Skatterådi pissutsit maalaarutaasut isummerfiginissaasa saniatigut aningaasarsiat akileraaruteqaataasussat pillugit il.il. allannguutinik allanik suliaqarsinnaavoq. Taamaalilluni Skatterådi isertitanik taggissineq pillugu maalaarutini ukiumi akissarsiorfiusumi pineqartumi taggissinerni pissutsit allat maalaarutigineqartumi toqqaannartumik malitsigisaanik allanngortissinnavaa.

§ 72-mut

Akileraaruseriffik maalaarutigineqartoq pissutissaqartitsippat akileraaruseriffiup aalajangernermi maalaarutigineqartup aalajangerneqarnera maalaaruteqartoq isumaqataappat suliareqqissinnaavaa. Maalaarutineqartuni pissutsinut atatillugu kukkusoqarsimasoq akileraaruseriffiup paasippagu, maalaaruteqartoq isumaqataappat iluaquserneqarsinnaapput suliaq Skatterådimut saqqummiutinngikkaluarlugu.

Akileraaruseriffiup nutaatut allannguuteqartitsilluni aalajangiineri aningaasarsianit akileraarutit pillugit aamma akitsuutit pillugit angissusiliinerni piffissaliussatut killissarititaasut iluini aalajangiinerussapput.

Aalajangersakkap akileraaruseriffiup aalajangersakkani §§-ini 47, 48, 51 aamma 52 naapertorlugit siusinnerusukkut angissusilerneqareersumik qaqileeqqilluni suliaqarsinnaaneranut killiliinngilaq. Aalajangersakkalli taamaallaat akileraaruseriffiup angissusilerneqareersumik qaqileeqqilluni suliaqarsinnaaneranut periarfissamut killilerpaa, taakku Skatterådimut maalaaruteqarnermi ilanngunneqarsimaneranut naleqqiullugit.

§ 73-mut

Imm. 1-mut

Maalaarutit aallaavittut Skatterådip ataasiaannartumik suliarissavai. Aalajangersakkatullu siunnersuutigineqartup maalaaruteqartoq akileraaruseriffillu maalaarut Skatterådip aalajangereersimasaa itigartissimasaalu pillugit Skatterådi

qinnuigisinnaallugu aalajangernermi suliap uteqqinnissaanut periarfississavai. Skatterådilli uteqqiinissamut aalajangernissaanut piumasaqaataavoq, paasissutissat nutaat suliarinnissimanermi saqqummiunneqarsimangitsut Skatterådimum saqqummiunneqarnissat, nalilerneqarpallu paasissutissat nutaat siusinnerusukkut saqqummiunneqarsimasuuppata aalajangerneq allatorluinnaq inerneqarsimassagualuartoq.

Aalajangersagaq periarfissiivoq uteqqiinissamik piumasaqarneq Skatterådip akuerisinnaallugu, paasissutissat nutaat saqqummiunneqartut aalajangiinermi allatorluinnaq kinguneqartitsisinnaasimassagualarpata.

Aalajangerneq atorlugu Skatterådi pituttorsimangitsumik naliliisinnaalluni uteqqiinissamut piumasaqaatit qaqugukkut akuerineqarsinnaaneritut atatillugu aalajangersaasinnaallutik.

Uteqqiinissamut piumasaqaatip aallaavigisinnaavai paasissutissat piviusunut tunngasut, soorlu uppersaatit akileraarutinik amerliliinissamut ikilisitsinissamulluunniit tunngavissaasut saqqummiullugit, imaluunniit paasissutissat inatsisilerinermut tunngasut, soorlu aningaasaqarnikkut isumaqatigiissutit maalaarummut ilaasut inatsisitigut nalilerneqarlutik allanngartinneri.

Imm. 2-mut

Imm. 2-mi siunnersuutigineqarpoq Skatterådip imm. 1-imi piumasaqaatit eqquutsinneqanngikkaluartut pissutsit immikkut ittut atuutsillugit aalajangiisimaneq uteqqissinnaallugu. Aalajangersakkap killilimmik atorneqarsinnaasutut naatsorsuutigineqartup sammisatigut siunertaraa, uteqqiinissamik qinnuteqaat akuerinngikkaanni ingasattumik ajuallannartuusinnaammat, naak Skatterådip aalajangernerata allanngartinneqarnera maalaaruteqartumut pingaarutilimmik kinguneqassanngikkarluartoq.

Imm. 3-mut

Imm. 1 aamma 2 malillugu suliarinneqqinnissamik qinnuteqaatit Skatterådimum allaganngorlugit nassiuunneqassapput tunngavilersugaallutillu. Qinnuteqaat § 47, imm. 1-imi aamma 2-mi aamma § 51, imm. 1-imi aamma 2-imi piffissarititat taaneqartut qaangitinnnginneranni tiguneqareersimassaaq.

Taamaalilluni suliarinneqqinnissamik qinnuteqaatit tunniunneqarnissaanut piffissarititap § 47, imm. 1-imi aamma § 51, imm. 1-imi aningaasarsianit akileraarutit nalinginnaasumik annertussusiliinermut aammalu akitsuutinik nalinginnaasumik annertussusiliinermut piffissarititat assigai, akierlianik aningaasarsianit akileraarutit pillugit aamma akitsuuserneqartussaaitat pillugit piffissarititap § 47, imm. 1 aamma § 51, imm. 2 assigalugit.

Taamaalilluni isiginiarneqarpoq annertussusiliinermut piffissarititat peqatigalugit piumasaqaataasoq pigisat pillugit suliarinnittarnermi pisoqalivallaarnermut malittarisassat akileraarutinik annertussusiliinermi malinneqassasoq. Kalaallit Nunaanni Namminersornerullutik Oqartussat imaluunniit kommunip akileraarutinik

akitsuutinillu piumsaqaataat pisortat inatsisaat malillugit piffissami akilerneqarfissaanniit ukiut tallimat qaangikkaangata pisoqalivallaartartut, takuuk pisassat ilaasa pisoqalivallaartarnerat pillugu inatsit nr. 274 22. december 1908-meersoq (Inatsit 1908-meersoq). Aammattaaq akileraartussaataitasup akitsuutinillu akiliisussaataitasup annertuallaamik akiliutinit piumasaqaateqarsinnaanera ukiut tallimat qaangiunneranni pisoqalivallaartarpoq, takuuk Inatsimmi 1908-meersumi § 1, nr. 6.

Malittarisassatut pingaarnertut suliaq siornatigut aalajangiiffigineqareersup Skatterådimit suliareqqinneqarnissaa siornertaqarnaviannigilaq, akileraarutinit akitsuutinillu piumasaqaatit pigisat pillugit inatsisini pisoqalivallaartarnermik malittarisassat malillugit pisoqalivallaarsimappata.

Imm. 4-mut

Siunnersuutigineqarpoq Skatterådip, pissutsit immikkut ittut tunngavigalugit, suliareqqiinissamik akileraaruseriffimmit qinnuteqaat akuerisinnaagaa, imm. 3-mi piffissarititaasut qaangerneqarsimagaluarpataluunniit.

Aalajangersakkami siunertaavoq Skatterådimit aalajangigaq eqqartuussivinnut suliaannagortinneqaraangata, eqqartuussivimmilu suliarinninnermi paasinarsippat aalajangiineq tamarmi taassumaluunniit ilaa eqquvissumik pisimanngitsoq, assersuutigalugu pissusiviit inatsisilluunniit tunngavigalugit paasissutissanik nutaanik saqqummertoqarnerata kinguneranik.

Eqqartuussiviit suliat ilaannik suliarinninneranni § 47, imm 1-imi aamma 2-mi aamma § 51, imm. 1-imi aamma 2-mi piffissarititat taaneqartut qaangerneqarsinnaapput, taamaammallu pissusissamisoortutut isigineqarpoq siunnersuutigissallugu Skatterådip akileraaruseriffiup qinnuteqarneratigut suliareqqiinissamik akuersisinnaanissaa, piffissarititat taaneqartut qaangerneqarsimagaluarpataluunniit.

§ 74-mut

Aalajangersakkap akileraartarnermut inatsisip § 59-iata nanginneraa, siunnersuutigineqarlunili imm. 1-imik nutaamik ilanngussinissaq.

Imm. 1-mut

Siunnersuutip imm. 1-iata nassataraa pissutsit Skatterådimit maalaarutigineqarsinnaasut akileraaruseriffiup aalajangersimasai pillugit, aatsaat eqqartuussivimmut tunniunneqarsinnaasut suliaq Skatterådip misiliiffigereersimappagu imaluunniit itigartissimappagu. Taamaalilluni aalajangerneqarpoq suliat eqqartuussivimmut tunniutinnginnerini allaffissornikkut maalaarutininik suliarinninnissami periarfissat tamarnik atoreersimassasut.

Skatterådip aalajangernera maalaaruteqartup Nunatta Eqqartuussivianut siullertut tunniussinavaa. Suliap eqqartuussivinni suliarineqarnerata nalaani isummernerit

saqqummiunneqartut tamakkiisumik ilaannakkortumilluunniit maalaaruteqartumut ilaliissuteqarpata, akileraaruseriffik uppersaallutik akissuteqarsinnaavoq.

Imm. 2-mut

Eqqartuussivimmuut tunniussinissamut qaammatini 6-ini piffissaliunneqartoq sivisungaatsiartutut isumaqarfigineqarmat, siunnersuutigineqarpoq piffissaliussaq paasinninnermit naatsorsuutigisariaqartoq, tassalu ulloq Skatterådip aalajangiiffigisimasaa.

Imm. 3-mut

Maalaarnissamut piffissaliussaq sivikillisinniarlugu siunnersuutigineqarpoq, akileraartartup maalaarutiniq siullertut Nunatta Eqqartuussivianut tunniussinnaagaa, maalaarutigineqartumi qaammatit 12-it sinnerlugit Skatterådi suli aalajangersimangippat.

Imm. 4-mut

Eqqartuussivimmuut tunniussinnginnermi allaffissornikkut maalaarutiniq suliarinninnissami periarfissat tamarmik atoreersimanissaat pillugu malittarisassaq aporfiusussaangilaq eqqartuussiviup akuersinissaanut apeqqut nutaaq suliamut tunngaviliisinnaasoq eqqartuussinermi saqqummiunneqarsinnaaneranut, utoqqatsissutissaasinnaappallu apeqqut siusinnerusukkut ilanngunneqarsimangitsoq, imaluunniit isumaqarnissamut tunngavissaappat akuerineqarnissamut itigartinneqarsimaneq tunniussisumut inatsisitigut pisinnaatitaaffinnik annaasaqarnermik nassataqassasoq.

§ 75-mut

Aalajangersakkap akileraartarnermut inatsisip § 59, imm. 3-ata nanginneraa.

Imm. 1-mut

Aalajangersakkami siunnersuutigineqarpoq Skatterådip aalajangigai Naalakkersuisut eqqartuussivimmuut tunniussinnaagai, Skatterådip aalajangereerneranit kingusinnerpaamik qaammatit 6-it qaangiutinnginnerini. Naalakkersuisut atorfilittaminnut suliassaq tamanna suliakkiutigalugu ingerlateqqusinnaavaat.

Imm. 2-mut

Aalajangersakkami ilaatinneqanngillat Skatterådip pituttorsimasumik ingerlatseqatigiiffiup amigartoorutai saqqummiunneqarsinnaasut pillugit siumut kallerreerluni nalunaarutai pillugit suliat, pituttorsimasumik siumut kallerreerluni siunertat eqquutsinneqassanngimmata, akileraartartoq qaammatit arfinillit utaqqisariaqassappat tamanna Naalakkersuisut siumut kalerrinerup akuerisimassaneraa akuerisimassannginneraaluunniit.

§ 76-mut

Aallajangersakkap akileraarnermut inatsisip § 67-ia tunngavigaa, kinguartitsinissamilli nalunaaruteqartarneq eqqarsaatigalugu ilassutigineqarluni.

Imm. 1-mut

Aallaavittut akileraarnermut taggissinerit pillugit maalaarutit nukinginnartutut sunniuteqanngillat. Taamaalilluni maalaaruteqartup akileraarutit akilertussaavai, akileraaruseriffiup aalajangigai maalaarutigineqarsimagaluarpataluunniit.

Imm. 2-mut

Maalaaruteqartup akiliuteqanngikkallarnissaq qinnutigippagu Skatterådip akiliuteqanngikkallarnissamik tamakkiisumik ilaannakortumilluunniit akuerisinnaavaa, akileraarutit maalaarutit ilaannut tunngasut pillugit, pisut immikkut ittut akuerineqarsinnaappata. Skatterådip pingaartissavaa pissutsinik taamaattunik suliarinninnermi qaffaanermi malunnartumi kukkusoqarsimasorinarluni tunngavissaqarpat. Taamattaaq akileraarnermi aningaasartaasa amerlassusii eqqarsaatigineqassapput, taamallu maalaaruteqartup piffissami tassani aningaasaqarnikkut inissisimanera pingaartinneqassalluni. Qinnuteqartut immikkut naliliiffigisarnerini siunertaavoq akiitsut pillugit maalaarutit illuatungilerniarlugit, tassa maalaarutit maalaaruteqarnerup tunngavia pingaarneq isumaqarfigineqarpat akileraarutitik akilersuinissamut kinguartitsinissaq siunertarineqarluni. Pisuussutit pisinnaanerisa pisoqalinissaat pillugu malittarisassat eqqarsaatigalugit, ukiut sisamat sinnerlugit kinguartitsisoqassanngilaq, qinnuteqartoqarnerali malillugu kinguartitsineq sivitsorneqarsinnaavoq.

Imm. 3-mut

Akileraarutit akileneqarnissaannik tamakkiisumik ilaannakortumilluunniit kinguartitsinissamik qinnuteqaammik nassiussisoqarneratigut akileraaruseriffiup aalajangersinnaavaa, akileraarutit ilaat kinguartitsinissamik qinnuteqaammut tunngasut akiligassiisutigineqarnissaat unitsikkallarneqassasoq Skatterådip qinnuteqaat pillugu aalajangiinissaata tungaanut.

Taamaalilluni qulakkeerneqarpoq akiliuteqanngikkallarnissamik kinguartitsinissaanermik qinnuteqaatip sukumiisumik suliarinissaanut Skatterådip periarfissinneqarnissaa.

Imm. 4-mut

Siunnersuutigineqarpoq kinguartitsinissamut nalunaarummi Skatterådip piumasarisinnaagaa, kinguartitsinermi aningaasat amerlassusiat toqqissisimanartumik qularnaveeqquserneqassasut. Kinguartitsinermi qularnaveeqqusiinissaq pillugu aalajangiinermi apeqqutaavoq akiitsoqarnermi aarlerinaatit nalileneqarnerat, soorlu aningaasat kinguartitsinermi amerlassusii maalaaruteqartullu piffissap nalaani aningaasaqarnikkut atugai.

Qularnaveeqqusiinertut siunnersuutigineqartoq toqqissisimanartut isumaqarfigineqarsinnaanersoq naliliviginialersillugu, soorlu assersuutigalugu tunngaviginiarneqarsinnaapput ilaatigut sumiiffimmi illunik niuernerme il.il. akit assigiinngissutaat nalilersuutigissallugit, illorlu qularnaveeqqutissatut neqeroortigineqartoq itigartissinnaallugu, naatsorsuutigineqarsinnaammammi

pinngitsaaliissummik tunineqarnerani nalimigut annaasaqaataatiginngitsoornagu tunineqarsinnaanera.

Imm. 5-mut

Kinguartitsinissami piumasaqaatit matussuserniarlugit kinguartitsinissaq nalunaarutigineqarsimagaluarpalluunniit, akiliisitsisoqarsinnaavoq imaluunniit piumasaqaatit maalaaruteqartup pisortanut tutsissinnaasai akuliuffigisinnaallugit.

Taamaalilluni kinguartitsinissamik nalunaaruteqartoqarsimagaluarpalluunniit ilaatigut akileraarutit akilernerqarpallaarsimasut utertillugit akilerneranni piumasaqaatinut kinguartinneqarsimasunut ilanngaasoqarsinnaavoq.

§ 77-mut

Aalajangersakkami aningaasarsianit akileraarutit pillugit inatsisartut inatsisaanni § 102 tunngavigineqarpoq.

Nammineq allalluunniit akileraarutissaat, akileraarnermi taggissinerit, akileraarnermilu naatsorsuinerit aalajangiinissamut atugassanik paasissutissanik eqqunngitsunik imaluunniit putusaaralunilu tunniussisarneq aalajangersakkap pinerluuteqarnertut inissippaa.

Aalajangersakkami piaaraluni oqariaaseq danskit eqqartuussissusilerinermi inatsisaanni piaaraluni oqariaaseq nalinginnaasoq assigaa, tamannalu aamma annertuumik mianersuaalliornermik oqariaaseq atuulluni.

Eqqunngitsuussuseq pisarpoq paasissutissat eqqunngitsut pinerluuteqartup matoorniarlugit ilisimasai eqqunngitsuliornerup alajangersimasumik ilimasunera imaluunniit eqqunngitsuuneq pillugu ilimasunnerinnaa. Paasissutissat akileraarnermi oqartussat putusaarniarlugit paasissutissat eqqunngitsut atorsinnaasutut isigigaanni pineqaatissiinissamut piumasaqaataanngillat.

Paasissutissat putusaarutit pisarput, paasissutissat imminni eqqunngitsut nipangiussinermik tamakkiisuunngitsumillu paasissutissiinikkut ataatsimoortikkaanni, taamaalilluni inernerit katinnerini akileraarnermut oqartussat uukapaatinneqarnerannik kinguneqartitsisuullutik.

Unioqquitsineq piviusunngortarpoq paasissutissat eqqunngitsut putusaarutilluunniit tunniunneqaraangata, tassa piviusunngortitsineq siuartinneqartarmat. Nammineerluni

nalunaarsuummi kukkunerit avigaatillu tamanut atuuttut pingaaruteqartutut isigineqangillat.

§ 78-mut

Aalajangersakkami aningaasarsianit akileraarutit pillugit inatsisartut inatsisaanni § 107, imm. 3. nr. 3 tunngavigineqarpoq.

Aalajangersakkap pinerluttuliorninngortissavaa eqqunngitsumik imaluunniit ukapaatitsiniarluni akileraartarnermut oqartussaasunut isertitat pillugit nalunaaruteqartoqarpat, tamakku isertitaqartup akileraarnermut allagartaanut ilanngunneqarpata taamaalillutillu aalajangiisussanngorpata akileraartitsinermut imaluunniit taassuma annertussusianut.

Paasissutissat taamaallaat aalajangersakkanut matuma kinguliani taaneqartunut ilaatinneqartut suliaassanngortitsinermut tunngaviusinnaapput, tassa § 13 imm. 6 siunissami unerartitsisussaajunnaarnek, § 14 ukiumi aningaasarsiorfiusumi siumoortumik nalunaarsuineq, pineqaatissiinermik kinguneqartitsisinnaapput..

§ 79-mut

Aalajangersakkap aningaasarsianit akileraarutit pillugit inatsisartut inatsisaanni § 103 assigaa.

Aalajangersakkap nalunaarutiginnigitsuumkat akileraarutissatut angissusiliinngitsoornermik kinguneqartut pinerlunnertut inissippai, taamaalilluni tamakkiisumik killilimmilluunniit akileraartussaanaissaq eqquutsinngitsoorneqarluni.

Aalajangersakkat atuuffigineruaa inuit allattorsimaffianut nalunaanngitsoorsimanerup imaluunniit akileraartussanngortussaq akileraartarnermut oqartussaasut ilisimangagu nalunaanngitsoortoqarsimappat. Aalajangersagaq pingaarnertut atussangatinneqarpoq akileraartussaataaneq inuup nunami maani qaammatit 6-it sinnerlugit najugaqarnerata malitsigisaanik atuutilertussaappat, imaluunniit inuk nooreersimanermi kingorna Kalaallit Nunaanni najugaqaqqilersimappat inuit allattorsimaffianut nalunaaruteqarani.

§ 80-mut

Aalajangersakkap aningaasarsianit akileraarutit pillugit inatsisartut inatsisaanni § 104 assigaa.

Imm. 1-mut

Aalajangersakkami pineqarpoq akileraartussap ilatsiinnarnermigut akileraarutininik ilatsiinnarluni akiliisanngippat isertitassat akileraarutissaasut missingernerini appasippallaamik naatsorsorneqarlutik, akileraartarnermut oqartussat akileraartartup nammineerluni nalunaarusiunnginnerani imaluunniit atorsinnaanngitsunik nalunaarsuisimanera tunngavigalugu inississimasaat.

Piaaralluni akileraanngitsoornermi pissutsit saniatigut, aalajangersakkamut aamma ilaapput sakkortuumik nalinginnaasumillu mianersuaalliornermut tunngasut.

Imm. 2-mut

Aalajangersakkamut ilaapput, piaaraluni iluarsiinngitsoqarsimanngiinnarluni, aammali piaaraluni akileraarutininik akiliinngitsoortarneq.

Imm. 3-mut

Aalajangersakkami selskabit il.il. pillugit akisussaaqatigiissumik akisussaaffilernissaannik pisinnaatitsivoq.

§ 81-mut

Aalajangersakkap aningaasarsianit akileraarutit pillugit inatsisartut inatsisaanni § 105 assigaa.

Aalajangersakkamut ilanngunneqarput naatsorsuuserinissaq naatsorsuusiorterlu pillugit nalinginnaasumik inatsisini pineqaatissiisarneq pillugu aalajangersakkat arlallit assingusut, taamaammatt aalajangersagaq naatsorsuusiortussaataitanermit naatsorsuuserineq pillugu inatsisinut nalinginnaasunut ilaanngitsunut taamaallaat immi pingaaruteqarpoq.

§ 82-mut

Aalajangersakkap aningaasarsianit akileraarutit pillugit inatsisartut inatsisaanni § 108 assigaa.

Aalajangersagaq periarfissiivoq suliassat § 77-imit § 81-imut aamma § 83-imut unioqqutitsinermut tunngassuteqartut allaffissornikkut aalajangiiffigineqarsinnaasunngorlugit.

Suliaq allaffissornikkut taamaallaat naammassineqarsinnaavoq unnerluutigineqartup pisuussuteqarnini nassuerutigippagu piumasaqaatini nassuiaatigineqartut tunngavigalugit aamma akiliisitsissutissaq taaneqartoq akilissallugu pisussaaffigalugu akuersippat. Unnerluussap soorlu assersuutigalugu suliap naammassiaarnissaa pinerullugu akiligassiissut akilerniarlugu akuersippat, kisiannili pisuunini akuerinagu taava suliap naammassinissaanut tunngavissaarutissaq.

Akiligassiinermik allaffissornikkut aalajangiineq imatut paasineqassaaq akileraartarnermut oqartussaasut aamma unnerluunneqartup akunnerminni isumaqatigiissuteqarnerattut. Unnerluutigineqartup isumaqatigiissut taamaattoq peqataaffigerusunngippagu imaluunniit akileraartarnermut oqartussaasunit saaffiginnissut tamatumunnga tunngasoq iliuuseqarfiginngippagu, suliassaq Kalaallit Nunanni Politimesterimut ingerlateqqinneqassaaq unnerluussisummik suliaqarnissaaq piumasaqaatigineqarluni eqqartuussivikkut suliap naammassineqarnissaa siunertaralugu.

Imm. 2-mut

Akiliisitsinissamut piumasaqaatip qaqugukkulluunniit unnerluussisoqarnissaanut allaaserineqarnerinut piumasaqaataasut assigissavaat, pinerluttaalisitsinermut inatsimmi kapitali 5-imi piumasaqaatit assigalugit. Naak maannakkut pinerluttaalisitsinermut inatsimmi immikkut piumasaqaateqartoqanngikkaluortoq unnerluussineq qanoq sularineqarnissaanut imaluunniit imaqarnissaanut tunngatillugu, piumasaqarneq unnerluussutigineqartup eqqortumik taaneqarnerata saniatigut pisoq ima nassuiarneqarsimassaaq, taanna piffissamut aamma sumut tunngatillugu immikkoortinneqarluarsinnaassalluni. Tamakkulu saniatigut piumasaqarneq aamma imaqassaaq aalajangersakkat suut unioqqutinneqarsimajunnartut eqqortumik taallugit, ilutigitillugulu taamatut unioqqutitsinerup kingunerisaanik qanoq pineqaatissiisoqarsinnaaneramik aalajangersakkat.

Imm. 3-mut

Unnerluunneqartup akileraartarnermut oqartussanit akiliisitsinissamut piumasaqaat akuerippagu tamanna isumaqarpoq akisussaannermut apeqqutip aalajangerneqarneranik, taamaalilluni akilisitsinerup eqqartuussiviit aqputigalugit sularininnissaagaluq atorunnaarsissavaa.

§ 83-mut

Aalajangersakkap aningaasarsianit akileraarutit pillugit inatsisartut inatsisaanni § 111 assigaa.

Imm. 1-imut

Aalajangersakkap kinguneraa maleruagassani aalajangersakkanik unioqqutitsisoqarsimatillugu pillaatisiatut akiliisitsisoqarnissaanut tunngasunik malittarisassanik aalajangersaasoqalersinnaanera, taakku inatsisartut inatsisaanni suliarineqartassapput.

Imm. 2-mut

Aalajangersakkap kinguneraa aamma inuit inatsisinik suliaqartut aammattaaq akiligassinneqarsinnaalersinnaasut maleruagassanik unioqqutitsisimagunik.

§ 84-mut

Aalajangersakkap aningaasarsianit akileraarutit pillugit inatsisartut inatsisaanni § 112 assigaa.

Aalajangersagaq tunngavigalugu politiinit ikiorseqqunissaq qinnutigineqassappat piunasaqaataavoq akileraarnermut oqartussat pasitsassimanissaat, § 77-imit § 81-imut unioqqutitsisoqarsimaneranik aamma § 83 naapertorlugu unioqqutitsisoqarsimatillugu pillaatisiatut saqqummiunneqarsimanissaannik.

Akileraarnermut oqartussat akileraartarnermut tunngatillugu pinerluttoqarsimatillugu annertunerpaamik namminneerlutik misissuisarput, misissuinerup ingerlanneqarnerata nalaani politiit ilanngutsinneqartanngikkaluartut. Misissuinerup nalaani politiit ikiorsiisissarnerat nalinginnaasumik tassaagajuttarpoq illumik misissuinissamat akuersissutinik pissarsiniarnermi ikiuneq, illumik misissuinermik ingerlatsineq uppersaatissanik naatsorsuusiornermut il. il. Pissarsiniarlutik.

Illumik misissuineq politiinit ingerlanneqartarpoq akileraartarnermut oqartussaasunit peqataaffigineqarluni. Illumik misissuineq ingerlanneqareeraangat atortussat pissarsiarineqarsimasut nalinginnaasumik akileraarnermut oqartussaasunut tunniunneqartarput, tamatumani siunertaalluni kukkunersiuinermik suliaqartoqartoqarnissaa aningaasarsiat akileraarutigassat ilanngunneqanngitsoorsimasut takussutissarsiorniarlugit.

Aalajangersagaq siusinerusukkut maannamullu isumaqatigiissuteqarnikkut atuutsinneqarsimangilaq. Pissutsini piviusuni politiit pisariaqartinneqarfinni atorfissaqartinneqartillutik akuersaarumasarsimanginnermik tusarliussisarsimangillat.

§ 85-mut

Aalajangersakkap aningaasarsianit akileraarutit pillugit inatsisartut inatsisaanni § 113 assigaa.

Aalajangersakkap kinguneraa, pillaatit akiligassat, allaffissornikkut aalajangerneqartut imaluunniit eqqaqrtuusisoqarneratigut aalajangerneqaartut §§ 77-imit 81-imut aamma § 83-imut unioqqutitsinernut tunngasut, nunap karsianut nakkartinneqarnissaat.

§ 86-mut

Imm. 1-mut

Kommunit akileraartarnikkut allaffissornikkut tunngavissaat tassaapput akileraartitseriaatit edb-mik tunngavillit marluusut. Taamallu 31. december 2006-ip kingorna suleriaatsit taakku atorneqartariaqassapput, ingerlaavartumik allaffissornermi kiisalu paasissutissat nalunaarsorneqareersimasut eqqarsaatigalugit qupperarneqarsinnaanissaannut. Tamanna qulakkeerniarlugu siunnersuutigineqarpoq akileraaruseriffiup kommunit akileraarusersueriaasi 1. januar 2007 aallarnerfigalugu iserfigisinnaassagai, taamallu paasissutissat suleriaatsini taakkunani toqqorterneqarsimasut akileraaruseriffiup atorsinnaassallugit.

Imm. 2-mut

Akileraaruserinermi kommunit naatsorsuutitigut akiliisitsiniarnikkullu sammisaat arlalitsigut attuumassuteqarput. Paasissutissanik paarlaatseqatigiittarnerup annikillinissaa illuatungilerniarlugu siunnersuutigineqarpoq kommunit akileraaruseriffik kommunini naatsorsuutitigut akiliisitsiniartarnertigullu paasissutissaataannut tunngasut akileraaruseriffiup atorsinnaassagai, akileraaruseriffiup akileraartarneq pillugu inatsimmik ingerlatsinermi pisariartitatut naliliinera malillugu.

§ 87-mut

Aalajangersagaq malillugu Naalakkersuisut malittarisassiuussinissamik pisinnaatinnearput suliassanik, sulianit takussutissanik il.il. kommuninit Namminersornerullutik Oqartussanut tunniussinissaat piviusunngortinniarlugu. Assersuutigalugu tassaasinnaapput tunniussinermi immikkoortut ataasiakkaat piviusunngortinnissaannut piffissaliussat imaluunniit toqqortat tunniunnissaat pillugu malittarisassiuussineq.

Akisussaaffik tamanna Naalakkersuisut atorfilinnut tunniussinnaassavaat.

§ 88-mut

Aammattaaq siunnersuutigineqarpoq Naalakkersuisut pisinnaatitaassasut kommunalbestyrelsit akilerlugit kommunit akissarsiatigut akileraarutini akiligassanik kinguaattoorutit pillugit nuunneqarnissaat pillugu Naalakkersuisut isumaqatigiinniarsinnaasut, soorlu akileraarutininut tapissani akileraarutit A-t-inilu kinguaattoorutininut tunngasut. Taamalli isumaqatigiissuteqarnissamut piumasaqaataassaaq, naligititassatut isumaqatigiissummi piviusumik eqqarsaatigineqassasoq, nuussinermut atatillugu kinguaattoorutit ilaat Namminersornerusut matussusigassarinnngisaat landskarsip nammassinnaanera, kiisalu akiitsulinnit pissarsiarisinnaasatut naatsorsuutigisat eqqarsaatigalugit.

Akisussaaffik tamanna isumaqatigiissusioqqullugu Naalakkersuisut atorfilinnut tunniussinnaassavaat

§ 89-mut

Imm. 1-mut

Siunnersuutigineqarpoq inatsisartut inatsisissaat 1. januar 2007 atuutilissasoq. Taamaalliluni inatsisip atuutilernerata ingiaqatigissavaa akileraartarnermut inatsisartut inatsisissaattut siunnersuut kiisalu akitsuutit pillugit inatsisartut inatsisaasa assigiinngitsut inatsisartut inatsisissaanni allannguutissatut siunnersuutit.

Isertitanit akileraarutit pillugit inatsisartut inatsisissaattut siunnersuumi § 117, imm. 3-mi isertitanit akileraarutit pillugit inatsisartut inatsisaanni n.r 5 19. maj 1979-imeersumi kingusinnerusukkullu allannguutini siunnersuummi uani killilersuinerimi atorunnaarsinneqarput.

Imm. 2-mut

Inatsisip atuutilerneranit atuutilersumik akissarsiat akileraarutissat pillugit suliat pillugit kommuninit akileraaruseriffimmut nuunneqassapput. Aalajangersakkap kingunerissavaa akissarsianut akileraarutissanut sulianut tunngasut, kommunit suliaralugit 31. december 2006 suli naammassisimannngisaat, akileraaruseriffimmi suliarisassanngorlugit tunniunneqassasut. Suliat sulisunut tunngasut assigisaallu, soorlu sulisut ileqqulersorneri pillugit maalaarutit, kommunini inaarsarlugit suliarineqassapput.

Imm. 3-mut

Inatsisip atuutilerneranit atuutilersumik suliat Naalakkersuisunut maalaarutaasimasut, suli aalajangiiffigineqarsimannngitsut, Skatterådimut nuunneqassapput, Skatterådi § 2 malillugu suliani tamaattuni

aalajangiisinnaassuseqassappat. Aalajangersakkap kingunerissavaa akitsuutit pillugit maalaarutit Skatterådimit nuunneqassasut, Skatterådi § 2 malillugu suliani taamaattuni samminnisinnaassuseqassappat, kiisalu kingusinnerpaamik 31. december 2006 Naalackersuisut inaarutaasumik aalajangiisimangippat.

Imm. 4-mut

Isertitat akileraarutissat pillugit isumakkeerfigineqarnissamik qinnuteqaatit 1. januar 2007 sioqqullugu Skatterådimi tiguneqarsimasut inatsisartut inatsisaanni nr. 5 ulloq 19. maj 1979-imeersumi § 115, imm. 9-mi malittarisassat malillugit suliarineqassapput. Taamaalilluni eqqarsaatigineqarpoq §§ 53-55-mi pisuni ataasiakkaani ileqquusunut tunngasunik sakkortusaaneqassaaq, § 115, imm. 9 malillugu allanngoriartorsimasoq.

Imm. 5-mut

§ 46 naapertorlugu akiliutinik nuussinernut atuuppoq, 31. december 2002-p kingorna kommunalbestyrelsimut imaluunniit Akileraartarnermut Pisorta qarfirmut annugussimasunut akiliutaavallaartut utertinneqarnissaannut, utertinneqarnissaasa piffissaq killissaritaasoq suli atuutilinngitsoq sioqqullugu (nuussinerit) pisimappata aammalu nuussinissamut isumaqatigiissusiortoqarsimatillugu taakku atortussaatinneqassanatik.

Aalajangersakkap kinguneraa nuussinerit 1. januar 2003-imiit 31. december 2006-ip tungaanut kommunalbestyrelsimut imaluunniit Akileraartarnermut Pisorta qarfirmut nalunaarutigineqarsimasut inatsisip atuutilerfianiit atorunnaartutut isigineqarnerat. Nuussiffigineqartorlu aningaasanik 1. januar 2007-i sioqqullugu tiguneqarsimasunik utertitsilluni akiliissanngilaq.

Tunniussinerit 1. januar 2003 sioqqullugu kommunalbestyrelsinut imaluunniit Akileraartarnermut Pisorta qarfirmut annugussimasut eqqarsaatigalugit, akileraaruseriffik 31. december 2007-ip kingorna tunniussisimaneq apeqqutaatinnagu tunniussisumut uterteqqiisnaavoq imaluunniit akileraarutinik akilernerqarpallaarsimasunik tunniussisup pisasaanut pisussaaffeqalernini nalunaarutigisinnaavaa, akiliineq pisussaaffeqalernerluunniit utertitsilluni akiliinissamut piffissarititaq sioqqullugu pisimappat.

Taamaalilluni 1. januar 2003 sioqqullugu nuussinerit akileraaruseriffiup imaluunniit Akileraartarnermut Pisorta qarfiup tigusimasai ingerlatiinnarneqassapput. Kisiannili akileraaruseriffik 1. januar 2008-miit akiliisnaavoq imaluunniit pisussaaffeqalerneramik nalunaaruteqarluni, nuussineq 1. januar 2003 sioqqullugu nalunaarutigineqarsimagaluarpuunniit. Piumasaqaataavorli akiliineq pisussaaffeqalernerluunniit utertitsilluni akiliinissamut piffissarititaq sioqqullugu pisimassasoq.